







Philos. p. 588

ff. 1428²

Morus

Philos. Logica. Instit. 777.

R

VERA SCIENDI METHODUS.

A. M. M * * * *



LUTETIÆ PARISIORUM,
Ex TYPOGRAPHIA THEOBUSTEA,
è regione Collegii Regii.

M. DCC. XVI.

CUM PRIVILEGIO REGIS.

Bayerische
Staatsbibliothek
München

VERA SCIENDI

METHODUS.

A. M. M. ***



EX TYPOGRAPHIA THEOBUSTI
LUTETIAE PARISIORUM, REGIAE
e regione Collegii Regii.

M. DCC. XVI.

CUM PRIVILEGIO REGIO

Bayerische
Staatsbibliothek
München

DE
VERA SCIENDI
METHODO.
D. O. M.

DEUS, veritatis amator,
infere pectoribus nostris
sincerum veritatis affectum, ut
te Deum verum, tuamque in
operibus tuis conspicuam ad-
miremur sapientiam, & pro-
videntiam collaudemus. Per
Christum Dominum nostrum.

DE


VERA SCIENTIA

METHODO

D. O. M.

DEUS, veritatis amator,
in te peccatoribus nostris
in te veritatis affectum, in
te Deum verum, tuumque in
operibus tuis conspicuum ad-
mirantur sapientiam, & pro-
videntiam collaudant. Per
Christum Dominum nostrum.

211





ILLUSTRISSIMO
CLARISSIMOQUE VIRO D. D.
PETRO PARDAILLAN
DE GONDRIN D'ANTIN,

Canonico Argentinenſi, Abbati Bellariæ de
Lyrâ & Monafterii Aremarenſis, inſignis
Eccleſiæ Pariſienſis Canonico honorario,
S. P. D. MICHAEL MORUS, Philo-
ſophiæ Latinæ & Græcæ Profeſſor Regius.

*ET SI nihil eſt, ABBAS ILLUSTRIS-
SIMUS, veritate fortius,
nihil potentius, adeò ut ſola divino
ã iij*

freta praesidio difficultates omnes extricare, abstrusa quaeque penetrare, & hostes omnes superare valeat, iis tamen nonnunquam premitur angustiis, ut humanum implorare cogatur auxilium.


Hinc est quod haec sciendi methodus, quae tota veritatis investigationi est destinata, non paucos ideò natura fortassis adversarios, post imploratam Divini Numinis opem, tuum ambiat patrocinium; qui nuper in ipso adolescentiae flore, gravissimas Theologiae quaestiones in Sorbonâ, primariâ Orbis Christiani Theologiae Scholâ, audiente simul & applaudente Eminentiſſimorum Cardinalium, illustriſſimorum Praesulum, & nobiliſſimorum Vi-

rorum coronâ , tantâ cum doctrinâ ,
 tantâ cum facundiâ , tantâque cum
 laude sustinuiſti , ut verum Te il-
 luſtriſſimi GONDRINI , ſanguinem
 probaveris , tantique Patruſtini veſtigiiſ
 firmiter inherens , futurum Te aliquan-
 do acerrimum veritatis deſenſorem , &
 inconcuſſam Eccleſiæ Gallicanæ colum-
 nam oſtenderis.

Tenue quidem eſt opus , ABBAS
 ILLUSTRISſIME , ſi molem in-
 tuearis , at tenuis certè non eſt la-
 bor , nec fructus inde ſperandus exi-
 guus ; ut enim in univerſâ Philoſo-
 phiâ nihil eſt difficilius , nihil labo-
 rioſius veritatis inveſtigandæ metho-
 do , ita nihil eſſe ſolet utilius , nihil
 inventâ veritate jucundius. Verum

enim verò , quisquis hunc fructum
 maturè cupit decerpere , intimos hu-
 mane animæ ac mentis recessus pene-
 tret necesse est. Ausim autem asse-
 re vix alibi studiosius investigatam,
 fœliciùs detectam animæ humane na-
 turam , ac clariùs humane mentis im-
 mortalitatem esse demonstratam , quâ
 demonstratione non aliam facilè repe-
 ries jucundiorē , aut quæ sincerio-
 rem animo pariat voluptatem. Vale.





SAPIENTISSIMIS
ET
CLARISSIMIS VIRIS
DECANO,
ET
PROFESSORIBUS REGIIS
PRÆFATIO.



UÆ me rationes indu-
xerunt, ut de hac verâ
sciendi Methodo cogi-
tarem, eas vobis, Sa-
pientissime Decane, Collegæ Se-
lectissimi, declarandas censui,

P R Æ F A T I O.

quos ego tanquam clarissima
scientiarum omnium lumina,
& fidelissimos doctarum Lingua-
rum interpretes veneror.

Observavi ab annis aliquot
Mathematicarum disciplinarum
(quibus olim imaginatio rationi
servire, nunc autem imperare
didicit) in Scholis nostris defi-
derium certè laudabile crescere.
Rationalis verò & naturalis scien-
tiæ, quibus humana ratio po-
tissimùm excolitur, studium pau-
latim languere, sensimque defi-
cere; ita ut exigua illius, hujus
vix ulla relicta sint vestigia, li-
cet vix unquam frequentioribus
experientiis fuerit illustrata; quæ
cùm sciendi cupidos ad veras

P R A E F A T I O.

causas investigandas excitare deberent, ad phanatica præ tædio recurrere coëgerunt inventa, ex quibus nulla unquam erui poterit Scientia.

Rationalis quidem disciplina reservatae sunt aliquæ quæstiones magis subtiles quàm utiles, quibus adolescentum animi exacuuntur, quas solas propemodùm callent, memoriâ plerumque magis quàm iudicio, sed & oneratur eorum memoria variis definitionibus, divisionibus ac rationibus, quas satis non intelligunt. Inter mille verò ne unum facilè reperias, qui quid una scientia sit, quâ ratione vera definitio, recta divisio, perfecta-

P R Æ F A T I O.

que demonstratio fieri possit ; omninò sciat ; licet hæ sine ullâ controversiâ sint præcipuæ operationes Logicæ & præcipui disciplinæ rationalis fructus.

In Physicis verò nostris scholis nihil aliud audias , quàm materiam subtilem , globosam , striatam , imaginaria spectra , quæ nusquam in rerum naturâ comparent ; neque apud plerisque aliud nunc est Physica nostra , quàm Commentarius in phanaticam Cartesii de origine Mundi fabulam. Quæ nullam non modò scientiæ , sed ne veri , imò ne verosimilis speciem habet ullam. Magnam quidem rem præstare se putant Cartesii sectatores

P R Æ F A T I O.

tores, cùm dicunt hactenùs ostendisse neminem, eam esse impossibilem, quod tamen est falsissimum: sed quid, si non sit impossibilis? an ideò sufficiens præbeat fundamentum scientiæ, quæ agit tantùm de rebus necessariis, deque iis, quæ aliter & aliter esse non possunt? Non diffitetur certè Cartesius neque Cartesianus ullus quin aliter ori potuerit Mundus, ergo ex hac Cartesii fabulâ nulla potest erui scientia: vel quid sit scientia non satis intelligunt, quin etiam fatetur Cartesius, ne non videatur Christianus, Mundum eo modo conditum esse quo Genesios primo refertur. Licet credat eum

P R Æ F A T I O.

oriri potuisse, modò creata fuisset materia sectaque in partes cubicas, aut quasi cubicas, quæ circa centra sua volverentur. Hinc enim prodituram triplicem ait materiam, subtilem, globosam, striatam, quæ in vortices torqueantur majores, ad quorum centra conflente materiâ subtili, formaretur stella fixa, quæ Sol sit nostro planè similis, in vorticibus majoribus nasci minores ait, ad quorum centra conflente similiter materiâ subtili, formantur stellæ minores, quæ crassiori materiâ obrutæ, in planetas degenerent, qui veræ sint terræ, nostræ planè similes, ex iisdem principiis eodem modo

P R Æ F A T I O.

motis ortæ , ac similes proinde habituræ effectus , sua quæque meteora , sua fossilia , suos lapides , sua metalla , plantas , animalia quæque perfecta , ipsos etiam homines , ut multis ejus discipulis placet : quin etiam eorum nonnullus ausus est asserere , in his singulis five planetis , five terris , quæ circà singulas stellas fixas plurimæ sunt , incarnatum esse Verbum Divinum varios ob fines : eò usque processit effrænis illa fingendi licentia , verberibus certè potiùs quàm verbis castiganda ; cùm hæc vix dici possint aut cogitari sine singulari contemptu , aut manifesto Christianæ Religionis ludibrio.

P R Æ F A T I O.

Cometas etiam inter planetas recensent, qui ex vorticibus suis disruptis exorbitent, & alios circa vortices majores excurrant, timendumque nobis, ne tandem nostra exorbitet terra, suoque Solis vortice relicto, alios circa Soles ac vortices excurrat, ut nunc circa suum Solem excurrere perhibetur.

Licet autem nulla unquam tam paradoxa, tam inepta in palæstris Philosophorum ab Epicuri & Democriti temporibus comparuerit fabula; nulla tamen cum majori applausu fuit suscepta, nulla majorem auctori suo suppositio peperit famam, eam promoventibus & procuran-

P R Æ F A T I O.

tibus viris certè magnis, & magnâ eruditionis famâ non immeritò conspicuis; sed qui de ipsâ re neque seriò cogitaverunt, neque ullam ab exactâ in scholis adolescentiâ physicæ disciplinæ operam dederunt; magni reverà Theologi, Physici verò valde mediocres. Horum autoritate fretus quos magna, ut fieri solet, indoctorum, qui non suo, sed aliorum iudicio nituntur, secuta est caterva, magnus opinione hominum Philosophus evasit Cartesius, licet vix ullam Logicæ, Physicæ verò nullam omninò notionem habuerit.

Enim-verò quam tandem Logicæ notionem habere potuit, is

P R Æ F A T I O.

qui omnem definiendi, dividendi, demonstrandique methodum penitus ignoravit; ut planè satis demonstratum est: * Quique sua sophismata (si ejus dicenda sint) ac ridendas planè rationes pro certissimis & evidentissimis demonstrationibus, ausus est proponere, quæ eas certitudine & evidentiâ geometricas æquare vel etiam superare existimat, & tales demum esse credit, ut non putet ullam viam humano ingenio patere, per quam meliores inveniri unquam possint? Non potui non sæpiùs admirari insolentissimam hanc audaciam & fiduciam, ex crassâ prorsùs & incredibili ignorantia

* In disputatione de existentia Dei, & humanæ mentis immortalitate.

P R Æ F A T I O.

natam. Cùm reverà vix unquam tam inopes aut leves ab aliquo Philosopho aut Theologo fuerint propositæ, eo saltem modo quo eas proposuit, ut demonstratum est. * Physicæ verò scientiæ quam cognitionem habere potuit, is qui in assignando Physicæ attributionis subjecto, quod Scholæ vocare nunc solent objectum, & à quo totam scientiæ rationem rectè desumunt, toto cœlo, hoc est toto genere penitùs aberravit; ita ut corpus physicum cum corpore geometricè sumpto, substantiam cum accidente, corpus naturale cum magnitudine trinæ dimensionis,

* Eâdem disput.

P R Æ F A T I O.

non tantum re & subiecto, sed ratione confuderit; ita ut eandem utriusque corporis essentiam esse planè crediderit? Quo vix major in scientiis error excogitari potest: ita ut mihi facile persuadeam, huius erroris authorem, nullam unquam scientiæ notionem habere potuisse. Si eadem est corporis physicè, geometricèque spectati essentia, eadem erunt utriusque principia prima, eadem utriusque attributa propria, seu proprietates, eadem species, eadem demum omnia, quatenus scientiæ, aut mentis considerationi sunt subiecta, nec ulla prorsus erit inter Geometriam, & Physicam scien-

P R Æ F A T I O.

tias differentia. Non alia erunt
physici corporis principia, quàm
punctum, linea, & superficies,
quia non alia sunt geometrici:
non alia physici corporis attri-
buta propria, quàm æqualitas,
inæqualitas, ratio, proportio &c,
quia non alia sunt geometrici:
non aliæ demùm physici corpo-
ris species, quàm globus, cubus,
conus, pyramis, & quæ regula-
ria corpora dicuntur, quia non
alia à Geometriâ considerantur.

Verùm enim-verò si Physica
dicenda sit scientia, quod multi
nunc nolint. Saltem si speciem
aliquam & similitudinem habeat
scientiæ, erit in actu spectata
demonstratio, seu speciem ali-

P R Æ F A T I O.

quam aut similitudinem habebit demonstrationis, omnis autem demonstratio intendit attributum aliquod proprium, de proprio suo subiecto, cum quo necessariam habeat connexionem, & à quo necessario procedat, ostendere; corpus autem naturale à Physicis nunc omnibus, ut physicæ attributionis subiectum aut objectum assignatur, cujus nullam omninò notionem habere potuit Cartesius, qui ejus prima principia penitus ignoravit, illudque cum corpore geometrico confudit, ut mox diximus. Attributum autem Physicæ proprium, quodque necessariam habet cum corpore naturali conne-

P R Æ F A T I O.

xionem, est mutabilitas naturalis, ut antiquæ veræque Physicæ Professoribus placet, aut mobilitas, ut novis nunc placet, qui motum cum mutatione confundunt, & mobilitatem cum mutabilitate; licet hæc reverâ distincta sint, ut genus & species, quia hi cum Cartesio non aliam speciem mutationis aut motûs agnoscunt, quàm motum localem, cujus omnium ferè judicio, non nisi falsam notionem habuit Cartesius? Igitur Physicam penitus ignoravit, qui subjectum demonstrationis aut scientiæ aliqujus, ejusque attributum ignorat, quam tandem scientiæ notionem habere potest? hæc ple-

P R Æ F A T I O.

niùs ex dicendis patebunt, hìc præmittenda tantùm sunt.

Deinde motum omnem naturaleni non credit Cartesius oriri à corpore naturali, aut aliquam necessariam cum eo connexionem habere. Quia reverà nullam corporis naturalis notionem habuit; sed illud cum geometrico confudit, in quo sic sumpto nullum est principium motûs, & sic nullo modo motus aut mutatio, mobilitas aut mutabilitas de corpore naturali demonstrari possunt, cum nullam necessariam connexionem cum eo habeant, ab eoque minimè procedant aut oriantur. Quibus satis indicat Cartesius nullam se omninò Physicæ

PRÆFATIO.

ficæ omninò scientiæ notionem habuisse , nec habere possunt ullam qui cœcum hunc ducem sequuntur.

Quæ cum diligenter adverte-rem, & omnem à Scholis nostris, ubi Cartesius auditur, exulare planè scientiæ notionem , rem tot vigiliis & sudoribus partam , tot laboribus & conatibus illustrium virorum contra Pyrrhoneos , & Academicos vindicatam , gemmam illam pretiosam , & eximium humanæ mentis ornamentum , recuperare & restaurare conatus sum. Quid verò præstiterim , & quomodò , vobis breviter indicabo.

Veritatem in ipso fonte Deo

P R Æ F A T I O.

quæsi : quâ ratione in res creatas & sensibiles deducatur, investigavi : quomodò sensus sunt veri, ita tamen ut veritatem non cognoscant, patefeci. Quomodò eorum ope ad mentem permeet veritas, indicavi. Verum discrimen sensûs & mentis paucis notum detexi, quomodò mens vera sit, & quâ ratione veritatem cognoscit denunciavi. Quæ certò & evidenter ab humanâ mente cognosci possunt, & quæ non possunt, indicavi. Tres præcipuas mentis virtutes, intelligentiam, sapientiam, scientiam plenius exposui. Quod sit primum simpliciter humanæ rationis principium, cui omnis ra-

P R Æ F A T I O.

tio innititur, indicavi; quod non fit, rejeci. Veram definiendi, rectam dividendi, perfectam demonstrandi methodum proposui. Veram substantiæ in puram, & impuram divisionem stabilivi; ex quâ vera corporis, veraque mentis ratio colligitur, verum utriusque discrimen declaratur, & mentis humanæ, quam vulgò vocant animam, immortalitas clarissimè demonstratur. Falsam substantiæ divisionem in extensam, & cogitantem, multorum errorum occasionem, plenissimè confutavi: fabulosam Cartesii Mundi fabricam, quatenùs ad scientiæ rationem pertinet, demolitus sum; ac tandem perfectissimam scien-

P R Æ F A T I O.

tix præsertim physicæ normam
proposui. Hæc executus sum,
aut exequi certè conatus sum,
quâ brevitæte, perspicuitate, ac
styli simplicitate potui, quia res
ipsæ valdè difficiles sunt & ab-
strusæ, interrogatione discantis
Discipuli, & Magistri responsio-
ne docentis: an rectè, an feli-
citer? vestrâ malim quàm meâ
sententiâ pronunciari. *Valete,*
DECANE SAPIENTISSIME,
VIRI CLARISSIMI, & æqui
bonique consulite.



INDEX

CAPITUM ET ARTICULORUM.

CAPUT I.

De Vero.

- I. Quare homines veram naturâ duce scire
desiderant? pag. 1
- II. Quid verum sit & unde procedat seu
derivetur? 4
- III. Quomodo sciri potest aliquid esse
verum? 6

CAPUT II.

De necessitate sensuum ad investi- gandum verum.

- I. Quare sensibus indigemus ad investi-
gandum verum? 8
- II. De ideis innatis, Dei præsertim &
veri. 10

CAPUT III.

De veritate sensuum.

- I. Quid est veritas sensuum? 19

II. Quare non sensus, sed sola mens percipit veritatem? 23

III. Quid sunt species impressae? 25

CAPUT IV.

De veritate mentis.

I. Quodnam est proprium humanae mentis obiectum? 27

II. Discrimen inter intellectum & sensum. 29

III. Materia signata est principium individuationis 31

IV. Formae per se subsistentes omnes specie distinguuntur, non solo numero. 33

V. De singularibus sensibilibus nulla est definitio seu demonstratio. 34

VI. Mens non errat circa proprium obiectum nisi per accidens. 36

CAPUT V.

Quomodo mens humana cognoscit veritatem.

I. Mens humana cognoscit veritatem componendo & dividendo, & quare? 37

II. Quandoque compositio & divisio sunt verae, & quomodo id scitur? 40

III. *Discrimen sensum inter & intellectum.* 43

IV. *Quare omnia rerum sensibilibus attributa non sunt necessaria?* 45

CAPUT VI.

De intelligentiâ.

I. *Quid est intelligentia?* 49

II. *Universalissima principia.* 50

III. *Universalia.* ibid.

IV. *Specialia.* 51

V. *Primum simpliciter principium.* 52

CAPUT VII.

DE HOC PRINCIPIO,

Quidquid clarè distinctèque seu evidenter percipitur, est verum seu certum.

I. *Non est primum principium.* 54

II. *Nullo modo est principium.* 57

III. *Est tamen verum.* 62

CAPUT VIII.

De sapientiâ.

I. *Quid est sapientia?* 63

II. *Quid ens reale, quid ens rationis?* 65

III. Divisio entis realis.	67
IV. Divisio substantia.	69
V. Divisio accidentis.	70
VI. De abstractione formæ à materiâ.	71

CAPUT IX.

De scientiâ.

I. Quid est habitus scientia?	75
II. Quid actus?	77
III. Quid certitudo scientia?	78
IV. Quid evidentia scientia?	82

CAPUT X.

De demonstratione.

I. Quid est syllogismus?	86
II. Quid demonstratio?	90
III. Demonstrationis exemplum.	94

CAPUT XI.

De primo subjecto demonstrationis.

I. Quid & quotuplex primum subje- ctum?	99
II. Primum est univocum tum secundum nomen, tum secundum rationem.	100

III. Secundum est univocum secundum rationem tantum.	ibid.
IV. Tertium est analogum.	101
V. De equivocis quid agendum?	102
VI. Quomodo procedendum?	ibid.

CAPUT XII.

De definitione.

I. Quid & quotuplex definitio?	104
II. De principiis causisque rerum quatenus inserviunt definitioni.	105
III. De definitione accidentium.	111
IV. De definitione Logicâ.	113

CAPUT XIII.

De divisione generis in suas species.

I. De divisione generis in suas species universè.	115
II. De divisione substantiæ.	117
III. Quid est substantia pura, quid impura?	119
IV. Quâ ratione pura ab impurâ dignoscitur?	126
V. An belluarum anima dicenda sit substantia immortalis?	132

VI. *An anima hominis sit substantia, an immortalis?* 137

VII. *Anima non est accidentium congeries nec subtilis materia in belluis aut plantis.* 149

CAPUT XIV.

I. *Divisio substantiae in extensam & cogitantem est inepta.* 152

II. *Inducit in ignorationem corporis naturalis & mentis.* 154

III. *Physica & Metaphysica.* 156

IV. *Error & ignorantia Cartesii, unde nata?* 158

V. *Substantiae omnis ratio ex operationibus est repetenda.* 163

VI. *Totius Physica ratio.* 166

VII. *Ignota prorsus Cartesio.* 167

VIII. *Ne quidem quid scire sit, novit.* 175

CAPUT XV.

De Cartesiana Mundi fabrica.

I. *Cartesii Mundi fabrica seu fabula Christiano Philosopho prorsus indigna, Philosopho quidem, quia nulla ex ea erui potest scientia.* 179

- II. Nulla probabilis opinio. 182
 III. Durare nequit Cartesii Mundus. 190
 IV. In continuo non sunt partes actu distinctae. 192
 V. Indigna Christiano, quia nec Dei sapientiam, nec ejus providentiam indicat. 195

CAPUT XVI.

De Cartesianis motûs regulis.

- I. Omnes sunt falsa. 200
 II. Deus nec materiam nec motum in certâ quantitate creavit. 201
 III. Corpus naturale non permanet in eo statu, in quo primum positum fuit. 202
 IV. Corpus non semper rectâ movetur. 204
 V. Tertia Cartesii regula est falsa. 205

CAPUT XVII.

De modo tradendi scientiam.

- I. Quid una scientia sit? 208
 II. Quod subjectum attributionis Physicae? 209
 III. Quae ejus principia causaeque? 211
 IV. De primario attributo Physicae. 212

V. De secundariis,	213
VI. De universâ Mundi compage.	215
VII. De simplicibus corporibus.	217
VIII. De mixtis.	218
IX. De animatis.	219

CAPUT XVIII.

I. Humanitas est anima rationalis tota, ex Sacrà Scripturâ.	222
II. Ex D. Augustino secundùm Sacram Scripturam declaratur animam rationa- lem esse partim materiale, partim im- materiale.	224
III. Ex Aristotele anima est essentia corpo- ris naturalis organici, ut aspectus est oculi essentia.	230
IV. Aristoteles primus docuit quid sit ac- curatè scire.	233
V. Quid scit accuratè scire?	234
VI. Pauci verè Physici.	237
VII. Quomodo anima natura est investi- ganda.	240
VIII. Sola mens immortalis esse demon- stratur in homine, non anima tota.	245

CAPUT



CAPUT PRIMUM DE VERO.

I. Quare homines verum naturâ
duce scire desiderant? II. Quid
verum est & unde procedit seu
derivatur? III. Quo modo sciri
potest aliquid esse verum?

D.



UARE naturæ quo-
dam instinctu verum
scire desideramus?

M. Omnis vis seu
facultas suum avidè desiderat ob-
jectum; visus, v. c. lucem & colores
videre; sonos auditus audire: odo-

I. Qua-
re ho-
mines
naturâ
duce
verum
scire
deside-
rant.

A

res odoratus; gustus saporibus; & sic deinceps. Verum autem est proprium humanæ mentis objectum. Unde mirari quis minimè debet, si mens hominis verum scire desideret; imò verò mirari potius licet, quare hoc non sit præcipuum & vehementissimum hominis desiderium.

D. Quare facultates omnes sua desiderant objecta?

M. Quia factæ sunt & ordinatæ propter objecta sua: ab iis perficiuntur & complentur.

D. Quare verum scire primum esse debet hominis desiderium?

M. Quia mens hominis est præcipua ejus facultas quæ cæteris præesse, eas regere debet ac ducere, ei-que reliquæ ex rectâ primâque institutione naturæ servire debent: ordo enim postulat ut inferiora sint propter superiora eisque serviant. Regere autem nequit nisi veritatem noverit.

D. Unde igitur factum est, ut res non ita sit? in paucis enim videmus, hoc ardens desiderium vigere.

M. Id ex vitiata naturæ labe procedit, ac magnum est, & evidens indicium violati ordinis primùm instituti, quo mens hominis Deo perfectè subjecta fuit, ac cæteræ vires menti. Verùm exquo ea recessit à Deo, cæteræ facultates ab ipsâ aut ejus imperio recesserunt. Unde nunc in paucissimis viget ardens illud desiderium; nam maxima pars hominum belluarum more solis sensibus ducitur, quæ victui sunt necessaria quærunt: qui elegantiores videri volunt, imaginationem ducem sequuntur; qui vitam activam, rationem particularem sæpe consulunt: longè verò paucissimi ad universalem rationem, seu mentem assurgunt, & ardenti veri cognoscendi studio tenentur. Nisi autem universalem rationem consulamus, ad finem no-

strum ultimum non benè collima-
mus.

II.
Quid
verum,
& unde
deri-
vatur,
seu pro-
cedit.

D. Quid tandem est illud verum?

M. Nihil aliud est quàm id quod est,
& verum scire, nihil aliud est quàm
scire id quod est, aut modum quo est.

D. Undenam verum derivatur?

M. Ab ipsâ veritate.

D. Quid autem est ipsa veritas?

M. Ut verum est id quod est,
ita ipsa veritas est ipsum esse,
quod Deus est, qui cùm sit primum
ens, quod neque à se, neque ab
alio esse possit, nec particeps esse fieri,
prorsus est necesse, ut sit ipsum esse,
& ipsa proinde veritas, à quo res
omnes procedunt, & verum omne
derivatur.

D. Quomodo res omnes à Deo
procedunt?

M. Per intellectum, non autem
per naturam.

D. Quare non per naturam?

M. Quia forent Deo similes se-

cundum naturam, aut ejusdem potius naturæ cum Deo; ut filius est ejusdem naturæ cum patre.

D. Quomodo per intellectum procedunt?

M. Eo aut simili modo quo res arte-factæ ab artifice.

D. Quis est ille modus?

M. Per ideam; fingit enim artifex operis ideam, eamque materiam formando communicat, ubi materiâ res constat, illam suæ ideæ similem efficiendo. Deus autem suâ mente rerum omnium ideas complectitur, aut ipse potius est rerum omnium subsistens idea, res omnes repræsentans.

D. Quandonam autem res censetur vera?

M. Quando artificis ideæ est planè conformis, aut perfectè similis; ita ut eadem aut planè similis sit mentis & operis facti forma.

III.
Quo-
modo
res ve-
ra esse
dignos-
citur.

D. Verum cum nos non possimus eam, quæ in mente stat artificis, ideam intueri; quomodo sciemus rei formam ipsi esse planè perfectèque similem.

M. Sciemus ex fine aut functione operis; quia ex eâ solet artifex ideam suam exprimere; cùmque opus hunc finem aut functionem assequitur sibi propriam, tum ideæ perfectè similis esse dicitur & vera. Hinc rerum veritatem ex earum functionibus colligimus; ita verum dicimus oculum, non eum qui externam oculi speciem refert, sed eum qui videt; sic horologium verum vocamus, quod indicat horas; non illud quod similitudinem habet horologii.

D. Video rem esse veram quando est perfectè conformis ideæ artificis, & esse conformem, quando suam assequitur functionem. Sed nondum fatis intelligo, quomodo illa in nobis formatur cognitio?

M. Cùm operis idea seu forma menti nostræ communicatur.

D. Quomodo menti nostræ communicatur?

M. Tribus modis. 1^o. ab ipso artifice. 2^o. à rebus ipsis. 3^o. ab eo qui eum accepit ab artifice, aut à rebus ipsis, & quidem si de Deo agatur, primus modus vocatur infusio, quâ Deus rerum species & ideas paucorum mentibus, Adami scilicet & Salomonis, & paucorum fortassis aliorum infudit; hic enim modus est valdè rarus. Secundus verò modus est, quo rerum sensilium ideas sensuum ope ex rebus ipsis mens colligit, de quo modo plura mox dicemus; & hic est modus inventionis, qui frequentior est quàm primus, licet non ita frequens ac tertius, qui vocatur doctrinæ, cæteris quidem longè frequentior, sed & frequentius in errorem inducens, unus enim deceptus alios fa-

cilè decipit ; præsertim si vir sit , aut habeatur insignis.

D. Quid ergo facto opus est ?

M. Qui verum diligenter investigare voluerit , tres illos modos , quantum fieri potest adhibebit ; divinam opem implorabit , res ipsas considerabit , alios audiet & leget. Cùm autem secundus modus , à recto sensuum usu pendeat , de eorum veritate pauca dicenda sunt , sed priùs de eorum necessitate dicemus ad investigandum verum.

C A P U T II.

De necessitate sensuum ad investigandum verum.

I. Quare sensibus indigemus ad investigandum verum. II. De ideis innatis , Dei (præsertim & veri.

I. Quare sensibus indigemus ad investigandum verum.

D. CUM verum sit proprium humanæ mentis objectum , quare sensuum ope indigemus ad

illud investigandum?

M. In rebus ordinatis inferiora ejusdem præsertim generis univoci vel analogi & suppositi superioribus inservire debent. Sensus autem facultates cognoscentes sunt; mens verò est suprema vis cognoscens in homine; sensus ergo tum interni, tum externi menti debent inservire.

Deinde singulis planè momentis experimur nos non posse intelligere nisi consulendo phantasmata, quæ orta sunt à sensuum externorum impressionibus, & ideò in Arithmeticâ, Geometriâ & Physicâ figuris utimur, ut phantasmata faciliùs & accuratiùs formemus, ex quibus rerum species & ideas exprimamus.

Tum nemo potest veritatem aliquam à se conceptam nobis communicare, nisi per voces aut sensibilia aliqua signa.

Ipsa prætereà prima mentis operatio, quæ à nonnullis apprehensio

simplex vocatur, ab aliis idea, quædam ratio est: omnis autem ratio ex præcedenti quâdam cognitione deducitur, quæ non est alia in homine, quàm sensuum cognitio.

Denique videmus eos, qui sensu carent aliquo nascendo, ut cæcinati, sensus illius objecti nullam exprimere posse ideam lucis v. c. aut coloris; quæ satis indicant ideas nostras suam sensibus originem debere, non eodem tamen modo in sensibus sunt ac in intellectu, licet ab iis procedant, ut suo loco dicemus.

D. Quid ergo censes de innatis nobis ideis Dei præsertim & veri?

II. De
ideis
innatis
Dei
præsertim &
veri.

M. Nullæ sunt, & vera tabularasa, est mens nostra, cùm primùm infunditur, cæque ideæ innatæ ab iis fictæ sunt, qui nullam omninò nec sensûs, nec mentis, nec ideæ notionem habuerunt.

D. Quomodo Cartesius nullam

mentis habuit notionem, quâ nihil melius novit?

M. Nullam omnino, quia eam cum sensu confudit, eamque per cogitationem definivit, quam omnibus sensibus externis & internis tribuit. Sed neque ideæ, ut alio loco plenè satis ostensum est.

Dispu-
tatione
citata
de exi-
stentiâ
Dei,
&c.

D. De sensu quidem & mente non ita miror, quia paucis eæ vires, aut earum distinctio nota est; sed quòd ignoraverit quid sit idea, non satis capio?

M. Ignoravit tamen, & gravissimi viri ejus admiratores acres exercere de ideis contentiones, quas satis perspectas non habuerunt.

D. An res ita difficilis est?

M. Planè difficilis iis qui imaginationem aut opinionem tantum hominum sequuntur, iis verò qui rationem consulunt, non ita difficilis.

D. Quæso, doceas, quo modo

consulenda sit ratio, ut vera formetur ideæ notio?

M. Habes-ne aliquam accuratam rei alicujus ideam? si habeas, facile scies quid sit idea.

D. Habere me puto circuli vel hominis: veram enim circuli ideam esse puto, quòd sit figura plana, unâ lineâ comprehensa quæ circumferentia dicitur, quæ æqualiter undique distet à centro seu puncto medio. Et veram hominis ideam esse puto, quòd sit animal rationale, seu res vitâ, sensu, & ratione prædita.

M. Quare putas veram circuli ideam esse figuram planam unâ peripheriâ contentam, quæ æqualiter distet undique à centro?

D. Quia hæc est propria ratio circuli, ex propriis ejus principiis collecta, quæ sunt peripheria & centrum, & æqualis illius ab hoc distantia.

M. Ergo

M. Ergo idea est propria rei ratio seu definitio ex propriis rei principiis collecta. Undenam hanc ideam hausisti?

D. Ex variis, aut omnibus, quos vidi, circulis.

M. Ergo sensibus hanc ideam debes?

D. Non diffiteor.

M. Nunc quare veram hominis ideam esse putas, animal rationale, seu rem vitâ, sensu & ratione præditam?

D. Quia hæc est propria hominis ratio ex omnibus ejus operationibus collecta, sed præsertim propriis.

M. Ergo collige veram hominis, & rei cujuscunque naturalis ideam esse propriam ejus rationem seu definitionem ex omnibus ejus operationibus, sed præsertim propriis collectam. Undenam hanc hominis ideam hausisti?

D. Ex omnibus hominibus in quibus observavi vitæ, sensûs, & rationis operationes.

M. Collige nunc utriusque ideæ notionem simul, & plenam perfectamque habebis ideæ notionem, dicendo ideam esse propriam rei rationem seu definitionem ex propriis rei principiis, aut propriis ejus operationibus & effectis collectam.

D. Video; sed quare modò ex principiis, modò ex operationibus seu effectis ideam seu rationem rei colligimus?

M. Quia duplici modo ratiocinamur, à priori seu per principia & causas; & à posteriori, ut schola loquitur, seu per operationes & effecta.

D. Quandonam autem à priori ratio colligenda est, & quandonam à posteriori?

M. Ratio procedere semper debet à notioribus ad minùs nota. Igi-

tur ubi principia notiora sunt, ab iis ratio duci debet; ubi verò effecta seu operationes notiores sunt principiis, ex effectis aut operationibus rei ratio & idea colligenda est; ubi verò hoc contingit, plenius & uberius dicemus agendo de definitione, quæ vera est rei idea.

D. Multi tamen volunt innatam in nobis esse ideam Dei?

M. Ii de re serió minimè cogitant. Quia si qua foret innata nobis idea, ea in omnibus hominibus reperiretur, & quidem eadem: at multi sunt Athei qui nullam Dei habent ideam, nec ullam ejus ideam esse volunt: multæ quoque sunt barbaræ. In Asia, in Africâ & Americâ non modò gentes, sed excellentissimi populi, ut Sinenfes, qui nullam omninò Dei notionem habent, sed ne quidem ullum nomen, quo Deum exprimant. Quin etiam Græci Romanique plures agnove-

runt Deos, licet nihil magis cum verâ Dei notione pugnet quàm illa pluralitas. Si quidem Dei nomine intelligimus ens perfectissimum; fieri verò non potest, ut duo aut plura sint perfectissima, quia cum à se naturâ distincta supponantur, necesse prorsus est ut singula proprias suas habeant perfectiones, quæ aliis minimè conveniant & per quas à se invicem distinguantur. Præsertim cum in Deo nulla sit materia, seu materiæ portio, quâ unum individuum ab alio distinguatur.

Denique nonnulli inter ipsos Judæos & Christianos, veros Dei cultores, Deum corporeum esse voluerunt, quem alii planè spiritalem agnoscunt, quæ omnia satis declarant nullam in nobis innatam esse Dei ideam: imò verò ne quidem ullam esse posse docere videtur. S. Thomas 1. p. q. 3 a. 5 in c. cum neget ullum ejus genus, ullam dif-

ferentiam, ullam definitionem, aut demonstrationem nisi per effecta esse, quæ ita distant à Deo, ut propriam ejus rationem nunquam exhibere valeant. Quæ tamen sola meretur ideæ nomen, ut mox ostendimus, neque enim alia vel circuli vel hominis notio vocatur idea, quàm quæ sit ratio eorum propria.

D. Quid de veri sentis ideâ?

M. Eam ex rebus sensibilibus colligimus modo superiùs dicto. Quare tu imaginem aliquam vocas veram, aut puerum aliquem verum sui patris filium?

D. Veram voco imaginem quia est perfectè similis suo prototypo, & verum filium qui patri suo perfectè similis est.

M. Ergo collige, ut superiùs, veri rationem esse perfectam similitudinem alicujus cum alio, à quo aliquo modo processit aut expressum est. Unde porrò hausisti hanc

veri five ideam five notionem, non aliunde certè quàm à sensibus, si verum ingenuè fateri velis, nec aliunde Dei habetur notio, quam Christiani quodam modo sibi innatam esse putant, quia eam à teneris hauserunt annis inter ipsos nutricis aut matris amplexus: sed res non ita se habet inter Barbaros, qui non habent Deum tam appropinquantem sibi, ac nos, quæ magna nostra foelicitas est, & cuius magnam aliquando reddemus rationem. Hinc missionis & prædicationis necessitas, ut plerisque innotescat Deus. Paucissimi enim per se Dei notionem hauriunt ex ipso rerum sensibilibus intuitu.



CAPUT III.*De veritate sensuum.*

I. *Quid est veritas sensuum?* II. *Quare non sensus sed sola mens percipit veritatem?* III. *Quid sunt species impressæ?*

D. **Q**uid est veritas sensuum? I. I. Quid est veritas sensuum.
M. Est eorum cum suis objectis conformitas, objecta enim formas suas externas sensibus communicant, eosque sibi similes efficiunt. Ita videmus similitudines nostras in oculis intuentium nos, ut in speculis.

D. Quid vocas objecta sensuum?

M. Omnia sensibilia.

D. Quotuplicis sunt generis?

M. Duplicis, alia sunt sensibilia per se, quæ per proprias suas species percipiuntur, ut lux, color, sonus,

odor, figura &c. alia verò sunt sensibilia per accidens, quæ non per proprias alicui sensui species dignoscuntur, ut equus, asinus, mulus, circa quæ sæpius errant sensus, quia ad hæc percipienda per se primò non ordinantur.

D. Quot sunt sensibilia per se?

M. Ea sunt in duplici differentiâ, communia scilicet & propria.

D. Quænam sunt sensibilia communia?

M. Sunt ea quæ à pluribus sensibus percipi possunt, à visu v. c. simul & tactu; eaque sunt magnitudo, numerus, figura, situs, motus & quies, circa quæ sensus quoque frequenter errant, quia ad hæc percipienda nullus unus destinatur sensus, sed plures sunt adhibendi.

D. Sensibilia propria quænam sunt?

M. Sunt ea, quæ ab uno quodam sensu percipiuntur, ut lux &

color, à solo visu; sonus ab auditu solo; odor ab olfactu solo; sapores à solo gustu; & qualitates tactiles à solo tactu; circa quæ sensus non errant ubi debitæ adfunt conditiones.

D. Quare non errant ubi debitæ adfunt conditiones?

M. Quia à naturâ, hoc est, ab authore naturæ Deo eorum conditore destinantur ad hæc objecta percipienda; non errat autem nec fallitur Deus in suis operibus.

D. Quænam sunt illæ conditiones?

M. Quatuor vulgò recensentur.

Prima est ut objectum sit proprium, ut jam diximus.

Secunda est, ut sit in debitâ distantia, hoc est, nec propius quàm par est, quia organo noceret, aut medii actionem impediret, ut si quid oculo proximè imponeretur: nec longius quàm convenit, quia

res naturales finitam habent agendi sphaeram, ultrà quam paulatim deficit earum vis, ac tandem cessat; si nimis dissita sit.

Tertia conditio est, ut medium inter objectum & sensum sit uniforme, seu unius tenoris benèque dispositum; secùs fallitur sensus, seu res aliter apparet, quàm est; ita remus aquæ partim immersus apparet fractus, propter diversam raritatem & densitatem medii, aëris scilicet & aquæ. Similiter si aër sit nebulosus, res majores aut non satis distinctæ videbuntur: ut accidit Lunæ aut Soli orienti propter vapores; quia medium recipit impressionem ab objecto, eamque communicat sensui: objecta enim prius agunt in medium quàm in sensum.

Quarta conditio est, ut organum sensûs sit benè affectum, & ab omni pravâ qualitate prorsus immune: organum enim suam affectio-

nem cōmunicat impressioni objecti, aut eam ab eo suscipit; hinc oculorum flavedine laborantibus, omnia videntur flava; & iis quorum linguæ extremitas est aspersa bile, amara videntur omnia: sic omnes impressiones in auro factæ sunt aureæ seu fulvæ. His conditionibus si moram adhibeas & attentionem, vix comperies sensus errare; an autem adsint hæ conditiones, rationis est observare.

Sed & scire decet sensus non tantum pati ab objectis suis, eorum species recipiendo; verum etiam simul agere, has species discernendo & dijudicando.

D. An sensus percipit veritatem?

I I.

M. Veritas sensûs, ut diximus, est conformitas ejus cum objecto suo, quæ in eo sita est, ut eadem seu planè similis sit in objecto & sensu forma, quam conformitatem percipere non potest sensus, nisi

Non
sensus
perci-
pit ve-
ritatē,
sed
mens.

videat eam quæ est in se, seu organo suo formam, eamque cum objecti formâ conferat, quod sensus præstare non potest: non enim visus potest eam, quæ est in se formam videre aut in oculo, illamque cum objecti formâ conferre, ut omnes nôrunt.

D. Quare sensus hoc præstare nequeunt?

M. Quia vires sunt materiales & organicæ; quæ certâ complexione & integritate partium seu perfectione constant; certo numero, ordine, figurâ & situ contentarum, quæ non possunt se reflectere, aut suprà se invicem se replicare, sine mutuâ penetratione, quæ corporeæ naturæ minimè convenit; quæque sine manifestâ totius organi dissolutione fieri nequit. Veritatis ergo cognitio ad solam mentem pertinet.

D. Quare sola mens percipit veritatem?

M.

M. Quia facultates inter hominis cognoscentes sola est immaterialis, & inorganica; nullum habet organum, nullam in corpore sedem seu locum, sed tota in toto est, & tota in quâlibet parte corporis. Qui eam in conario collocant nervorum motui attentam, ut araneam in nido suo telæ suæ motioni intentam, ad capiendas muscas, aut eam certo corporis loco circumscribunt, ejus naturam penitus ignorant: & hi vim imaginationis superare nequeunt, quia loco contineri aut circumscribi corporis est, non mentis affectio.

D. Sæpiùs audiivi te, & alios de speciebus, quas vocatis intentionales, loquentes, quæso dicas quid illæ sunt?

III.
Quid
sunt
species
intentionales.

M. Nihil aliud sunt, quàm leviores objectorum impressiones in sensibus aut eorum organis factæ, quibus nec organi natura, nec tempestas admodum mutatur; qualis illa

caloris impressio, quam manu sentimus, statim ac eam admovemus igni, priusquam incalescat aut calida fiat.

D. Quare tam leves sunt?

M. Quia non debent sentiri nisi præsentibus objectis, ac iis amotis statim evanescere, at si fortiores forent, iis etiam absentibus perseverarent, ac sentirentur, nec alterius objecti impressionem recipere possent saltem tam facile: Deinde organi temperiem violarent, quæ valde delicata est, ac justam ejus proportionem dissolverent. Unde vulgò verèque dicitur, vehemens sensibile lædit sensum; quod experietur facile, quisquis solem intueri voluerit.



CAPUT IV.

De veritate mentis.

I. Quodnam est proprium humane mentis
objectum. II. Discrimen inter intellectum
& sensum. III. materia signata est prin-
cipium individuationis. IV. Forme per
se subsistentes, omnes specie distinguun-
tur, non solo numero. V. De singulari-
bus sensibilibus nulla est definitio seu de-
monstratio. VI. Mens non errat circa
proprium objectum, nisi per accidens.

D. Quid est veritas mentis?

M. Est ejus cum objecto
suo conformitas, ita ut eadem sit
aut planè similis in mente, ac ejus
objecto forma.

D. Quodnam est mentis obje-
ctum?

M. Est ipsa rei naturalis essentia.

D. Quare rei naturalis essentia est
proprium humane mentis objectum?

I. Pro-
prium
mentis
objectum.

M. Quia quod primum est in re naturali, debet esse proprium primæ facultatis cognoscentis objectum. Essentia autem rei naturalis, est quid primum in eâ, & mens hominis est prima ejus facultas cognoscens, ergo rei naturalis essentia est proprium humanæ mentis objectum.

D. Quare non divina aut angelica essentia?

M. Quia cognitio fit, secundum quod res cognita est in cognoscente; est autem in cognoscente secundum modum existendi naturæ cognoscentis: unde si modus existendi naturæ cognitæ superet modum existendi naturæ cognoscentis, ea non potest naturam rei cognitæ naturaliter in se suscipere, nec proinde eam naturaliter clarè cognoscere: porro modus existendi Dei proprius, & uni soli Deo conveniens, est quod ejus essentia sit ejus esse, seu existentia, unde in solo Deo non distin-

guitur essentia & esse. Solusque Deus necessario est, cæteris verò rebus accidit esse, seu contingenter sunt, ita ut possint non esse. Hinc ab אֱלֹהִים fuit, proprium Hebræis Dei nomen אֱלֹהִים derivatum est quod Græci per $\omega\nu$, *ens* seu *existens* exprimunt, Latini verò per, *Ego sum qui sum*, quòd esse solius Dei essentiam significet, & ita à solâ divinâ mente naturaliter cognosci clarè potest essentia Dei, juxtâ illud; Deum nemo vidit, nec videre potest, nec homo, nec Angelus, hoc est clarè cognoscere.

Angelica verò natura seu essentia existit separata ab omni subjecto seu materiâ, seu est per se subsistens, & sic à sola essentiâ per se subsistente, seu divina & angelica naturaliter clarè cognosci potest.

Humana verò natura, seu anima nostra existit in materiâ individuâ seu singulari, & ita solas eas naturas clarè cognoscit aut essentias quæ in

materiâ singulari sunt aut existunt; verum quia partim est immersa materiæ, partim verò emergit extrâ materiam, ut loquitur S. Thomas, ita duplici cognoscendi facultate prædita est, sensu scilicet & intellectu; quarum ille actus est & perfectio alicujus organi, ut visus, v. c. oculi, & ita solas naturas & essentias percipit eas, quæ sunt actus seu perfectiones alicujus individuae seu singularis materiæ, quatenus sunt illius actus; & ab eâ singulares fiunt, & hinc est quòd sensus sola singularia sensibilia percipiant & quidem quatenus singularia sunt: at verò mens licet in materiâ sit seu corpore, nullius tamen organi actus est aut perfectio, sed ab omni organo secreta & separabilis est, & ita percipit naturas quidem & essentias quæ in materiâ sunt, sed eas à materiâ separando, quæ principium singularitatis & individuatio-

nis est, ac universales eas per mentem efficiendo, & ita proprium humanæ mentis objectum, est natura seu essentia, subsistens in materiâ individuâ, sed ab eâ per mentem separata seu concepta sine tali materiâ.

D. Quare vis materiam, quam vocant signatam, esse principium singularitatis seu individuationis?

M. Quia est id. quo unum individuum distinguitur ab alio, seu ab aliis individuis ejusdem speciei, nihil enim est in iis præter materiam & formam; non differunt autem, nec distinguuntur ratione formæ, quæ una & eadem est, ergo necesse est ut distiguantur per materiam, quæ distincta est seu cujus portiones aut partes à se divisæ sunt per veram divisionem aut designationem; v. c. si sigillum habens leonem impressum, centies applices eodem modo uni parti materiæ, erit tan-

III.
Materia signata est principium singularitatis.

tum leo unus, si verò centum distinctis partibus applicetur, erunt centum leones, nec ulla potest afferri ratio hujus multiplicationis ac distinctionis numericæ, nisi à distinctis materiæ partibus; estque eadem planè ratio in omnibus formis in materiâ individuâ subsistentibus, non distinguitur v. c. equinitas Rhæbi & Bucephali, nec humanitas Petri & Pauli, nisi quia in distinctis materiæ partibus subsistunt.

Hinc duplicis generis accidentia in rebus naturalibus distinguuntur, alia quæ sequuntur formam, & propria sunt rebus omnibus ejusdem speciei; quæ in eadem formâ conveniunt: alia verò quæ sequuntur materiam, quæ communia dicuntur, quia materia sæpè communis est rebus, non tantum unius speciei, verum etiam diversi generis.

D. Verum si materia sit commu-

nis, quo modo per eam distingui possunt individua?

M. Non distinguuntur per materiam communem aut absolute sumptam; sed per materiam signatam, seu certas materiae communis partes aut portiones, quæ ideò signatæ dicuntur.

D. Quomodo ergo distinguuntur formæ per se subsistentes, quæ nulli materiae applicantur, nec applicari possunt ut Angeli.

IV.

Formæ
per se
subsistentes
specie
non solo
numero
distinguntur.

M. Eæ per se distinguuntur & quidem specie, non verò solo numero, quare quot sunt Angeli, tot sunt specie distincti, ita ut non possint esse duo Angeli ejusdem speciei.

D. Quomodo non possunt esse duo Angeli ejusdem speciei?

M. Non possunt, quia nihil in eis esset præter formam, in quâ conveniunt, materia verò nulla quâ distinguantur, hinc necesse prorsus

est eandem esse naturam, Patris, Filii & Spiritûs Sancti, minimè verò distinctam, quia divina per se subsistit natura, nec ulli materiæ seu subjecto applicatur seu applicabilis est.

Hinc quoque est quòd sensus sola singularia percipiant, quia vires organicæ sunt certis materiæ partibus applicatæ, quæque iis imprimuntur species propter eandem rationem, singulares sunt, & sola singularia repræsentant; contrà verò mens, cùm libera sit à materiâ, non potest res percipere nisi liberando eas à materiâ, & universales faciendo. Unde etiam patet, quòd nulla sit rei singularis quæ singularis definitio seu demonstratio, nulla prorsus idea.

V.
Singu-
larium
sensibi-
lium
nulla

D. At enim fiunt de sole ac de lunâ definitiones ac demonstrationes quæ tamen singularia sunt.

M. Fiunt quidem, sed non qua-

tenus singularia sunt, sed quatenus est de-
finitio,
nulla
demon-
stratio. secundum speciem spectantur, sicut fieri possent definitiones & demonstrationes de homine, licet unus tantum foret, sed tum homo secundum speciem spectaretur. Ita fiunt demonstrationes de triangulo descripto qui singularis est, sed non quâ singularis; sed secundum genus aut speciem spectato, & hoc quidem principium tantæ necessitatis est, ut illud vix quisquam ignorare possit, & aliquam habere scientiæ physicæ rationem, aliquod mentis & sensûs discrimen percipere; aut aliquam mentis ipsius & ejus immortalitatis notionem assequi, ut plenius alibi ostendemus.

Itaque proprium humanæ mentis objectum est natura, forma seu essentia subsistens quidem extrâ mentem in materiâ singulari, sed ab eâ separata, & in mentem recepta, quâ mens fit eidem naturæ extrâ

mentem existenti conformis.

VI.
Mens
non
errat
circa
propriū
objec-
tum.

Quemadmodum autem sensus nunquam errant circa proprium ob-
jectum servatis conditionibus, ut
superiùs diximus; quia ad illud per-
cipiendum ab authore naturæ sa-
pientissimo destinantur, qui nec fal-
lere nec falli potest, ita quoque
mens propter eandem rationem
nunquam errat circa proprium suum
objectum nisi per accidens, quando
v. c. definitionem unius applicat
alteri, aut aliquid addit definitioni,
quod cum eâ non cohaeret.

D. An mens ita tum vera est, ut
cognoscat veritatem?

M. Minimè verò. Sed est vera
ut sensus, non cognoscendo verita-
tem, habet quidem tum ideam
objecti, sed nondum cognoscit ve-
ritatem, ut sensus habet objecti
sui speciem non cognoscendo veri-
tatem.

CAPUT

C A P U T V.

*Quomodo mens humana cognoscit
veritatem.*

- I. Mens humana cognoscit veritatem
componendo & dividendo & quare.
II. Quandonam compositio & divisio
sunt verae, & quomodo id scitur.
III. Discrimen sensum inter & intel-
lectum. IV. Quare omnia rerum sensibi-
lium attributa non sunt necessaria?

D. **Q**uomodo mens humana
cognoscit veritatem?

M. Componendo & dividendo I. Mens
seu affirmando & negando, cum huma-
scilicet jungit prædicatum subiecto, na cog-
aut illud ab eo removet, asserendo noscit
v. c. homo est animal, homo non verita-
est lapis. tem
compo-
nendo
& divi-
dendo.

D. Quomodo istud sciemus?

M. Sciemus per voces quæ sunt
signa conceptuum nostrorum, quæ-

D

que non tantum exprimunt conceptus nostros, sed modum etiam quo concipimus; cum autem unam tantum vocem, v. c. homo profero, nec veritatem, nec falsitatem dico, imò nequidem, cum plures profero sine affirmatione, aut negatione, v. c. cum dico animal rationale, nihil affirmando vel negando, nec verum nec falsum dico, seu exprimo; similiter ergo mens nostra, nec verum nec falsum cognoscit, nisi componendo aut dividendo, sive conjungendo aut separando suas ideas.

D. Quare mens nostra non cognoscit veritatem nisi componendo aut dividendo?

M. Propter suam imperfectionem, divina enim mens statim omnia videt in semet-ipsâ; quia omnium rerum perfecta est causa exemplaris seu idea; angelicæ quoque mentes statim omnia percipiunt objecta sua: quia perfectas habent eo-

rum ideas, à divinis ideis, non à rebus ipsis derivatas; at verò humana mens, est intelligentiarum infima, nec statim habet aut acquirit suam perfectionem; sed paulatim procedendo à potentiâ ad actum, seu à statu imperfecto ad statum perfectum, ut omnes experimur. Quod & accidit rebus corporeis imperfectis, quæ quidem primò parvæ nascuntur & imperfectæ, ut videmus in plantis & animalibus; tum crescunt donec ad debitam perfectionem perveniant: ita mens nostra primò percipit rei naturalis quiditatem seu essentiam, tum ea quæ essentiam consequuntur accidentia propria; deinde accidentia communia, quæ materiam sequuntur, post-modum habitudines quas habet ad alias res. Et quidem semper componendo ac dividendo, aut ratiocinando, rem unam seu unam propositionem ex aliâ colligendo, donec

ad perfectam rei perveniat scientiam.

II.
Quandonam
compositio
& divisio
sunt
veræ,
& quo
modo
id sci-
tur.

D. Quandonam compositio & divisio sunt veræ?

M. Quoties sunt rebus ipsis conformes, seu quoties mens ea conjungit, quæ conjuncta sunt, aut separat ea quæ separata sunt seu secreta & distincta.

D. Quomodo sciam aut intelligam ego quandonam sunt conjuncta vel separata?

M. Partes propositionis seu compositionis & divisionis omnis duæ sunt; attributum seu prædicatum, quod sequitur verbum, est, & subiectum quod præcedit idem verbum: jam verò vel prædicatum potest convenire subiecto, vel non potest; si possit convenire, vocatur propositio possibilis, si non possit vocatur impossibilis.

D. Quâ tandem ratione sciam vel posse, vel non posse convenire?

M. Scies posse convenire, quoties nulla est oppositio seu repugnantia, inter attributum & subjectum; non posse, quoties est aliqua talis oppositio.

D. Quomodo sciam an sit vel non sit aliqua repugnantia?

M. Scies ex definitione subjecti & attributi, de quâ suo loco dicemus; v. c. circulus aureus est possibilis, quia nulla est repugnantia inter circulum & aurum. Sed id plenius ex definitione percipies.

D. Sed licet intelligam rem esse possibilem, non ideò scio rem esse; quomodo hoc sciam?

M. Scies si attributum habeat necessariam cum subjecto conjunctionem, tum enim semper est cum tali subjecto conjunctum.

D. Quâ ratione percipiam attributum habere talem cum subjecto connexionem?

M. Scies, si attributum includa-

tur in definitione subjecti, aut sub-
jectum in ratione attributi, ita ut
alterutrum sine altero non possit
concipi seu definiri, v. c. scio cir-
culum esse semper figuram; quia
figura includitur in definitione cir-
culi. Scio circulum esse rotundum,
quia rotundum includit in suâ ra-
tione circulum.

D. At si nec attributum inclu-
datur in ratione subjecti, nec sub-
jectum in ratione attributi, quo-
modo sciam tum propositionis veri-
tatem? v. c. quomodo sciam cir-
culum esse aureum, cum nec cir-
culus includat in suâ ratione aurum;
neque aurum in suâ ratione circu-
lum?

M. Id quidem per visum seu sen-
sum aliquem poteris fortassè cog-
noscere, per mentem verò seu in-
tellectum non poteris.

D. Quare per sensum & non per
mentem?

M. Quia objecta sensuum neces-
sariò agunt ; omnia quæ eis commu-
nicant , quæ suscipere possunt , & ita
visus omnia simul videt visibilia quæ
cum circulo sunt conjuncta , circu-
lum scilicet aureum , ejus magni-
tudinem , motum si sit in motu ,
seu quietem ; ut omnes norunt.

III.
Discri-
men
sensus
inter &
intel-
lectum.

At verò mens nihil videt nisi per
suas ideas , quæque in eis continen-
tur , & eas necessariò consequuntur.
v. c. ex ideâ hominis colligit quòd
sit capax virtutis , quia capax virtu-
tis necessariò sequitur rationem , quæ
est in hominis ideâ. Et hæ proposi-
tiones vocantur necessariae , quia at-
tributum earum habet necessariam
cum subiecto connexionem. Quæ
verò non habent talem connexio-
nem , vocantur contingentes , & ea-
rum nulla est , aut esse potest scien-
tia seu certa & evidens per mentem
cognitio.

D. Quare cum ideâ subiecti non

communicantur omnia, quæ sunt in subiecto intelligibilia, ut omnia quæ sunt visibilia in subiecto circuli, simul cum circuli specie communicantur?

M. Quia idea subiecti non communicatur menti à subiecto, sed ab ipso per mentem abstrahitur, eo modo quo universale à singulari per mentem separatur, ut jam diximus, & ita nihil videt nisi per hanc ideam in se receptam, ac primò quidem videt ea quæ in hac ideâ continentur, genus scilicet & differentiam seu totam speciem, tum ea quæ illam ideam necessariò consequuntur; reliqua verò quæ non sunt in ideâ subiecti non videt, quia ea non habent necessariam cum ideâ subiecti connexionem. v. c. mens observando, Petrum, Paulum, Jacobum, aliosque homines, vivere, sentire, ratiocinari, colligit hominem universè vivere, sentire ac ratiocinari.

Eaque habere non tantum omnia quæ necessaria sunt ad vitam, sensum & rationem, sed & ea quæ hæc necessario consequuntur, quæ verò neque in hominis ratione continentur, aut quæ homini universè sumpto non competunt, neque eum necessario consequuntur, non percipit mens.

D. Quare fit ut ea quæ in homine sunt omnia non habeant necessariam cum homine connexionem?

M. Quia homo sicut & alia corpora naturalia duabus constant partibus, materiâ scilicet & formâ, seu essentiâ & subjecto, humanitate nimirum, & certâ materiæ portione, quæ nullam habet cum humanitate connexionem, licet enim humanitas esse nequeat sine aliquâ materiæ portione, potest tamen esse sine hac vel illâ materiæ portione: unde cum eâ nullam habet necessariam connexionem, neque cum ejus acci-

I V.
Quare
omnia
sensibili-
um
attributa
non
sunt
necessaria.

dentibus, quare sine iis potest esse, at verò sine propriis suis accidentibus esse nequit humanitas, quia ea necessariò ipsam sequuntur. Sic v. c. in circulo aureo duæ sunt partes; circulus & aurum, quarum ille rationem habet formæ, nullamque habet necessariam cum auro connexionem, licet enim esse nequeat circulus sine subiecto, esse tamen potest sine auro. Unde circulus in quâcumque materiâ fuerit, sua semper habebit accidentia propria, semper erit rotundus, non tamen habebit semper accidentia auri.

D. Quare tamen fit ut accidentia auri tribuantur circulo, ita ut verè dicatur circulus est fulvus, & quidem in sensu identico, quemadmodum dicitur homo est albus?

M. Neque circulus absolutè & universè dicitur fulvus, neque homo universè dicitur albus, sed hic circulus aut certus in individuo circulus,

dicitur fulvus, aut certus in individuo homo dicitur albus, non ratione circuli neque ratione hominis, sed ratione subjecti in quo est circulus, aut cum quo est conjuncta humanitas. Et sensus fit identicus, quia sensus propositionis est, quòd idem subjectum quod habet circulum habet fulvedinem, & idem subjectum quod habet humanitatem habet & albedinem; seu quod idem est utriusque formæ subjectum, scilicet albedinis & humanitatis.

Ex his colliges veritatem exprimi per affirmationem aut negationem, cognosci verò in affirmatione per terminorum connexionem, in negatione verò per eorundem terminorum oppositionem.

Termini autem, seu subjectum & attributum propositionis vel per se & immediatè sine ullo medio connectuntur, vel opponuntur, ita ut intellectis terminis sine ullo alio,

eorum connexio seu oppositio percipiatur; & talium propositionum cognitio vocatur intelligentia, quæ circa principia seu propositiones immediatas versatur: vel ea connexio aut oppositio per aliquod medium necessarium fit & percipitur: & tum est sapientia seu scientia: sapientia quidem, si termini sint ita universales, ut ad omnia aut multa prima genera pertineant; si verò termini ad unum aliquod primum genus certum sint determinati, tum ad scientiam pertinent, de quibus sigillatim dicemus.

D. Nullæ-ne sunt aliæ virtutes mentis præter has tres?

M. Sunt quidem, prudentia & ars; sed eæ non præcisè referuntur ad veritatem de quâ nunc agimus; prudentia enim refertur ad actionem honestam, quam dirigit; & ars ad opus aliquod externum quod efficit: ut architectura ad domum. Cum
autem

autem consilium nostrum nunc sic tantum de cognitione veritatis dicere, de solis tribus prioribus agemus, ac primò quidem de intelligentiâ.

C A P U T VI.

De Intelligentiâ.

I. *Quid est intelligentia.* II. *Universalissima principia.* III. *Universalia.* IV. *Specialia.* V. *Primum simpliciter principium.*

D. **Q**uid est intelligentia? I. Quid
M. Est virtus mentis est in-
quæ circa prima principia versa- telli-
tur. gentia?

D. Quid vocas virtutem mentis?

M. Voco habitum qui semper tendit, aut inclinat ad veritatem.

D. Quid vocas prima principia?

M. Voco propositiones immediata-
tas, quæ statim perspectis terminis

E

intelliguntur, sine ullâ aliâ ratione seu medio.

D. Quot sunt eorum principiorum aut propositionum genera.

II.
Uni-
versa-
lissima
princi-
pia.

M. Tria sunt. Quædam sunt universalissima, quæ scilicet constant ex universalissimis terminis, qui ad omnia genera pertinent, eaque universalitate suâ superant, quales sunt termini, *ens*, *unum*, *verum*, *bonum*, &c. quorum cognitio ex metaphysicâ est repetenda & ad eam referendæ sunt propositiones ex iis constantes. Talis est hæc propositio, *Impossibile est idem simul esse & non esse.*

III.
Uni-
versa-
li prin-
cipia.

Secundi ordinis sunt eæ propositiones, quæ universales dici possunt, non ita tamen universales ac primæ, quæ non ad omnia quidem, sed ad plura pertinent genera, eaque prima. Talis est hæc propositio,

Totum est majus suâ parte.

Quæ quidem ad omnia pertinet ge-

nera in quibus est ratio totius ac partis ; cujus modi sunt numerus , magnitudo ac corpus naturale. In his enim generibus reperire licet rationem partis & totius ; & hæc quoque propositiones ad metaphysicam spectant considerationem ; quia sola plura primaque respicit genera ; cùm ceteræ disciplinæ seu scientiæ versentur singulæ circa unum tantum genus : *v. c.* Arithmetica circa numerum , Geometria circa magnitudinem finitam seu figuras ; Physica verò circa corpus naturale.

Tertiæ denique classis sunt ea , IV.
quæ specialia dici possunt, quæ qui- Specia-
dem sunt immediatæ propositiones : liaprin-
sed ad unum tantum genus perti- cipia.
nentes , & eæ sunt revocandæ ad eam scientiam ; quæ de illo genere agit , in quâ earum propositionum seu terminorum ex quibus constant , ratio est investiganda. Talis est hæc propositio ,

Omnis numerus est unitatum multitud.

v.
Primū
simpli-
citer
princi-
pium.

Quæ pertinet ad Arithmetica.

D. Quodnam est primum simpliciter principium?

M. *Impossibile est idem simul esse & non esse.* Quia habet omnes conditiones quæ desiderantur ad primum principium.

D. Quænam sunt illæ conditiones?

M. 1°. Ut sit universalissimum. 2°. Ut sit notissimum. 3°. Ut sit indemonstrabile. 4°. Ut sit demonstrativum cæterorum.

D. Quomodo est universalissimum?

M. Quia constat ex universalissimis terminis : nulli enim termini sunt universaliores *esse & non esse.*

D. Quomodo notissimum?

M. Quia constat ex terminis notissimis ; nihil quippe notius esse potest quàm *esse vel ; non esse* solent

enim termini, quò sunt universaliores, eò esse notiores.

D. Quomodo est indemonstrabile?

M. Quia nullum medium est inter *esse & non esse*. Omnis autem demonstratio fit per aliquod medium.

D. Quâ ratione est demonstrativum cæterarum propositionum seu rationum?

M. Quia est basis & fundamentum totius humanæ rationis. Ideò enim concessis præmissis concedenda est conclusio, quia secùs idem esset & non esset, *v. c.* si concedas omne animal esse vivens, & hominem omnem esse animal, concedas quoque necesse est, omnem hominem esse vivens. Secùs, foret vivens cum sit animal, & non foret secundum te, cum id neges, quod est impossibile.

CAPUT VII.

De hoc principio,

*Quidquid clarè distinctèque seu
evidenter percipitur,
Est verum seu certum.*

I. Non est primum principium. II. Nullo modo est principium. III. Est tamen verum.

D. **Q**uid censes de illo vulgato nunc in scholis nostris principio primo; *quidquid clarè distinctèque, seu evidenter percipitur, est verum aut certum.*

I. Non est primum principium.

M. Non est primum principium. Et ut clariùs pateat, ad hanc æquivalentem propositionem reducatur. Quoniam veritas non est nisi in propositione, ut demonstratum est. Omnis evidens propositio est vera vel certa. Primò moneo à multis,

hos terminos, *verum* & *certum*, confundi, quæ tamen non sunt confundenda, quia multa sunt vera ut pleraque contingentia, quæ tamen non sunt certa; si certum spectetur propriè, ut in scientiis spectari solet & debet, significat ea quæ non aliter se habere possunt. Et ita solis rebus aut propositionibus necessariis convenit: sic quando dicimus scientiam esse cognitionem certam, intelligimus eam esse invariabilem seu minimè mutari posse. Ut plenius dicemus agendo de scientiâ. Unde quæ sunt certa, sunt quidem vera, sed non vice versâ quæ sunt vera sunt semper certa, latiùs ergo patet verum quàm certum accuratè loquendo, malèque confunduntur.

Idem dico de his terminis *evidens* & *certum*. Multa quippe sunt certa quæ non sunt evidentiâ, ut patebit ex inferiùs mox dicendis.

D. Quæso nobis ostende quod non sit primum principium?

M. Existimo id ex solis dictis clarè satis patere iis, qui sciunt quid sit primum principium?

Illud debet esse universalissimum, seu universalissima propositio; universalissima porrò propositio constare debet ex universalissimis terminis. Termini autem hujus propositionis non sunt universalissimi, & ad omne genus entis pertinentes, sed ad unum genus cognitionis aut propositionis, cujus sunt attributa, spectantes. Evidentia enim, certitudo, & veritas ipsa ut hîc spectatur, sunt attributa cognitionis seu propositionis, ergo ad hoc & non aliud genus referri debent.

Sed neque notissima censerî potest hæc propositio, quia non constat ex terminis notissimis seu omnibus notis: pauci enim sciunt quid sit *certum*, & longè pauciores quid sit

evidens respectu mentis : multa quippe sunt certa & evidentia respectu sensuum, quæ non sunt talia respectu mentis, cum enim oculis video circulum aureum, id mihi certum & evidens est respectu visûs, sed non respectu mentis ; sed hæc sæpè confunduntur. Quid autem sit certum & evidens respectu mentis inferiùs dicemus : deinde primum principium esse debet indemonstrabile & demonstrativum cæterorum ; hæc autem propositio demonstrari potest, ut mox ostendemus, & nihil omninò demonstrat. Quare nullo modo censeri potest primum principium.

Verùm enim-verò hæc propositio, *quidquid evidenter percipitur est verum seu certum*, nequidem principium ullo modo dici potest. Omne siquidem principium est propositio prima & immediata, hæc autem propositio neque prima neque immediata censeri potest.

I I.
Nullo
modo
dici
potest
princi-
pium.

Non est prima, quia termini ejus non reciprocè convertuntur, *evidens* enim non reciprocè convertitur cum *vero* vel *certo*, multa quippe sunt vera & certa, quæ non sunt evidentiæ, non modò in fide, sed & in scientiis quoque naturalibus. Certum est esse Deum; id tamen omnibus etiam id certò credentibus non est evidens. Certum est hominis mentem esse immortalem multis etiam Philosophis, non tamen est evidens multis. Certum est omnem triangulum rectilineum habere tres angulos duobus rectis æquales, id tamen non est evidens. Omnes demùm conclusiones alicujus scientiæ certæ sunt, non tamen sunt evidentes antequam demonstrantur, ideò enim demonstrantur ut evidentes appareant; principia tamen earum esse debent evidentiæ seu per se nota quoad nos, secùs enim non possent eas demonstrare.

Nec sufficit ut principium omne sit propositio prima, sed debet esse immediata, multæ enim conclusiones sæpè sunt propositiones primæ; quia earum attributa primò & per se conveniunt earum subjectis ac reciprocè cum iis convertuntur. *v. c. homo est capax virtutis moralis*, est prima propositio, quia capax virtutis moralis primò & per se convenit homini, ac cum eo reciprocè convertitur, omnis enim homo est capax virtutis moralis, & omne capax virtutis moralis, est homo; quia solius est hominis passiones suas moderari. Imò verò omnis conclusio perfectæ & accuratæ demonstrationis debet esse prima, secùs non foret perfecta demonstratio, ut patebit ex dicendis de demonstratione.

Sed hæc propositio, *quidquid evidenter percipitur est verum vel certum*, non est immediata, quia certa potest afferri ratio, cur evidens pro-

positio sit certa, proindeque hæc propositio demonstrari potest.

Certum enim id omne dicitur, quod variari seu mutari minimè potest, omne porrò quod necessarium est, nec variari nec mutari potest; unde necessarium omne certum est. Igitur omnis propositio necessaria est certa.

Sed omnis evidens propositio est necessaria: necessaria enim propositio est ea, cujus attributum per se convenit subiecto, ita ut in ejus ratione includatur, aut subiectum in suâ ratione includat. Sed evidentis omnis propositionis attributum vel includitur in subiecti ratione, vel illud in suâ includit. Igitur omnis evidens propositio est necessaria ac proinde certa, ut ex dictis cap. 5.º. plenius patet.

Hi tres termini, *verum*, *certum*, *evidens*, se habent ut *vivens*, *animal*, *homo*; omnis homo est animal,

mal, & animal omne vivens, sed non vice versâ, omne vivens est animal, neque omne animal est homo. Omnis igitur evidens propositio est necessaria, omnis necessaria seu certa est vera; sed non vice versâ, omnis vera est necessaria, neque omnis necessaria, evidens. Evidens enim propositio addit aliquid necessariæ, quòd scilicet sit nota per se quoad nos, cum necessaria sit tantum nota quoad se. *v. c. Deus est*, est necessaria propositio, nota quoad se, quia attributum scilicet *esse* convenit ejus subjecto scilicet *Deo* per se, quia ad ejus essentiam pertinet, unde nota est quoad se, sed non quoad nos; quia nos non novimus quid sit Deus.

At verò hæc propositio, *circulus est figura*, est nota non tantum quoad se, sed quoad nos; quia novimus quid sit circulus & quid figura. Igitur ut propositio sit evidens, debet esse nota non tantum quoad se, sed

etiam quoad nos, quod fieri nequit nisi sciamus quiditatem seu rationem & definitionem tum subiecti tum attributi, sed præsertim subiecti, à cuius notione plerumque dependet notio attributi. Ita v. c. hæc propositio, *anima humana est immortalis*, si modò sumatur pro mente, ut sumi solet ab omnibus ferè Christianis, est necessaria seu nota quoad se, quia immortalitas habet necessariam connexionem cum mente, sed non est nota quoad nos, quia pauci aut ferè nulli sciunt quid sit anima aut quid sit mens.

III.
Est vera.

Itaque hæc propositio, *quidquid evidenter percipitur est verum aut certum*, est vera quidem, sed non modò non est primum principium, sed ne quidem ullo modo principium censerì potest. Quotquot igitur eam propositionem, tanquam primum principium agnoverunt, Logicæ satis rudes sunt & ignari.

Quod minimè miror; paucissimos enim reperies verè Logicæ gnaros, quam tamen plerique ad alias scientias acquirendas necessariam esse volunt non immeritò. Hinc paucissimi verè scientes occurrunt, quia longè paucissimi Logicam callent, quam verè vocaveris scientiam scientiarum, aut veram sciendi artem.

C A P U T V I I I.

De Sapientiâ.

I. *Quid est sapientia?* II. *Quid ens reale, quid ens rationis?* III. *Divisio entis realis.* IV. *Divisio substantiæ.* V. *Divisio accidentis.* VI. *De abstractione formæ à materiâ.*

QUod discrimen statuis inter I. *Quid sapientiam propriè dictam,* ^{est sapientia.} & scientiam?

M. Sapientia propriè dicta virtus quædam mentis est, quæ versatur

circà res universalissimas & altissimas abstractas ab omni materiâ: scientia verò versatur circà res inferioris ordinis, & unius tantùm generis.

D. Quid vocas res unius generis?

M. Voco eas quæ ex iisdem primis principiis constant, aut iis continentur. Sic omnes numeri sunt unius generis, quia constant ex unitate primisque numeris, dualitate scilicet ac trinitate. Sic omnes figuræ sunt unius generis, quia puncto, lineâ, & superficie continentur. Sic omnia corpora naturalia sunt unius generis; quia materiâ constant & formâ.

D. Quid vocas res universalissimas?

M. Sunt eæ quæ ad omnia genera aut saltem ad plura pertinent, quæ enim sunt unius tantùm generis, eæ ad unam aliquam specialem scientiam pertinent.

D. Quid vocas res altissimas?

M. Voco eas quæ mentem humanam superant & abstractæ sunt ab omni materiâ, quarum aliquam, licet imperfectam, cognitionem habet mens humana, quales sunt Deus & Angeli.

D. Quænam sunt res universalissimæ?

M. Sunt ens reale universè sumptum, ejus affectiones seu proprietates, unitas, veritas, bonitas, &c. ejus principia & causæ, si quæ sint, ac ejus species seu quasi species.

D. Quid vocas ens reale?

M. Ens reale dicitur, quod in rerum universitate & extrâ mentem existit, qualis est Deus, (si tamen dici debet ens, quia est super omne ens, cum sit ipsum esse) quales sunt Angeli, quales sunt res omnes naturales, & opponitur enti rationis.

II.

Quid
ens rea-
le, quid
ens ra-
tionis?

D. Quid vocas ens rationis?

M. Quod habet esse tantum in

mente seu ratione. Non tamen est chimæra, ut multi sibi fingunt, sed accidentia quædam logica, quæ res consequuntur, quatenus à mente sunt apprehensæ, & à nonnullis secundæ intentiones logicæ vocantur, quia reflexionem mentis circa res à se conceptas sequuntur. Et ordo rationis non raro vocantur. Sic quando mens asserit hominem esse animal, reflectendo observat *hominem* esse *speciem*, *animal* esse *genus*, *hominem* esse *subiectum*, *animal* esse *prædicatum*. τὸ species, τὸ genus, τὸ subiectum, τὸ prædicatum sunt entia rationis. Seu secundæ intentiones logicæ, quæ exprimunt ordinem quem res habent ad se invicem in mente. Et hæc propriè à Logicâ considerantur, ejus proprium objectum à nonnullis non sine ratione dicuntur: non enim considerat operationes mentis per se, seu quatenus ab animâ procedunt, sic

enim spectatæ ad scientiam de anima pertinent. Sed considerat eas seu potius res ab iis & in iis perceptas, quatenus his intentionibus, aut huic ordini logico sunt subiectæ.

D. Quomodo dividis ens reale? III.

M. In substantiam quæ per se subsistit, & accidens quod subsistit per substantiam. Divisio
entis
realis.

D. Quid vocas per se subsistere?

M. Subsistere per se dicitur quod subsistit independententer ab alio tanquam à subiecto. Sic paries subsistit per se, albedo verò per parietem.

D. Quotuplex ex substantia?

M. Substantia non uno modo dicitur in rebus præsertim naturalibus. Alio enim modo materia; alio forma, alio totum substantia dicitur; materia quia subiectum est ex quo res fiunt; forma quia est ipsa rerum essentia; totum verò maximè propriè in rebus naturalibus substantia dicitur, quasi res per se subsistens,

materia enim non subsistit per se, neque forma naturalis, solam præter hominis mentem, ut in physicis dicetur.

In rebus verò ab omni materiâ seu subjecto separatis, substantia est ipsa rei essentia per se subsistens, unde cum in his nullum sit subjectum, idem est nomen concretum & abstractum, idem Deus & divinitas, Angelus & angelitas; at verò in rebus physicis non est idem nomen concretum & abstractum, Homo v. c. & humanitas.

D. Quare in rebus ab omni materiâ separatis idem significat abstractum & concretum, idem est divinitas & Deus. Non verò in rebus physicis idem est homo & humanitas?

M. Quia res illæ abstractæ ab omni materiâ seu subjecto, sunt formæ per se subsistentes; ac proinde per se substantiæ sunt. At verò essen-

tiae physicae qualis est humanitas, non per se subsistunt separatae ab omni subiecto; sed semper cum aliquo subiecto conjunctae sunt, non quasi subsistant per illud subiectum, sed quòd potius subsistat per illas. De his plenius alibi.

D. Quomodo dividitur substantia propriè dicta, & per se subsistens universè sumpta?

M. Dividitur in substantiam seu I V.
essentiam puram, quæ nullum inclu- Divisio
dit subiectum, & substantiam im- substan-
puram, quæ aliquam includit ma- tia.
teriam seu subiectum, de quâ divi-
sione plura dicemus alibi. Hic tan-
tùm observabimus puram ad sa-
pientiae seu Metaphysicae considera-
tionem pertinere, impuram ad Phy-
sicam.

D. Quotuplex est illa pura essen-
tia?

M. Ea duplex est, alia purissima,
quæ est ipsum esse per se subsistens,

ab omni compositione prorsus immune, & unus est solusque Deus; alia verò pura, quæ quidem nullam includit materiam, sed est essentia per se subsistens, participata tamen à primâ, seu particeps facta esse à primâ; unde in eâ distinguitur essentia ab esse, tales sunt omnes mentes quas spiritus vocamus; quarum consideratio pertinet ad Metaphysicam, unam præter hominis mentem, quæ considerationis est physicae, quia dicit ordinem ad materiam seu corpus cum quo constituit hominem, qui species quædam est corporis naturalis.

D. Quid est accidens?

v. M. Est ens inhærens seu dependens ab alio tanquam à subiecto per quod existat, ut albedo respectu parietis, Grammatica respectu mentis.

De accidente, & ejus divisione.

D. Quotuplex est?

M. Ejus genera vulgò novem recensentur; sed quæ pleraque magis

ad res corporeas quàm spirituales aut abstractas ab omni materiâ pertinent, & habitâ corporum ratione ad certa genera revocata sunt, licet quædam eorum ad res spirituales pertineant.

D. Quænam sunt?

M. Quantitas, qualitas, relata, actio, passio, ubi, quando, situs & habere. De solis abstractis à materiâ, aut iis quæ rebus à materiâ prorsus abstractis aliquo modo conveniunt differit Metaphysica; cætera Physicæ & aliis etiam disciplinis considerata mittit.

D. Quid vocas essentias seu formas abstractas à materiâ?

M. Sunt eæ quæ aut nullam omninò, aut saltem aliquam materiam non includunt in suâ definitione seu conceptu.

D. Quotuplex est ea abstractio?

M. Ea triplex est. Prima est à materiâ singulari & non sensibili.

VI.
De abstractione à materiâ.

Secunda est à materiâ singulari & sensibili, non tamen intelligibili. Tertia est ab omni materiâ singulari, sensibili & intelligibili.

D. Quænam sunt formæ abstractæ à materiâ tantum singulari & non sensibili?

M. Sunt formæ seu essentiæ physicae, quales sunt humanitas, equinitas & similes, quæ in suâ definitione seu conceptu non includunt hanc aut illam singularem materiam. *v. c.* humanitas non includit in suo conceptu has & illas carnes, idem dicas de equinitate.

D. Quare dicis eas non abstrahe-
re à materiâ sensibili?

M. Quia sensibilem aliquam in suâ definitione includunt materiam, eam scilicet quæ necessaria sit ad earum functiones, sic humanitas includit in suâ ratione ossa, carnes, nervos, &c. quia sine his ejus functiones fieri nequeunt, à quibus to-
tam

tam suam desumit rationem. Non tamen includit hæc aut illa ossa determinata seu singularia, quia sine iis possunt ejus functiones fieri, licet non sine ossibus.

D. Quænam sunt formæ abstractæ à materiâ singulari simul & sensibili, non tamen intelligibili?

M. Sunt Mathematicæ formæ puræ, numerus scilicet, & figuræ quæ concipi possunt non modò sine singulari, verùm etiam sine sensibili materiâ. *v. c.* trinitas & quaternitas plenè perfectèque concipi possunt & definiri sine omni non modò singulari, verùm etiam sensibili materiâ. *v. c.* sine calore, sine colore & aliis affectionibus sensibilibus quas non includunt in suâ ratione, quod idem dicas de triangulo seu quadrangulo.

D. Quare non abstrahunt à materiâ intelligibili?

M. Quia semper dicunt ordinem ad aliquod subjectum. Omnis enim

numerus materialis dicit ordinem ad res numeratas, quæ fiunt per divisionem continui, ex quâ oritur numerus. Simili modo figuræ omnes sunt extremitates alicujus magnitudinis, ad quam ordinem dicunt.

D. Quæ tandem sunt formæ abstractæ ab omni planè materiâ?

M. Sunt omnes formæ Metaphysicæ puræ seu essentiæ per se subsistentes, quæ nullam non modò materiam in suâ ratione includunt, sed ne quidem ullum ordinem per se dicunt ad materiam, quales sunt divina & angelicæ mentes; non verò humana mens: quia licet nullam includat in suâ ratione materiam, ac possit per se sine ullâ materiâ, seu subjecto subsistere, dicit tamen ordinem ad materiam, ad suum scilicet corpus, & ad objecta sua, quæ sunt rerum materialium essentiæ, quatenùs tamen à materiâ separatæ, ut superiùs exposuimus.

CAPUT IX.

De Scientiâ.

I. *Quid est habitus scientiæ?* II. *Quid actus.*
III. *Quid certitudo scientiæ?* IV. *Quid*
evidentia scientiæ.

D. **Q**uid est scientiæ habitus? I. *Quid*
M. Est virtus mentis, ^{est ha-}
quæ circâ res unius certi alicujus ^{birus}
generis versatur, per principia pro- ^{scien-}
priaque causas cognoscendas, quæ- ^{tiæ.}
que ad ultimas species illius generis
sefe extendit.

D. Quare dicitur circâ res unius
certi alicujus generis?

M. Ut à sapientiâ seu Metaphy-
ficâ, quæ prima philosophia & scien-
tia generalis nonnunquam vocatur,
distinguat; omnis enim scientia
propriè dicta considerat res unius
tantum generis, ut superius diximus.

D. Quare dicitur per principia

causasque proprias?

M. Ut tùm ab intelligentiâ , tùm à sapientiâ distinguatur ; ab intelligentiâ quidem , quæ non discurret ; neque principia rei propria , neque causas proprias considerat. A sapientiâ verò quæ causas generales intuetur , non autem proprias.

D. Quare dicis , quæ ad ultimas species illius generis sese extendit ?

M. Quia scientia plena & perfecta debet considerare omnes infimas etiam species sui generis.

D. Quare non individua ?

M. Quia de individuis sensibilibus nulla est scientia , ut jam diximus , quia nullam habent in mente ideam distinctam ab ideâ speciei , non alia est in mente idea Petri seu Pauli quam hominis , neque quidquam aliud in Petro seu Paulo est præter humanitatem & certam materiæ singularis portionem , quæ est principium individuationis , à quo mens

abstrahit, quæ rei sensilis essentiam universè sumptam considerat, eam abstrahendo à materiâ singulari, ut jam ostendimus.

D. Quomodo scientiæ habitus cognoscitur?

M. Omnis habitus omnisque potentia cognoscitur per suum actum, & actus omnis per suum objectum. II.
De
scien-
tiæ
actu.

D. Quare?

M. Quia omnis habitus omnisque potentia perficitur per suum actum, omnisque actus per suum objectum; sic visus à visione perficitur, & ipsa visio ab objecto, quod ei dat speciem & formam, visus enim refertur & ordinatur ad visionem, & visio ad objectum.

D. Quid est scientiæ actus?

M. Est cognitio certa & evidens rei necessariæ per proprias causas, quæ demonstratione comparatur.

D. Quid est cognitio talis?

M. Est viva & vera rei repræsentatio in mente.

D. Quare dicis in mente?

M. Quia viva rei repræsentatio potest etiam fieri in sensibus tum externis tum internis; sed ea semper est rei singularis & sensilis. At verò ea quæ fit in mente, est rei universalis; eaque sola scientiæ nomen meretur.

III. D. Quare dicitur certa?
De certitudi-
ne sciē-
tiæ. M. Quia verè sciens debet esse imperturbabilis in suâ scientiâ. Non esset autem, nisi cognitio ejus esset certa.

D. Quid est illa certitudo?

M. Est firmitas, stabilitas, & imperturbabilitas quædam.

D. Quotuplex est?

M. Triplex est, certitudo subjecti, certitudo objecti, & certitudo motivi.

D. Quid est certitudo subjecti?

M. Est firma mentis adhæsiō rei cognitæ, non ex pertinaciâ sed ex objecti certitudine profecta, quando

mens certè & evidenter rem cognoscit invariabilem & necessariam.

D. Quid est certitudo objecti?

M. Est necessitas & immutabilitas ejus, seu certa & necessaria connectio effectûs cum suâ causâ seu attributi cum suo subjecto, ut ab eo divelli minimè possit, & hæc certitudo in scientiâ oritur ex certitudine motivi.

D. Quid est certitudo motivi?

M. Est ratio & causa cur effectus cum suâ causâ, aut attributum cum suo subjecto necessariam habet connexionem.

D. Da nobis triplicis hujus certitudinis exempla, ut faciliùs & meliùs eas percipiamus & distinguamus?

M. Mens mea firmissimè tenet hominem esse capacem virtutis, adest certitudo subjecti, si quæras unde proficiscitur illa mentis firmitas? Respondeo, quia mihi certò

constat esse necessariam connexionem inter hominem & capacem virtutis, adest objecti certitudo. Si verò quæras motivum hujus certitudinis seu necessariæ connexionis attributum cum subiecto, causam dicam: quia homo est capax rationis. Quidquid enim est capax rationis est capax virtutis moralis, quæ est habitus inclinans hominem ad agendum secundum rectam rationem.

D. Nulla ne alia est certitudo præter has tres?

M. Est alia triplex certitudo in scholis satis celebrata, scilicet Moralis, Physica & Metaphysica.

D. Quænam est Moralis illa certitudo?

M. Est ea, quæ sæpiùs aut ut plurimum esse solet. Hoc modo dicimus certum esse matres omnes suos filios amare. Licet enim id semper non accidat, est tamen sæpiusque certum.

D. Quid est Physica certitudo?

M. Est ea quâ secundum naturæ ordinem res certæ sunt. Sic dicimus esse certum Solem cras oriturum; quia posito naturæ ordine Sol cras orietur. Hunc tamen Deus vel impedire vel immutare potest. Sic jubente Josue Sol stetit. Sic, volente Ezechia, idem Sol retrocessit.

D. Quid est Metaphysica certitudo?

M. Est ea, quâ res ita certæ sunt, ut ne divinitus quidem variari aut immutari possint. Qualis est certitudo circulum esse rotundum; qualis est certitudo connexionis essentiae omnis cum suis attributis propriis seu proprietatibus secundum radicem aut aptitudinem spectatis: talis est connexio hominis cum capacitate virtutis, ita ut esse nequeat homo sine tali capacitate secundum aptitudinem spectatâ, ne quidem divinitus: licet ejus actus possit impediri. Sic ignis aptus est ad comburendum, li-

cet ejus actus possit impediri, ut accidit in fornace Babylonica. Hæc autem certitudo in omni scientiâ perfectâ desideratur.

IV.
De evidentiâ
scientiæ.

D. Quid est cognitio evidens hîc spectata?

M. Est evidens connexio aut separatio terminorum alicujus propositionis, aut evidens connexio conclusionis cûm præmissis.

D. Quænam est evidens connexio aut separatio terminorum in propositione?

M. Evidens connexio terminorum seu subjecti & attributi propositionis, est quando vel attributum includitur in ratione subjecti, vel subjectum in ratione attributi, ita ut nobis notum sit quid sit subjectum & quid attributum. *v. c.* Hæc propositio, *homo est animal*, evidens est, quia animal includitur in ratione hominis, & nos scimus quid sit homo, & quid sit animal. Simili modo

quia novimus quid sit circulus & quid sit figura, novimus evidenter circulum esse figuram; verbo dicam est propositio nota per se quoad nos.

Evidens similiter est separatio inter terminos propositionis, quando est manifesta repugnantia inter terminos nobis notos. Sic novimus evidenter hominem non esse lapidem, circulum non esse triangulum: quia de ratione hominis est quòd sit animatum corpus, de ratione lapidis, quòd sit inanime corpus, de ratione circuli est quòd unâ lineâ contineatur, quæ æqualiter undique distet à centro seu puncto medio; de ratione verò trianguli est quòd non unâ sed tribus lineis contineatur, quarum nulla semper æqualiter distet à centro.

D. An hæc propositio *Deus est* ita evidens dici possit, ut demonstratione non indigeat?

M. Est quidem nota per se, quia

esse includitur in ratione Dei, seu potius est ipsa ejus essentia; sed non est nota quoad nos; quia non scimus quid sit Deus. Unde non est evidens per se hæc propositio, seu nota per se quoad nos ante demonstrationem.

D. Quandonam conclusio est evidens?

M. Quando evidenter continetur in præmissis, aut eas evidenter continet. *v. c.* cum dico omne animal est vivens & omnis homo est animal evidenter video hanc conclusionem. Igitur *omnis homo est vivens*, quia evidenter continetur in præmissis.

D. Quid intelligis quando dicis scientiam esse cognitionem rei necessariæ.

M. Per rem necessariam intelligo effectum necessarium qui habet necessariam connexionem cum suâ causâ eamque necessariò sequitur, seu veritatem necessariam quæ sita est

est in necessariâ connexionē attributi proprii cum subiecto suo, & propositio necessaria dicitur. De quâ diximus.

D. Quare dicis quæ demonstratione comparatur?

M. Quia scientia strictè sumpta verus est demonstrationis effectus, seu demonstratio parit scientiam; unde dicitur habitus demonstrativus. Quocirca nunc de demonstratione dicendum.

D. Quare dicis per proprias causas?

M. Quia non sufficit verè scienti generalem aut universalem causam afferre, sed debet assignare propriam.



CAPUT X.

De Demonstratione.

I. *Quid est Syllogismus.* II. *Quid Demonstratio.* III. *Demonstrationis exemplum?*

I. De Syllogismo. D. **Q**uid est demonstratio?
M. Est Syllogismus perfectus.

D. Quid est Syllogismus?

M. Est perfecta ratiocinandi forma.

D. Quid vocas ratiocinandi formam?

M. Est modus seu methodus, quâ una propositio ex aliâ seu aliis colligitur.

D. Quare vocas Syllogismum perfectam ratiocinandi formam?

M. Quia perfectè ostendit connectionem, aut separationem terminorum alicujus propositionis per me-

dium terminum, & quidem perfectiùs quam aliqua alia ratiocinandi forma. Scopus enim ratiocinationis est, aut esse debet ostendere connexionem aut separationem terminorum alicujus propositionis, id autem melius fit per medium aliquem terminum, illum conjungendo vel separando cum extremis, priusquam ipsa extrema seu termini propositionis per se conjungantur, aut à se invicem separentur, quàm alio quovis modo.

D. Sunt ne aliæ ratiocinandi formæ præter Syllogismum?

M. Sunt & quidem multæ. Exemplum v. c. inductio, enthymema &c. Sed eæ ad præsens nostrum institutum non pertinent, qui ad perfectam in animo scientiam formandam tendimus, quâ brevitate & perspicuitate possumus.

D. Quid tandem est hæc perfecta ratiocinandi forma, quam

Syllogismum vocamus?

M. est oratio constans ex tribus terminis in duabus propositionibus quæ præmissæ vocantur, ita dispositis, ut tertia ex iis colligatur aut inferatur propositio, quæ conclusio vocatur.

D. Quinam sunt illi termini?

M. Majus extremum, minus extremum & medium.

D. Quid est majus extremum?

M. Est attributum conclusionis directæ.

D. Quid est conclusio directæ?

M. Est ea in quâ servatur naturalis ordo terminorum.

D. Quis est ille ordo?

M. Est is quò superius seu universalius prædicatur de inferiori seu minùs universalis, v. c. animal de homine, aut attributum de subiecto; rotundus, v. c. de circulo, sic naturaliter dicitur homo est animal, non autem animal est homo. Naturali-

ter dicitur circulus est rotundus;
non ita rotundus est circulus.

D. Quid est minus extremum?

M. Est subjectum conclusionis directæ, ita homo est subjectum respectu animalis, & circulus respectu rotundi.

D. Quid est medium?

M. Est is terminus qui medium tenet locum inter majus & minus extremum in Syllogismo perfecto, qualem nunc quærimus, ita ut subjiçatur majori extremo in primâ propositione seu majore, & prædicetur de minori extremo in secundâ propositione seu minore: sic animal est medium inter vivens & hominem in hoc Syllogismo,

Omne animal est vivens,

omnis homo est animal,

igitur omnis homo est vivens.

D. Quid præstat medium?

M. Conjungit extrema conclusionis in affirmatione; ut patet in su-

periori Syllogismo; eadem verò extrema separat in negatione. v. c.

*Nullus lapis est vivens,
omne marmor est lapis,
ergo nullum marmor est vivens.*

D. Quid est demonstratio?

II. De
demon-
stratio-
ne.

M. Demonstratio est Syllogismus omninò perfectus, constans præmissis veris, necessariis, propriis, primis, immediatis, prioribus, notioribus, causisque conclusionis.

D. Quandonam sunt veræ?

M. Quando sunt conformes rebus quas enunciant, seu quando conjungunt ea quæ sunt extrà mentem conjuncta, aut separant ea quæ sunt separata. v. c. *homo est animal*, est vera quia hæc extrema, *homo* & *animal* extrà mentem sunt conjuncta: similiter, *homo non est lapis*, est vera quia hæc extrema extra mentem sunt separata, ut alibi diximus.

D. Quando sunt necessariae?

M. Quando extrema necessariam

habent connexionem, seu quando extrema per se sunt conjuncta, non verò per subiectum. v. c. circulus est rotundus per se, non verò per subiectum, at verò circulus est aureus ratione subiecti, non per se. Unde non semper est aureus, sed semper est rotundus, unde propositiones necessariae dicuntur sempiternae veritatis, quia semper verae sunt, aliae non item.

D. Quandonam sunt propriae?

M. Quando sunt ex eodem genere & eadem scientiâ petita, non verò ex aliis, sive generibus sive scientiis desumpta, seu quando attributum aliquo modo propriè convenit subiecto, ita animal rationale ad idem genus ac eandem scientiam pertinet, ac capax virtutis.

D. Quando sunt primae?

M. Quando primò & per se attributum ita convenit subiecto, ut cum eo reciprocè convertatur. Sic

homo est capax virtutis, est propositio prima, quia *capax virtutis* primò & per se convenit *homini*, & cum eò reciprocè convertitur, omnis enim homo est capax virtutis, & omne capax virtutis moralis est homo.

D. Quando sunt immediatæ?

M. Quando attributum sine ullo medio seu ratione convenit subiecto. Sic hæc propositio, *homo est particeps rationis*, est immediata; quia *particeps rationis* sine ullo medio convenit *homini*, nulla enim est ratio, cur homo sit particeps rationis, nisi quia est homo.

D. Quare priores dicuntur?

M. Quia naturâ, ordine & cognitione præcedere debent conclusionem, ut causæ effectum.

D. Quare notiores esse debent?

M. Quia per eas innotescit conclusio, ut colores per lumen.

D. Quare denique sunt causæ?

M. Quia per eas conclusio generatur.

D. Quare demonstratio perfectus vocatur Syllogismus.

M. Quia perfectiùs Syllogismi scopum attingit. Syllogismi enim scopus est ostendere connexionem aut separationem extremorum in conclusione. Id autem perfectè facit demonstratio.

D. Video demonstrationem rem esse planè difficilem, quâ tandem ratione fieri vel institui debet.

M. Omnes res perfectæ solent esse difficiles, demonstratio autem perfectum est opus rationis, & veluti specimen humanæ mentis, quæ visa est ita difficilis Gassendo magni nominis Philosopho, ut existimaret eam esse prorsùs impossibilem, secundùm has omnes conditiones quas exposuimus, eam tamen esse possibilem demonstrabimus.

Præcipua porrò difficultas est in

investigando primo subiecto attributi demonstrandi ejusque invenienda definitione, in quâ reperietur & attributi definitio, & hæc utraque definitio sumi debet loco medii, quod subjici debet majori extremo, & de minori prædicari, licet sola subiecti sæpè sufficiat definitio. Sit hæc propositio demonstranda,

III. De-
mon-
stratio-
nis exē-
plum.

Omnis homo est capax virtutis moralis Homo est primum hujus attributi, *capax virtutis* subiectum, quia primò & per se convenit *homini*, & cum eò reciprocè convertitur. Hominis definitio est *animal rationis particeps*, in quâ continetur definitio capacis virtutis seu posse sequi rectam in agendo rationem, quisquis enim potest sequi rectam in agendo rationem, is est capax virtutis moralis, quæ semper inclinatur ad sequendam rectam rationem. Sumatur utraque definitio loco medii, subjiciatur primo majori extremo,

deinde prædicetur de minori hoc modo.

Omne animal particeps rationis, quod potest sequi rectam in agendo rationem, est capax virtutis moralis.

Omnis homo est animal particeps rationis, quod potest sequi rectam in agendo rationem.

Igitur omnis homo est capax virtutis moralis.

Expende nunc singulas præmissas, & videbis eas esse veras, necessarias, proprias, primas, immediatas, priores, notiores, causasque conclusionis

Sunt veræ, ut per se patet, quia earum attributa conveniunt earum subjectis : *capax enim virtutis convenit animali participi rationis, quod potest sequi rectam in agendo rationem; similiter attributum minoris scilicet animal rationis particeps quod potest sequi rectam in agendo rationem, sine controversiâ conve-*

nit *homini*. Utraque igitur est vera.

Utraque quoque est necessaria, quia attributum utriusque propositionis per se convenit earum subiectis. Primo enim *capax virtutis* convenit *homini* & non ratione alterius seu subiecti, quia necessario sequitur hominem. Sed & attributum minoris scilicet *animal particeps rationis* per se convenit *homini*, ut per se patet; ergo utraque propositio est necessaria.

Utraque quoque est propria; quia *animal capax rationis* & *capax virtutis* sunt ejusdem generis, ac ad eandem scientiam pertinent, ut mox dixi.

Utraque est prima, quia utriusque attributum primò & per se convenit earum subiectis, & cum iis reciprocè convertuntur, *capax* enim *virtutis moralis* primò & per se convenit *animali participi rationis*, & cum eo reciprocè convertitur. Omne siquidem animal particeps rationis, est

est capax virtutis moralis, & omne capax virtutis moralis est animal rationis particeps, &c. Similiter *animal rationis particeps* quod potest in agendo rectam sequi rationem, convenit *homini* primò, qui est subjectum ejus, cum sit ejus definitio, ut per se patet.

Utraque est immediata, major quidem; quia nulla est ratio *capacis virtutis moralis* nisi animal rationis particeps quod potest rectam in agendo sequi rationem. Minor quoque est immediata: quia attributum est definitio subjecti, scilicet *animal rationis particeps* quod est attributum propositionis, est definitio subjecti scilicet *hominis*.

Sunt priores naturâ, ordine, cognitione, quia causæ sunt conclusionis quæ eam naturâ, ordine & cognitione præcedere debent: *capax enim virtutis* procedit à ratione ut effectus necessariò consequens causam.

Sunt ambæ notiores, quia per eas innotescit conclusio, ac denique ejus causæ sunt quia eam generant; veram, & propriam ejus causam continent, *animal* enim *particeps rationis* est vera causa *capacis virtutis*, & sic patet fieri posse perfectam & accuratam demonstrationem.

Verùm quia tota aut certè præcipua difficultas demonstrationis occurrat in reperiendo primo attributi demonstrandi subjecto, ejusque investigandâ definitione, de iis nunc agendum.



CAPUT XI.

De primo subiecto

Demonstrationis.

- I. Quid & quotuplex primum subiectum.
- II. Primum est univocum tum secundum nomen, tum secundum rationem.
- III. Secundum est univocum secundum rationem tantum.
- IV. Tertium est analogum.
- V. Quid de æquivocis agendum.
- VI. Quomodo procedendum?

D. **Q**uid est primum subiectum demonstrationis?

M. Primum subiectum est illud cui primò & per se convenit aliquod attributum, ita ut reciprocè cum eo convertatur. Sic homo est primum subiectum *capacitatis virtutis moralis*. Omne siquidem animal capax virtutis moralis est homo, & vice versâ omnis homo est capax virtutis moralis.

I. Quid & quotuplex est primum subiectum.

D. Quotuplex est illud primum subiectum?

II. Univo-
cum se-
cundū
nomen
& ratio-
nem. M. Triplex est seu tribus modis
& indiciis detegitur. Primum est
quod habet unum commune nomen
& rationem communem unam huic
nomini respondentem, quod uni-
vorum propriè dicitur tum ratione
nominis, tum ratione significationis:
sic *homo* commune nomen habet
omnibus hominibus, & rationem
communem unam huic nomini re-
spondentem: scilicet *animal rationis*
particeps, & hoc primum subiectum
faciliùs reperitur.

III. Secun-
dum
est uni-
vorum
secun-
dum ra-
tionem
tantum. Secundum est, quod non habet
unum commune nomen, licet ha-
beat unam communem rationem,
& tum loco nominis assumi debet
hæc communis ratio. Sic *rotundi*
primum subiectum non habet unum
commune nomen, convenit enim
circulo & globo figuris specie diffe-
rentibus, quibus ratione hujus attri-

buti non convenit aliquod commune nomen, licet eis conveniat aliqua communis ratio, nimirum quòd sint figuræ uno termino contentæ, qui æqualiter distet à centro seu puncto medio, & hæc ratio loco nominis debet assumi quoties hoc attributum de iis est communiter demonstrandum.

Tertium est analogum, id est, quod habet nomen quidem unum & commune, rationem verò huic nomini respondentem non habet unam & univocam, sed analogam tantum, seu partim eandem, partim diversam. Sic *vivens* dicitur de Deo, de Angelis, de animalibus & plantis quæ omnia viventia dicuntur: ratio verò *viventis* in his omnibus non est una & eadem, nisi secundum analogiam, seu similitudinem & proportionem quandam: quæ tamen ratio accipi debet, ubi hoc attributum est de iis communiter demonstrandum.

I V.
Tertium
est ana-
logum.

D. Quoniam de univocis & analogis dixisti. Quid censes de æquivocis?

V. De
æqui-
vocis.

M. Æquivoca priùs distingui debent quàm definiri, quia non unum quid, sed diversa planè significant. v. c. si quis de cane loquatur; distingui debet de quo cane loquatur, an de fidere, an de cane latratili, an verò de pisce qui canis vocatur.

V I.
Quo-
modo
proce-
dendū.

D. Quid præterea faciendum, quando quidem res est tanti momenti?

M. Cautè demonstrator debet procedere, ne loco generis assumat speciem, ne ve loco speciei assumat genus; v. c. ne loco trianguli rectilinei assumat Iosceles, quia alia sunt attributa propria trianguli, quæ conveniunt omni & soli triangulo, non tamen soli Iosceli, & quædam sunt propria soli Iosceli, quæ non conveniunt omni triangulo.

Sed nec loco speciei sumi debet

aliquod ejus individuum ; quia propria speciei attributa reciprocè convertuntur cum ipsâ specie, & latius patent quolibet individuo. Quando igitur in Geometriâ de circulo aut triangulo descripto demonstratur aliquid, id non fit de singulari illo circulo seu triangulo, sed de circulo seu triangulo secundum speciem sumpto. Verbo dicam subjectum primum æquari debet attributo primo, & vice versâ, ita ut nec universalius eo sit, nec minùs universale ; sed ei omni soli & semper conveniat. Quomodo *capax virtutis moralis* convenit omni soli & semper *homini* primò & per se.



CAPUT XII.

De Definitione.

I. *Quid & quatuorplex definitio.* II. *De principiis causisque rerum quatenus inserviunt definitioni.* III. *De definitione accidentium.* IV. *De definitione logicâ.*

I. Quid
& quo-
ruplex
defini-
tio.

D. Quid est definitio?

M. Duplex est, alia nominis, alia rei.

D. Quid est definitio nominis?

M. Est oratio explicans significationem nominis alicujus obscuri aut minùs noti per voces magis notas. Sic Eclipsis dicitur defectus luminis in sole, lunâ, vel aliâ stellâ.

D. Quid est definitio rei?

M. Est oratio explicans rei naturam.

D. Quomodo explicatur rei natura?

M. Per ea à quibus derivatur, aut quibus innotescit.

D. A quibus derivatur rei natura ?

M. A principiis & causis propriis per quas explicari debet ubi notæ sunt, aut si quas habet. Sic formæ Mathematicæ puræ, numeri scilicet & figuræ explicantur per sua principia propria.

D. Quibus innotescit rei natura ?

M. Per effecta propria, ex quibus rei natura investigatur ; quoties eâ notiora sunt ; & rei principiis causisque magis manifesta, nam ratiocinando semper procedere debemus à notioribus ad minùs nota.

D. Quænam sunt principia propria numeri ?

M. Sunt unitates primique numeri, duo scilicet & tria, seu trinitas, dualitas & unitas, ex quibus oriuntur & componuntur cæteri numeri.

II. De
princi-
piis &
causis
rerum
quate-
nùs in-
serviūt
defini-
tioni.

D. Quænam sunt principia prima figurarum?

M. Punctum, linea & superficies, quia per hæc omnis figura inchoatur, terminatur, continetur ac definitur.

D. Quænam sunt principia prima rerum naturalium?

M. Sunt materia & forma, quia ex his res omnis naturalis fit & componitur; ex materiâ, quia non fit ex nihilo; ex formâ verò seu ratione, quâ materia per hanc formam ad finem aut functionem aliquam determinatur.

D. Quid est materia?

M. Est id seu subiectum ex quo res aliqua fit, ut lignum ex quo fit ignis; & si agatur de materiâ primâ, est subiectum primum ex quo infito res aliqua fit, & in quod ultimò resolvitur.

D. Verùm enim verò lignum est aliquid actu certam habens quanti-

tatem, certas qualitates, &c. Materiam verò dicunt nihil esse actu, nec quid, nec quantum, nec quale, &c. Quid tandem est hoc?

M. Id quidem quod est materia, ut lignum est aliquid actu, seu certam habet essentiam, certam quantitatem, qualitates certas; sed quatenus est materia præcisè sumpta, seu materia prima sub hâc ratione materiæ, nihil est actu, sed tantum potestate, id est potest esse aliquid, ut lignum potest esse ignis, & hæc potentia cum privatione conjuncta est propria ratio materiæ. Ideò enim aliquid est materia alterius, quia potest eâ fieri. Verum hoc discrimen est inter materiam rerum arte factarum & naturalium, quòd ea semper suam servat formam naturalem, suam quantitatem, & suas qualitates. At verò materia rerum naturalium non ita, sed formam, quantitatem & qualitates mutat.

v. c. Quando ex ligno fit scamnum, semper manet lignum; sed quando ex ligno fit ignis, non manet lignum, nec naturam, nec quantitatem, nec qualitates ligni habet, sed has omnes exuit, ut induat naturam, quantitatem & qualitates ignis.

D. Quid est forma rei naturalis?

M. Est essentia & ratio rei ex ejus fine seu functione expressa, quâ res est id quod est, quâque materia fit id quod est; sic anima hominis est id quo homo est homo, quo ejus materia informatur, & fit id quod est.

D. Unde derivatur illa forma?

M. Omnis forma sive naturalis sive artificialis primùm derivatur ab aliquâ mente, seu intelligente principio, ut forma domûs, forma cathedræ ab artifice; forma equi, forma hominis à Deo authore naturæ.

D. A quo seu quo modo talis forma exprimitur?

M. Ex-

M. Exprimitur per intelligens principium à fine seu functione ad quam destinat opus suum.

D. Quare?

M. Quia mens omnis sapiens, quæque non agit temerè, primò finem seu functionem operis intendit, ex quâ totam operis rationem colligit, quam formam vocamus; unde cum hæc finis & functio nobis est magis nota, ut solet esse in naturalibus arte factis & politicis, ex eâ operis rationem, formam, essentiam & naturam colligimus, sic ex visione oculi fabricam formamque oculi colligimus; auris, ex auditione; hominis ipsius, ex ratione seu ratiocinatione universali.

Quare quisquis finem in physicâ negligit, nullam unquam rei naturalis scientiam assequetur.

D. Neglexit tamen Cartesius qui solus Physicus propemodum nunc habetur.

M. Ideò Cartesius vix ullam Physicæ notionem assecutus est, ejusque fabulosa Mundi fabrica nullam intelligentiam, sapientiam aut providentiam indicat, omniaque tribuit fatali triplicis pulveris impressioni, falsisque motûs legibus, ex ignoratione morûs & corporis naturalis omninò profectis, nec dubitem asserere hoc Philosophiæ genus, non leviter fidei nocere, quâ nulla finis, nulla mentis, nulla sapientiæ aut providentiæ ratio habetur. Sed omnia ex phanaticis colliguntur corpusculis, quæ in solâ imaginatione sunt eo numero, ordine, figurâ, situ, motu, quæ cuique placent, prædita.

D. Ergone aliæ causæ negligendæ sunt in definitione præter finem seu functionem rei?

M. Minimè verò, sed efficiens & materialis consulendæ sunt. Verùm quia finis primum determinat effi-

ciens ad formam, formaque materiam specificat, ideò præcipuè consulenda finis est seu functio, v. c. Si fabrum lignarium alloquaris, ut tibi faciat cathedram, quæret is, si sapiens & peritus sit, ad quam finem seu functionem, ex eâque cathedræ rationem seu formam desumet, & convenientem ei formæ eliget materiam.

D. Haftenus de subjecti definitione dixisti, nunc vellem aliquid diceres de definitione attributi.

III. De
Definitione
attributi
seu accidentis.

M. Attributa, præter essentialia, duplicis sunt generis; alia sunt propria, alia verò communia; illa dicuntur rei proprietates, hæc accidentia communia; illa sequuntur formam & essentiam rei naturalis, hæc materiæ portionem ex quâ res naturales constant; illorum ratio quærenda est in ipsâ essentiâ, & ubi primùm eorum subjectum reperitur, ibi reperitur eorundem ratio. v. c. *Сараж*

virtutis moralis est proprium *hominis* attributum sequens ejus essentiam & ab eâ procedens, & ejus ratio in hominis ratione reperitur. Hominis ratio est quòd sit *animal rationis particeps*, & eadem est ratio cur sit *capax virtutis*; & hæc accidentia propria sola demonstrantur de suis subjectis. Habent & accidentia communia sua prima subjecta; certam scilicet materiam, cui conveniunt, ex quâ potiùs quàm ex aliâ sunt certæ res naturales, verùm quia non facile licet eam reperire, ideò definiri possunt per duplicem ordinem quem dicunt alterum ad subjectum, alterum ad functionem aut effectum suum, aut alterutrum eorum separatim sumptum. Sic color qui fortassis habet aliquod primum sed valdè commune subjectum investigatu difficile, definiri solet per ordinem ad subjectum in quo est extremitas perspicui in corpore terminato, id est, terminus perspicui

seu transparentis corporis in corpore
residens minimè transparente, sed
definito, per quod non permeat
lumen; sic color parietis minimè
transparentis terminat aërem corpus
perspicuum, actu quidem perspi-
cium ubi lumen adest; per ordinem
verò ad effectum seu functionem
suam definitur idem color motivum
perspicui in actu, seu id quod agit
& movet corpus perspicuum per-
fectè perspicuum, seu quod actu
illustratur à lumine, & fit actu trans-
parens.

D. Quare definitio dici solet ora-
tio constans ex genere proximo &
differentiâ maximè propriâ?

IV. De
Defini-
tione
Logicâ.

M. Quia non rarò investigari so-
let rei definitio res inter se compa-
rando & observando in quo proxi-
mo genere conveniunt, quod voca-
tur genus rei definiendæ proximum,
& in quo res ejusdem generis à se
maximè differunt, quod differentia

maximè propria vocatur : quæ definitio logica dicitur ; quia res considerantur quatenus logicis intentionibus generis & differentiae sunt subiectæ.

Omnis autem definitio clara esse debet , quia fit ad rem manifestandam. Brevis , ne perplexitatem pariat , ita tamen ut evitetur obscuritas , quæ brevitatis comes esse solet , ac denique universalis , non tamen universalior re definitâ , sed ita ut ei omni soli & semper conveniat , quomodo *animal rationis particeps* convenit omni soli & semper *homini*.

D. Quomodo investigari solet hæc definitio ?

M. Investigari solet divisione summorum generum , quæ Categoriae vulgò dicuntur , substantiæ scilicet , quantitatis , qualitatis , &c. quorum levis aliqua in Logicâ tradi solet cognitio ad has definitiones investigandas ; plenior autem eorum tracta-

tio ad Metaphysicam reservatur.
Ideò hîc dicemus de divisione ge-
neris in suas species.

CAPUT XIII.

De Divisione generis in suas species.

I. De Divisione generis in species univer-
sè. II. De Divisione substantia. III. Quid
est substantia pura, quid impura. IV.
Quâ ratione pura ab impurâ dignosci-
tur. V. An beluarum anima dicenda
sit substantia, an immortalis. VI. An
anima hominis sit substantia, an im-
mortalis. VII. Non est accidentium
congeries nec subtilis materia in belluis
aut plantis.

D. **Q**uomodo genus omne di-
vidi debet in suas spe-
cies?

M. Per differentias generi pror-
sus intrinsecas.

I. De
divisio-
ne ge-
neris in
suas
species.

D. Quid vocas per differentias prorsus intrinsecas?

M. Voco eas quæ sub ipso generis ambitu ita continentur, ut extrà illud genus in eodem sensu non reperiantur, quæque contrahant & determinent ipsam differentiam generis constitutivam.

D. Da nobis aliquod exemplum ut hoc melius & plenius intelligamus.

M. Triangulum est genus quoddam figuræ quod varias sub se species continet, scilicet *Æquilaterum*, *Isosceles* & *Scalenon*. Differentia porro constitutiva trianguli est tria habere latera, quæ in singulis ejus speciebus reperiri debet cum quâdam determinatione laterum trium. Sic *æquilaterum* habet quidem tria latera, sed *æqualia*, & ita per *æqualitatem* trium laterum determinat differentiam trianguli, quæ tria tantum dicit latera abstrahendo ab æ-

qualitate & inæqualitate laterum. Iſosceles quoque tria habet latera, sed quorum duo tantum sunt æqualia; Scalenon similiter habet tria latera, sed omnia inæqualia.

D. Dixisti quidem aliqua de divisione substantiæ, sed pollicitus es plura te dicturum agendo de divisione. II. De
diviſio-
ne sub-
ſtantiæ;

M. Non recuso, & eò quidem libentiùs, quòd ea paucis sit nota, licèt ex eâ corporis naturalis, & mentis seu spiritûs, ut nunc loquuntur homines, omninò dependeat notio.

Substantia igitur universè dicitur ens per se subsistens, eamque divisimus in puram quæ nullum includat subjectum, & impuram quæ subjectum includat.

D. Quare dividis in puram & impuram?

M. Quia licèt substantiæ nomen à substando derivatum sit, idem

sæpè significat quod essentia, eodemque nomine substantiam & essentiam exprimunt Græci, scilicet *οσία*, idemque significat substantia pura, ac essentia pura, scilicet ea quæ nulum includit subiectum, & hæc est prior & potior substantiæ species. Impura verò dicitur ea quæ includit in suâ ratione subiectum, ita tamen ut ab eo non dependeat essentia; sed potius subiectum ab illâ; sic anima desiderat corpus, non ut subsistat per corpus, sed corpus potius per illam, & ita duo sunt modi subsistendi per se, quæ differentiam constitutivam substantiæ, scilicet *subsistere per se*, dividunt. Pura quæ subsistit separatim ab omni subiecto. Impura quæ subsistit quidem cum subiecto, sed independenter ab eo, ut jam superius diximus, & hîc plenius exponemus.

D. Quare unam vocas puram & alteram impuram?

M. Quia una nihil aliud est quàm essentia, nec ulli subiecto est permixta; altera verò dicitur impura, quia subiecto est conjuncta seu permixta, sicut vinum purum vocamus quod nulli aquæ seu alteri liquori est permixtum; impurum verò vinum quod aquæ aut alteri liquori est permixtum.

D. Quid est pura substantia?

M. Est essentia pura per se subsistens, separata ab omni subiecto, qualis est divina, ut diximus, & angelica natura, quæ ab omni subiecto & omni materiâ sunt prorsus immunes, in quibus, ut diximus, idem est essentia & habens essentiam, idem nomen abstractum & concretum, idem significat Deus & divinitas. De his jam diximus, nec pigebit hîc repetere.

Impura verò est ea quæ præter essentiam aliquod subiectum seu materiam includit, non quâ subsistat,

III.

Quid
est pu-
ra, quid
impu-
ra?

fed quæ subsistat per illam, ut mox diximus, & in his non est idem essentia ac habens essentiam, non est idem nomen abstractum & concretum, nam abstractum significat solum formam seu essentiam; concretum verò significat habens formam seu essentiam, quod quidem ab ipsâ essentiâ seu formâ distinguitur. Et est aliqua pars aut portio materiæ facta particeps alicujus formæ essentialis aut substantialis; quæ tribuat essentiam huic materiæ portioni, quæ per se nullam habet; quæque ei dat esse seu existere. Ita *homo v. c.* dicit *humanitatem & aliquam materia portionem habentem humanitatem quam ipsa facit hominem, & cui dat esse seu existere*, quia per se nudè spectata præcisè quâ materia est, nullam habet essentiam & existentiam, idem dicas de equinitate respectu equi seu bucephali, & hæ essentia dicuntur formæ substantiales, quarum

quarum vix ulla notio in scholis remansit, quæ eas confundit cum formis accidentalibus.

D. Quid est ergo forma substantialis cujus vix ullam dicis in scholâ ideam remansisse?

M. Est tota corporis naturalis essentia seu rei formaliter spectatæ. Ratio tota ex omnibus ejus operationibus aut functionibus expressa omnium functionum principium, & omnium proprietatum radix, præterquam nihil est substantiale in corpore naturali præter materiam singularem seu certam materiæ portionem; quæ totam suam essentiam & existentiam debet formæ substantiali, sic humanitas est forma substantialis hominis, tota ejus essentia expressa ex omnibus operationibus aut functionibus ejus, earumque omnium principium & proprietatum radix, ex quâ & certâ materiæ portione fit homo. Sicut ex certâ por-

tione luti testa fit aliqua accessu formæ secundum finem ad quem destinatur.

D. At enim anima dicitur forma substantialis hominis, & non solet cum humanitate confundi.

M. Anima in Scholis Christianis sæpè confunditur cum mente hominis, & ejus forma dicitur; sed tum anima hominis inadæquatè sumitur pro superiori & potiori parte animæ, non verò pro totâ animâ.

D. Quare non pro animâ totâ?

M. Quia anima tota omnium Philosophorum saltem judicio est principium omnium vitalium operationum hominis, scilicet nutritionis, accretionis, generationis, sensationis omnis, & appetitionis sentientis, seu sensum consequentis; operationes autem vitales recipiuntur in principio, à quo procedunt; hæ autem operationes, ut per se patet, non recipiuntur in mente;

neque enim mens nutritur, crescit, aut generat, neque sentit; sensus enim belluis omnibus tribuitur ab omnibus, præter paucos Cartesii sectatores, qui sensibus suis renunciare potius volunt, quàm stolidis Cartesii erroribus; mens autem à paucissimis belluis tribuitur, iisque à Cartesio deceptis, qui cùm belluas sentire vident, malunt iis mentem tribuere, quàm à Cartesii erroribus penitus recedere, qui sensum omnem à solâ mente procedere contendit, & ideò animas belluarum immortales esse volunt, sed divino quodam, eoque planè fictitio decreto extingui; quidquid id est, hæ functiones ad hominem totum, non ad solam mentem spectant, sed potius ad corpus, quatenus id à mente distinguitur, ut plenius ex infrà dicendis patebit.

Cùm igitur omnium iudicio harum omnium operationum principium sit anima tota & adæquatè

sumpta, fieri non potest ut ea tota sit mens, aut tota spiritalis, unde S. Augustinus cap. 12 lib. 4 *De origine animæ*, observat animam totam in Scripturis sacris nunquam dici spiritalem seu spiritum, sed eam à spiritu distingui.

D. Quid tandem concludis?

M. Animam hominis adæquatè sumptam ab humanitate minimè distingui, si quidem ea non distinguuntur quibus competit eadem ratio seu definitio: atqui animæ humanæ adæquatè sumptæ & humanitati competit eadem definitio; anima enim hominis adæquatè sumpta est principium omnium operationum ejus, similiter humanitas est earum omnium principium: ergo eadem utrique convenit definitio, ac proinde res eadem sunt.

D. An anima hominis ita spectata & adæquatè sumpta dici potest substantia?

M. Si nomine substantiæ intelligas solam essentiam, anima adæquatè sumpta dici potest substantia, hoc est, essentia hominis; sed si nomine substantiæ intelligas rem per se subsistentem, aut quæ possit per se subsistere, anima ita sumpta, non est substantia, non est res quæ possit per se subsistere.

D. Ergo dici debet accidens, quia quidquid est, vel est substantia, vel accidens.

M. Minimè verò, sed est pars substantiæ & quidem præcipua pars, præter quam est alia pars, scilicet materia singularis, seu materiæ quædam portio, quæ ipsa præcisa & per se spectata, sub solâ ratione materiæ non est substantia seu res per se subsistens, licet substantia dicatur per modum subjecti, sed totum ex his constans est vera substantia, seu res per se subsistens.

D. Quid de mente hominis censes?

M. Ea est verè & propriè dicta substantia, quia potest per se subsistere separatè ab omni corpore.

IV.
Quâ
ratione
pura
substã-
tia ab
impurâ
dignos-
citur.

D. Quare mens hominis propriè substantia dici potest, & posse per se subsistere?

M. Quia operationem habet sibi propriam corpori minimè communem, qualem aliæ partes animæ non habent, unde dici potest pura substantia.

D. Quomodo dignoscam puram substantiam ab impurâ?

M. Dignosces per operationem, omnis enim substantia, omnisque natura dignoscitur ab operatione seu functione suâ propriâ, quæ propria est ejus finis, & à quâ totam suam rationem desumit; hinc dicimus eam exprimi ab ejus fine seu functione. Unde si pura sit operatio, pura erit essentia; forma seu natura, si fuerit impura, impura quoque erit essentia, natura, seu forma.

D. Quomodo sciam operationem esse puram vel impuram ?

M. Scies ex objecto, à quo suam operatio desumit essentiam seu rationem. Quare si objectum sit purum, pura erit operatio & substantia, à quâ procedit pura; sin autem objectum sit impurum, operatio erit impura, & natura impura.

M. Quid vocas objectum purum, quid impurum?

M. Objectum purum voco puram formam sine subiecto perceptam, seu secretam & separatam à subiecto & ejus affectionibus. Ita mens v. c. percipit circulum sine ullo subiecto sensili, circulum dico purum, qui nihil aliud sit quàm circulus, illum separando à subiecto & affectionibus ejus, quod nulla alia vis aut facultas hominis praestare potest. Visus enim, idemque dicas de cæteris sensibus tum internis tum externis, non percipit circulum pu-

rum, eum à subjecto secernendo & separando, sed simul eum percipit cum subjecto & affectionibus ejus; videt enim circulum in aliquo subjecto simul cum subjecto, ejusque affectionibus visibilibus, in auro v. c. lapide, vel ligno, simul cum ejus magnitudine, colore, motu vel quiete; at verò mens solum purumque percipit circulum.

D. Sed purus ille circulus nusquam est.

M. Est in mente. Mens enim nihil percipit nisi in se sit, quidquid autem in aliquo est, in eo est per modum ejus; unde cum circulus in mente sit purus, arguit mentem ipsam esse puram. Sicut enim quidquid est in auro est aureum, ita quidquid est in subjecto puro, purum est, seu quidquid est in subjecto spiritali est spiritale, ac indicat mentem esse puram, secretam & separabilem ab omni subjecto & subjecti affectione.

Visus autem non ita percipit circulum; sed simul cum subiecto in quo est, ejusque affectionibus visibilibus; quod indicat visum non esse formam puram, sed impuram, seu formam subiecto permixtam, quæ percipit formam simul cum subiecto, quales sunt omnes sensus.

D. Vellem clariùs mihi explicares quid tandem sit illa forma impura?

M. Si visum semel perciperes, omnes eas formas impuras conciperes.

D. Quid tandem est visus?

M. Est actus primus oculi seu prima ejus perfectio, quæ tum est, quando oculus est omninò perfectus, ita ut possit videre: unde & videnti potentia dicitur, cui respondet visio, ultima & secunda ejusdem oculi perfectio, quæ dicitur actus secundus, qui ab oculo simul & obiecto dependet.

D. Est-ne visus ab oculo separabilis?

M. Minimè verò, nihil enim aliud est quàm ipsa integritas, completio & absolutio omnium partium oculi, quæ ad visionem desiderantur. Nec puto meliùs exprimi posse quàm per perfectionem primam seu actum primum, quod idem dicas de omnibus potentiis animæ vegetativæ & sentientis, unde partes earum sæpè dicuntur, & sicut oculus est pars corporis, ita visus est pars animæ sentientis, exceptâ semper hominis mente, quæ non est organica, seu quæ nullius organi est perfectio, quæ nullum organum, nullamque certam habet in corpore sedem. Sed est vera substantia potens per se subsistere, quæ propriam habet operationem ab omni corpore & affectione corporeâ secretam, ut mox ostendimus.

D. Si anima vegetans & sentiens

partes habeat : ergo partibilis & divisibilis dici debet , quod tamen multi negant.

M. Divisibile propriè dicitur , quod post divisionem factam , suam speciem , formamque servat. Sic aqua in aquas , aër in aëres aut aëris partes dividi potest , lapis in lapides , lignum in ligna. Et hoc modo vegetans anima & sentiens in belluis imperfectis dividi sæpè potest. Sic videmus partes plantarum terræ aut aliis plantis insertas sæpè vivere , nutriri , crescere , generare , & animam proinde habere vegetantem , eamque divisibilem esse simul cum plantâ , simili modo animalium imperfectorum animæ sæpè dividi possunt ; videmus enim lacertæ caudam abscissam sæpè vivere , sentire , se movere cùm pungitur. At verò perfectorum animalium anima non ita vivit , neque sentit , ubi enim pars abscissa fuerit à toto , non am-

plius vivit, neque sentit. Unde minimè divisibilis est, propter eam quam partes habent connexionem cum toto, & præcipuis quibusdam partibus ejus, à quibus vivendi, sentiendi, & se movendi vim habent, ac continuò derivant sanguinis vitalis, & animalis spiritûs communicatione.

V. An
bellua-
rû ani-
mæ sub-
stantiæ
sint &
immor-
tales.

D. Quid ergo sentis de belluarum animabus, an eæ substantiæ sint & immortales?

M. Substantiæ quidem dici possunt, eo modo quo essentia dici potest substantia, quia reverà anima belluarum est tota earum essentia, principium omnium operationum & radix omnium proprietatum, ut satis constat ex suprà dictis; sed non sunt substantiæ quasi res per se subsistentes, seu quæ possint per se sine ullo subjecto seu corpore subsistere; quia nullam habent operationem sibi propriam, nullam

nullam quæ non postulet corporis societatem & commercium, nullam quæ dici possit pura, ut patet ex visu & visione superius explicatis, nec quidquam, nisi res omninò singulares sensiles percipiunt, quæ omnes sunt materiales, neque eas percipiunt, eas abstrahendo & separando à materiâ, sed simul cum materiâ seu subjecto & ejus affectionibus, v. c. bellua nequit percipere circulum purum, qui nihil aliud sit quàm circulus, nec hominem purum, qui nihil aliud sit quàm homo. Sed percipiunt hunc aut illum circulum in hoc aut illo subjecto, hunc aut illum hominem, ipsum verò hominem purum, seu qui nihil aliud sit quàm homo, non percipiunt.

D. Quid ergo sunt illæ belluarum animæ?

M. Sunt actus primus, seu perfectio prima corporis earum, cum

M

scilicet ita sunt absolutæ belluæ, completæ ac perfectæ, ut suas operationes tum vegetativas, tum sentientes speciei suæ debitas possint exercere; seu ipsa illa exercendi potentia cui respondet actus secundus seu operatio vitalis & sentiens. Quia ubi primùm est illa partium integritas & perfectio quæ requiritur ad operationes earum, ibi statim est anima, & quandiu perseverat, perseverat etiam anima; ubi verò dissolvitur, corrumpitur, aut graviter violatur, perit anima. Ergo in eâ sita est, nec quidquam aliud est anima belluarum.

D. Est-ne aliquid secretum aut separabile à corpore?

M. Nullatenùs, ut dixi, de visu & oculo. Quisquis visum oculumque concipit, animas belluarum, earumque corpora concipiet.

D. Sunt-ne dicendæ immortales?

M. Minimè, quia sunt actus &

perfectiōnes corporum organico-
rum, seu organis aliquibus instru-
ctorum, quæ dum integra & perfe-
cta sunt, ita ut suas functiones obire
possint, ut dixi, animâ præditæ sunt,
nec quidquam animæ earum sunt,
ut dixi, quàm hæc ipsa partium
omnium integritas & perfectio quæ
ad earum operationes desideratur.
Ubi verò deficit ea partium aut ali-
cujus partis integritas, quæ ad vitæ
functiones desiderantur, moritur,
non anima belluæ, sed ipsa bellua,
quæ vitæ mortisque capax est; non
autem anima belluæ, quæ nec vitæ
nec mortis capax est.

D. Quare anima belluæ neque
vitæ neque mortis capax est?

M. Quia vivere tantum dicun-
tur ea, quæ habent operationes
vitales sibi proprias; animæ autem
belluarum, nullas habent ejusmodi
operationes sibi proprias, sed om-
nes sunt corpori communes tum vi-

tae, tum sensus operationes, vitae enim operationes sunt nutriri, crescere, generare; anima porro neque nutritur, neque crescit, ut per se patet; neque generatur nisi cum corpore. Similiter non sentit nisi cum corpore, nullas ergo proprias habet operationes. Ergo vivens minimè dici potest, sed id quo vivit bellua, quemadmodum Musica seu Grammatica non canit aut loquitur, sed est id quo quis canit aut loquitur. Igitur anima belluarum non est vivens, quod autem non est vivens, nec mortale nec immortale dici potest, quia mortale & immortale sunt attributa propria viventis, solisque per se viventibus conveniunt sicut visus non rectè dici potest videns aut cæcus, sed oculus aut homo.

D. Quid ergo censes de iis qui eas immortales esse volunt?

M. Graviter contrà Philosophiam peccant, nec omninò sciunt quid

fit belluarum anima : nec leviter in Theologiam peccant , cum suo fictio de morte animarum belluarum decreto Dei , quod nullibi legitur , neque unquam ante hoc seculum auditum est , (quo immanis fingendi licentia tum in Philosophiam tum in Theologiam obrepfit) ab iis intrusa qui solam suam imaginationem , non autem rationem , nec verbum Dei seu scriptum seu traditum consulunt.

D. Quid de animâ humanâ censes , an ea substantia dici possit & immortalis ?

VI. An anima humana substantia sit & immortalis.

M. Omnis forma omnique natura , ut sæpè jam diximus , totam suam rationem à suis operationibus derivat , talisque est quales sunt ejus operationes. Animæ autem humanæ operationes partim sunt materiales , partim spiritales , neque unquam universa anima , ut loquitur S. Augustinus , in Scripturâ Sacrâ

spiritus dicitur, sed pars ejus. Ergo tres vulgò partes animæ humanæ assignantur; vegetativa, quæ principium est omnium functionum vegetativarum, nutritionis scilicet, accretionis & generationis, quæ sine ullâ controversiâ materiales sunt, ac proinde hæc pars animæ humanæ tota materialis est.

Sensationes similiter omnes, ut sæpiùs ostendimus, sunt materiales, ac proindè pars animæ sentiens est omninò materialis. Quod autem diximus de belluarum animabus, idem prorsùs de his animæ humanæ partibus dicemus, quæ iisdem aut similibus utitur organis, tum ad vegetantis, tum ad sentientis vitæ functiones, nec quidquam aliud sunt hæ animæ partes quàm organorum, quæ ad has functiones desiderantur, integritas & perfectio prima, seu operandi potentia, quæ ab ipsis organis separari minimè po-

test. Quæ partes non per se vivunt, seu nullas habent operationes sibi proprias & corpori minimè communes, proindeque nec mortales nec immortales dici possunt.

Quæstio igitur reducitur ad solam mentem hominis, an ea sit substantia & immortalis.

D. Vellem ergo demonstrares in homine mentem esse, eam esse ejus naturæ partem, eamque substantiam esse per se viventem, & immortalem.

M. Multa simul quæris, eaque gravissima, conabor tamen singulis satisfacere. Ac primò quidem dico in homine mentem esse. Quia ubi est operatio propria mentis, ibi mens est. At in homine est operatio mentis propria, eaque pura, ut sæpiùs ostendimus, quâ percipit circulum purum & hominem purum. Igitur in homine mens est, seu vis & potentia capax operationis puræ, nihil enim

aliud intelligimus nomine mentis.

Secundò, ea est pars & quidem præcipua humanæ naturæ. Quia proprium principium primæ & præcipuæ operationis humanæ naturæ, pars ejus est. Atqui mens est proprium principium primæ & præcipuæ operationis humanæ naturæ. Siquidem prima & præcipua operatio humanæ naturæ, est universalis rerum sensilium ratio seu ratiocinatio, hoc est ratiocinari seu discurre de rebus sensibilibus universè sumptis, seu secundùm genus & speciem spectatis de earum rerum principiis, causis, effectis, quæque ex iis colligi possunt, quæ quidem operatio est ita homini propria, ut ei soli conveniat. Ergo mens quæ ejus est principium proprium, propria est hominis pars.

D. Quare non æquè particularis ratio ac universalis dici debet homini propria?

M. Quia particularis ratio à multis tribuitur etiam belluis, quæ unum particulare seu singulare ex alio singulari colligunt, v. c. canis venaticus colligit hunc cervum ex hoc odore hanc viam transisse, illumque inter mille cervos discernit ex odore, licet alii hanc vim in belluis malint æstimativam vocare potius quam rationem particularem; quam uni homini convenire volunt propter ejus cum mente seu universali ratione affinitatem; non est tamen mens ipsa, sed organica seu materialis quædam vis in cerebro residens, si tamen ab imaginatione hominis distinguatur.

D. Quare non est mens ipsa?

M. Quia mens non alias quam universales suscipit ideas, ut ostendimus suo loco, ex quibus suas format propositiones suasque colligit rationes; at verò particularis ratio procedit ex singularum rerum sen-

filium speciebus quæ in mente nequeunt subsistere, quia eæ species singulares fiunt à materiâ, à quâ libera prorsus mens est, & ita de solis rebus universalibus sensibilibus differit; ut alibi diximus.

D. An mens hominis verè substantia dici possit?

M. Omnino: quia potest per se subsistere & quidem separatè ab omni subjecto, quia habet operationem sibi propriam, nulli subjecto communem, unde non modò substantia est, sed pura planè substantia propter operationem puram, ut jam diximus.

D. An mens vivens per se dici potest?

M. Potest certè. Quia vitales exercet in se operationes, quæ ab ipsâ procedunt, in eâque ipsâ recipiuntur, intelligere scilicet & velle; quæ à solâ mente procedunt, & in eâ solâ recipiuntur. Ergo per se vi-

vens est, nec ulla alia est anima aut animæ pars, quæ habeat tales operationes sibi proprias, ideòque minimè per se vivunt.

D. An mens hominis est immortalis?

M. Est sine ullâ controversiâ immortalis; omne siquidem vivens quod vitâ privari nequit, est immortale: atqui mens hominis est vivens, ut mox ostendimus, nec vitâ privari potest, quia nullum includit subjectum commune vitæ & morti, quoniam pura prorsus est substantia ab omni subjecto planè secreta, ut demonstravimus; ergo certum est eam esse immortalem, neque ei magis accidere potest mors, quàm visui cæcitas, si per se subsistere sine oculo posset. Tum enim visus ipse foret ipsa cæcitas, aut certè cæcus, quod prorsus est impossibile. Oculus quidem videns dici potest & cæcus, quia est com-

mune subjectum visûs & cæcitatîs, quæ sibi in eodem oculo succedere possunt; ita corpus esse potest commune subjectum vitæ & mortis, non quodcumque, sed naturale & organicum, quod modò vivit, quando & quandiu est integrum & perfectum, ut superiùs diximus; moritur autem, ubi dissolvitur hæc integritas atque perfectio. At verò mens nullum prorsùs agnoscit subjectum, nullum organum, ut ex ejus operatione purâ constât; ergo ei nullatenùs accidere potest mors, & ita prorsùs est immortalis.

D. Tu, aut duas in homine statuis animas, quarum una sit materialis, immaterialis altera, aut certè unam quæ simul materialis sit & immaterialis?

M. Unam tantùm in uno homine animam agnosco, quæ partim sit materialis, partim verò immaterialis; quia unitas omnis naturæ, formæ
aut

aut essentiaë derivatur à primariâ seu præcipuâ ejus operatione, propter quam cætera sunt omnia. Præcipua porrò hominis operatio, ut mox diximus, est universalis ratio seu ratiocinatio de rebus omnibus sensibilibus, earum principiis, causis, effectis, &c. Hæc autem operatio desiderat prævias omnium sensuum operationes, ex quibus suas exprimat ideas, sensus autem omnes, cùm interni, tùm externi, vires sunt organicæ, quæ foveri debent & ali, quæque reverà nutriuntur & crescunt, cùm earum nutriuntur & crescunt organa; nutritio verò & accretio functiones sunt vegetativæ; unde necesse est, animam rationalem esse sensitivam & vegetativam.

D. Sed sensitivæ & vegetativæ vires, quæ in integritate & perfectione organorum suorum consistunt, sæpè dissolvuntur, & penitus pereunt in morte hominis. Quid

N

ergo tum præstabit mens, quam dicis esse immortalem?

M. Mens tum suas à Deo accipiet ideas, si ad eum conversa fuerit; sin minùs, in perpetuis manebit tenebris; omnis enim mentis cognitio ex ideis derivatur, quæ, ut diximus, tribus modis haberi possunt, vel infusione à Deo, vel à rebus ipsis sensuum ope collectæ, vel doctrinâ. In separationis à corpore statu, suas à solo Deo mens habebit ideas, easque sine controversiâ longè perfectiores quàm nunc sunt.

D. Hæc doctrina videtur nova.

M. Minimè verò; est expressa doctrina Divi Augustini, qui eam hausit ex Sacrà Scripturâ, & ex eâdem illam probat & confirmat, ut ostendimus; non videtur etiam doctrinæ S. Thomæ contraria, qui non semel dicit animam hominis esse partim immerfam materiæ, partim à materiâ liberam ratione facultatum

Loco
supe-
riùs ci-
tato.

suarum, neque omnium verè intelligentium menti, qui fatentur operationes vitales in homine partim esse materiales, partim immateriales, quarum principium est anima, quæ necessariò debet esse talis quales sunt ejus operationes; neque enim aliunde desumitur animæ aut cujuscunque formæ seu essentiæ & natura & ratio, quàm ex ejus operationibus.

Denique omnes fatentur essentiam & naturam hominis seu humanitatem esse partim materialem, partim immaterialem. Ostendimus autem suprà humanitatem esse ipsam hominis animam adæquatè sumptam, seu quatenùs est principium omnium operationum ejus.

D. At enim humanitas est forma Metaphysica, & tota hominis essentia.

M Qui humanitatem vocant formam Metaphysicam, non satis

intelligunt quid sit forma Metaphysica; ea enim abstracta est ab omni materiâ singulari, sensibili & intelligibili, qualis est Deus, qualis est Angelus. Sed humanitas abstrahit tantum à materiâ singulari, non autem à materiâ sensibili, ut cæteræ formæ Physicæ; includit enim in suâ ratione carnes, ossa, nervos, &c. quæ sensilia sunt, licet non includat has aut illas carnes, hæc aut illa ossa, quæ singularia sunt, à quibus abstrahit, & est reverà tota hominis essentia, tota forma, tota anima, neque alia est in homine forma.

D. Omnium iudicio homo constat ex materiâ & formâ; tu solam agnoscis formam, de materiâ nihil dicis?

M. Verè quidem homo constat ex materiâ seu certâ portione materiæ & humanitate, quæ materiæ portio non pertinet ad essentiam hominis, sed ad ejus substantiam,

quia non sine eâ subsistit humanitas, licet non per eam subsistat, sed ipsa potius per humanitatem, ut superius diximus. In rebus autem Physicis, non est idem essentia & substantia, ut jam ostendimus. Ergo licet ex materiâ quâdam singulari constent singuli homines, ea tamen non pertinet ad eorum essentiam, sed ad eorum substantiam; non est autem in Physicis idem essentia & substantia.

D. Quid ergo tu censes de iis, qui putant omnem animam esse congeriem accidentium, aut materiam quamdam subtilem, unam præter hominis animam seu mentem?

M. Censeo eos nullam omninò animæ, nullam corporis naturalis, nullam Physicæ disciplinæ notionem habere. Quoniam quidem anima, omnium iudicio, est forma corporis naturalis, primum ejus principium & essentia ejus tota, ac

VII.

Non est
acci-
dentiū
conge-
ries nec
subtilis
mate-
ria.

N

principium omnium ejus operationum & proprietatum corporis naturalis organici ; quomodo autem accidens potest esse primum principium substantiæ, corpus enim naturale sine ullâ controversiâ substantia est, quod accidens omne semper supponit, multò minùs est accidentium congeries, quæ ex multis constat accidentibus, quomodo potest esse tota rei naturalis essentia, principium omnium operationum, & proprietatum radix quæ semper quid primum est in re. Sed nec materia subtilis esse potest, quæ quoddam corpus est, & ex iisdem primis principiis constat, ex quibus cætera corpora componuntur : materiâ scilicet & formâ. Prima enim corporis naturalis principia sunt ea, omnium judicio, quæ neque ex se invicem, neque ex aliis, sed ex quibus omnia fiunt corpora naturalia. Quare certum est eos nullam

omninò corporis naturalis notionem habere qui ejus prima principia penitus ignorant, nec proinde Physicæ disciplinæ notionem ullam, quæ totam suam rationem à corpore naturali derivat: fatentur enim illi saltem plerique materiam & formam esse prima principia corporis naturalis, & ultrò confitentur se scire quidem esse formam, sed nescire quid est, & mihi quoque certum est eos ne quidem scire quid est materia, cum ipsi tribuunt propriam essentiam & existentiam, quas nullas habet, ut multoties ostendimus; sed eas à formâ derivat. Unde certum est ne levissimum Physicæ disciplinæ vestigium apud hos homines mansisse, qui sua corpuscula, suam triplicem materiam subtilem, globosam, striatam nobis obtrudunt, quæ ut ex solâ Cartesii imaginatione prodierunt, ita in solâ eorum phantasiâ, nusquam autem in rerum naturâ comparent.

CAPUT XIV.

I. Divisio substantiæ in extensam & cogitantem est inepta. II. Inducit in ignorantem corporis naturalis & mentis. III. Physicæ & Metaphysicæ. IV. Error & Ignorantia Cartesii. Unde nata. V. Substantiæ omnis ratio ex operationibus est repetenda. VI. Totius Physicæ ratio. VII. Ignota prorsus Cartesio. VIII. Ne quidem quid scire sit novit.

D. Quid censes de divisione substantiæ in extensam & cogitantem?

M. Censeo eam esse prorsus ineptam, & Logicis institutis omninò contrariam.

I. Divisio substantiæ in extensam & cogitantem est inepta.

I^o Quia differentia divisiva alicujus generis ei debet esse prorsus intrinseca, seu sub eo contineri, nec extrà genus illud in eodem sensu reperiri, aut ad aliud genus pertinere. At enim extensio non est intrinseca substantiæ, nec sub eâ solâ.

continetur, cum ad aliud genus, scilicet quantitatis pertineat, cujus propria differentia est, quâ magnitudo constituitur, & ad omnes species magnitudinis spectat. Nam linea sine ullâ controversiâ extensa est; vera species magnitudinis, quantitatis & accidentis, quod idem sine dubio dicendum est de superficie, quæ secundum longitudinem & latitudinem extensa est & divisibilis, sicut linea secundum solam longitudinem: nec minùs certum est magnitudinem trinæ dimensionis esse veram magnitudinis, quantitatis & accidentis speciem, nulloque modo substantiam dici posse, licet summâ cum ignorantia cum corpore naturali confundatur, cujus est affectio & accidens.

2^o Accidens non potest esse differentia substantiæ, quia supponit substantiam constitutam, eique jam constitutæ advenit. At extensio est

accidens, secundum Cartesium, & accidentibus certè convenit, ut patet ex mox dictis.

3^o Essentia rei à nullo sensu percipitur, sed à mente solâ, cujus est proprium objectum; quemadmodum color non percipitur ab auditu, nec sonus à visu. Extensio verò percipitur non ab uno tantum, sed à pluribus sensibus ut per se patet: ergo ad essentiam minimè pertinet quæ à mente solâ percipitur.

II. In-
ducit in
ignora-
tionem
corpo-
ris &
mentis.

4^o Differentia divisiva substantiæ debet ejus differentiam constitutivam contrahere & determinare, sicut species contrahit & determinat genus. Differentia porrò constitutiva substantiæ est per se subsistere, seu independenter ab omni subjecto; quod duobus fit modis, vel ita ut nullum prorsus includat subjectum, quod advenit puris substantiis seu mentibus; vel si includat subjectum, non dependeat ab eo, sed contrà

subjectum ab eâ, quod advenit omnibus formis Physicis substantialibus, quæ includunt subjectum, seu ejus potius societatem propter operationes suas postulant, non quasi ab eo dependeat, sed quòd illud potius ab ipsis dependeat, ut sæpè diximus. Sed extensio nullo modo determinat modum subsistendi per se. Non magis quàm album aut nigrum determinant differentiam constitutivam viventis aut animalis. Unde certum est ex hac divisione ortam esse ignorationem in Scholis materiæ & formæ substantialis, quarum vix ulla in Scholis ratio remansit; materiam enim plerique concipiunt per modum veræ, propriæque substantiæ, quæ per se subsistat, & verum corpus naturale sit, quo quid dici potest absurdius? Ut primum principium corporis naturalis, quod sine dubio compositum est, sit sui ipsius principium cùm sit corpus na-

turale. Formam quoque substantialem nonnulli volunt esse substantiam propriè dictam, seu rem per se subsistentem; ac proinde vel corpus naturale, vel mentem, cum non aliæ sint species substantiæ. Alii verò volunt eam esse verum accidens aut accidentium congeriem, quod magis absurdum est. Ut primum scilicet substantiæ alicujus principium, sit accidens quod substantiam supponit, jam constitutam, eaque semper posterius est.

III.
Phyficæ
& Me-
taphy-
ficæ.

Hinc quoque factum, quòd nulla notio corporis naturalis in Scholis remanserit, cum ejus principia prima, materia scilicet & forma penitus sint ignotæ, nullaque proinde Phyficæ scientiæ, quæ totam suam rationem à corpore naturali desumit, quæ ejus est objectum proprium, ut Schola loquitur, aut proprium attributionis subiectum, & omnium proprietatum, quæ in
Phyficâ

Phyficâ demonstrantur fons & radix.

Sed nec animæ notionis vestigium ullum in Scholis remansit, ultròque fatentur ferè omnes se nescire quid anima sit. Nec immortalitatis ejus ulla vera ratio Physica. Unde nonnulli belluarum animas per se creari & immortales esse docuerunt. Neque præcipuæ partis Metaphysicæ integra mansit notio, quia vix ullum reperias, qui verum discrimen sciat inter naturale corpus & mentem, de quâ præcipua pars Metaphysicæ tractat, tantum est in principiis primisque notionibus errare!

5° Differentia constitutiva unius speciei alicujus generis non debet alteri speciei oppositæ ejusdem generis convenire, sed extensio convenit cogitanti cuidam substantiæ, ergo nullo modo possunt esse differentiæ divisivæ substantiæ universè sumptæ, neque constitutivæ spe-

IV.

Error
Cartesii
unde
natus.

cierum oppositarum.

Enim verò si cogitatio sumatur pro ratione particulari, uti sumitur à Divo Thomâ ejusque discipulis minimè certè contemnendis, operatio est materialis & organica, ceramque sibi vindicat in cerebro sedem & organum, ut docet idem Doctor A. 4. q. 78 primæ partis. Sive sumatur cogitatio ut sumitur à Cartesio, ita ut ad mentem & omnes sensus tum internos tum externos pertineat, materialis partim est & organica, quales sunt omnes sensuum operationes; quæ suas certas habent sedes & organa, quæ omnia materialia sunt & extensa; quidquid dicat Cartesius, qui nullam unquam, aut sensûs aut intellectûs notionem habuit, has vires, facultates & animæ partes miserabiliter confudit, & ut hunc crassum suum & intolerabilem errorem confirmaret, ausus est summâ cum audaciâ

& impudentiâ, belluis sensum denegare contrâ sensuum omnium fidem, & gentium omnium consensum.

Hanc autem tam confidentem ignorantiam ex linguæ gallicæ usu, cui magis assuetus erat Cartesius, quàm latinæ proficisci reor: quòd cogitatio gallicè soleat exprimi per vocem, *Pensée*, quæ quidem à multis soli menti tribuitur, ab aliis menti simul & interioribus sensibus saltem aliquibus conceditur; à solo, quod sciam, Cartesio primo sensibus omnibus etiam externis aut eorum operationibus largitur. Verùm cum nonnulli ejus discipuli viderent cognitionis gradum aliquem belluis minimè posse denegari, maluerunt iis mentem tradere, earumque animas immortales asserere, quàm Cartesii errori penitùs renunciare.

Ex simili prorsùs errore contigit Cartesio belluis animas denegare, quòd vox *Ame*, quæ animam gal-

licè significat; vix in abstracto bel-
luis gallicè tribui soleat; vix enim
audias *l'ame d'un cheval*, anima
equi, quod quidem ex proprietate
quâdam linguæ gallicæ accidit, quæ
præcipuam animæ speciem pro ge-
nere sæpè sumit aut solam esse vult.
Sic Itali voce *grano*, frumentum ex-
primunt, quòd præcipua sit grani
species. Sed reverà Cartesius nun-
quam vidit aut percepit, quid sit
cognitio, quotuplex ejus species
aut gradus? quid sensus? quid intel-
lectus? quid anima? imò verò quid
corpus naturale sit, ita ut ausim asse-
rere nunquam tam crassam, tam
incredibilem & intolerabilem Phy-
sicæ ignorantiam, tantam Phyci-
famam esse consecutam, parcant
ejus sectatores, si his verbis uti co-
gar, ut eos à crassâ illâ ignorantia
& phanaticis ejus inventis revocem,
ac ad veritatem investigandam ex-
citem, cujus vix ullam omninò no-

tionem in rebus naturalibus habuit
Cartesius.

Ex his igitur constare satis puto
ex hac pravâ substantiæ divisione
ex Logicæ ignoratione ortâ, natam
esse summam corporis naturalis &
principiorum ejus ignorantiam, ac
proinde Physicæ disciplinæ tantam,
ut vix ejus in Scholis relictum sit
aliquod vestigium; summam quo-
que ignorantiam animæ, mentis,
cognitionis, sensûs & intellectûs,
neque levem sapientiæ seu Meta-
physicæ ignorantiam, quæ fortassè
ex linguæ græcæ ignoratione pro-
fecta est, cui scientias omnes & ar-
tes ferè debemus.

Itaque substantia græcè dicitur
οὐσία, quæ significat etiam essentiam,
quod nomen priscis Latinis non ita
est notum. Essentiæ verò species du-
plex est, ut jam diximus, alia quæ
per se subsistit separatè ab omni sub-
jecto seu materiâ, quæ pura essentia

dici potest nulli subiecto permixta seu conjuncta : quales sunt intelligentiæ seu puræ mentes, quæ actus puri, puræ formæ, ac formæ per se subsistentes sine ullo subiecto dicuntur, quæque prorsus incorruptibiles & immortales sunt. Omnis enim corruptio & mors omnis oritur à subiecto seu materiâ, unde ubi nullum subiectum, nullaque materia, nulla fingi potest corruptio, nullaque mors, quæ privatio quædam est, quæ nulla esse potest ubi nullum est subiectum, cum nihil aliud sit, quàm absentia formæ in subiecto apto.

Alia verò essentia species est ea quæ dicitur impura, quæ quidem subsistit cum subiecto, non tamen dependenter ab eo, quales sunt omnes essentia Physicæ, quæ quidem dicuntur formæ substantiales, quæ unâ cum materiâ cui tribuunt essentiam & existentiam quæ per se nullas habet substantias Physicas,

per se subsistentes, seu corpora naturalia constituit.

Tertium addi potest genus essentiae ex his duabus constans, scilicet humanitas seu homo qui corpore constat & mente, purâ scilicet & impurâ essentiâ.

Omnis autem essentia, ut sæpè diximus, forma, natura seu substantia dignoscitur per suas operationes ad quas ordinatur, & à quibus totam suam rationem desumit. Operationes autem ipsæ, ut sæpè diximus, ex objectis; objecta verò pura sunt ea quæ solam exprimunt formam abstractam à subiecto, ac sine illo perceptam; ut circulus purus, qui nihil aliud sit quàm circulus à mente solâ perceptus, ut jam ostendimus. Objecta verò impura sunt ea quæ formam simul & subiectum exprimunt, seu quorum forma simul cum subiecto percipitur, qualia sunt omnium sensuum

V. Omnis substantia ex operationibus est repetenda.

cùm internorum tùm externorum
objecta; ut patet ex visu & imagi-
natione, quæ nunquam formas puras
& per se, sed simul cum subiecto &
affectionibus subiecti percipiunt;
nunquam visus vidit circulum pu-
rum, sed circulum in aliquo sub-
iecto, simul cum affectionibus visi-
bilibus subiecti, ut jam ostendimus;
quod idem dicas de imaginatione
& cæteris sensibus.

Cùm autem certissimè puras has
& impuras in homine detegamus
operationes, certum est in eo esse
harum operationum principia, sub-
stantiam scilicet puram & impuram
ex quibus homo constet; puram
autem ejus partem, & à subiecto
immunem, esse quoque à corrup-
tione & morte prorsus immunem,
& hæc est propria ratio incorrupti-
bilitatis & immortalitatis animæ
humanæ, quæ communiter in Scho-
lis Christianis cum mente confun-

ditur licèt malè, cùm reverà mens non sit universa seu tota anima, ut cum Divo Augustino loquamur, sed pars ejus; altera verò pars humanæ naturæ est corpus vegetans & sentiens, impura planè substantia, cujus omnes operationes sunt impuræ. Hæc si scivisset aut vidisset Cartesius, nunquam sensum animamque belluis denegaret, nec tam miserabiliter errasset in demonstrandâ distinctione humanæ animæ à corpore, cujus utriusque nullam omnino notionem habuit; quòd autem tantam apud multos admirationem consecutus sit, viros etiam alioqui certè doctos & eruditos, id gravem eorum tum Logicæ tum Physicæ ignorantiam apertè declarat. Esse possunt enim verò magni Architecti, qui non sint magni Latomi; magni Medici, qui non sint magni Chirurgi; & magni Theologi qui non sint magni Philosophi; & ausim confidenter

asserere quotquot phanaticis Cartesii fabulis capti fuerunt & decepti, eos leviter in Philosophiæ studio fuisse versatos, quales quales tandem fuerunt.

VI.
Totius
Physicæ
ratio.

Hujus autem totius doctrinæ veræque Physicæ Christianæ ratio est, quòd omnes res naturales à Deo authore sapientissimo proficiscantur, qui suam in iis condendis sapientiam, in regendis providentiam manifestare voluit, quas imprimis omnis verè sapiens aut sapientiæ amator Philosophus contemplari continuo debet.

Omnis autem sapiens author, sui operis finem aut functionem seu operationem primùm intuetur, ex quâ totius operis rationem colligit, quæ in mente vocatur idea seu ratio; extrâ mentem verò forma, essentia seu natura; quæ talis est, qualis est functio seu operatio aut operationes, quæ si puræ sint om-

nes ab omni subiecto seu materiâ prorsus immunes, ipsa quoque natura erit immunis ab omni materiâ & omninò pura; si verò impuræ sint omnes operationes, impura erit & forma seu natura; si denique operationes partim sint puræ, partim impuræ, forma similiter erit partim pura, partim impura, qualis est humana natura, forma, essentia, seu anima tota.

Cartesius autem omnem finis contemplationem è Physicâ sustulit, omnemque proinde naturæ & essentia Physicæ rationem ignoravit, quæ tota prorsus à fine desumitur, & ex quâ nascuntur attributa seu accidentia propria, quæ sola de rebus seu corporibus Physicis demonstrantur. Materiæ motûsque falsissimas habuit notiones. Vim omnem motricem & efficientem causis secundis denegavit, easque semel motas perpetuò moveri sine ullâ ratione con-

VII.

Physicæ
ratio
ignota
Carte-
sio,

tendit, & ita ne vestigium quidem ullum aut Physicæ reliquit aut scientiæ, sed omnia phanaticis turbavit inventis, inductis corpusculis, quæ nunquam nisi in solâ imaginatione comparent, quorumque, si forent magnitudo, numerus, ordo, figura, situs, motus & quies, à nullo unquam detegi possunt, ex quibus tamen, licet ignotis, omnium affectionum & mutationum Physicarum rationem deducit. Omnes præterea sensibiles affectiones proprias ferè prorsus sustulit, colorem, odorem, saporem, calorem, à rebus ipsis amovit, easque cum sensationibus earum confudit, & has in mentem transtulit, ausus asserere calorem non magis in rebus esse quàm dolorem, quem omnem in solâ mente constituit, ac belluis denegat contrà sensuum omnium fidem. Sed si quæ Physicæ in Scholis superest ratio, si dicenda scientia sit, quam
ipfi

ipsi dignitatem nunc multi dene-
gant; sed si speciem aut similitudi-
nem habeat aliquam scientiæ, ha-
bebit & similitudinem aliquam &
speciem demonstrationis; cùm scien-
tia nihil aliud sit in actu spectata
quàm demonstratio. Demonstratio-
nis autem scopus est attributum
aliquod proprium de proprio sub-
jecto demonstrare, cum quo neces-
sariam habeat connexionem, & à
quo procedat. Nullum autem aliud
Physicæ attributionis subjectum af-
signari potest, quàm corpus natu-
rale, à quo nomen Physica suum
desumfit, cujusque nullam omninò
notionem habuit Cartesius, qui il-
lud cum corpore geometrico, seu
magnitudine trinae dimensionis con-
fudit, substantiam scilicet cum ac-
cidente, non tantùm re seu subjecto,
sed essentiâ seu ratione, hoc est,
eandem planè voluit esse rationem
& essentiam corporis geometricè

sumpti seu magnitudinis trinæ dimensionis & corporis naturalis, quo vix quidquam dici potest absurdius, aut quod maiorem omnis scientiæ sapiat ignorationem. Enim-verò si eadem est utriusque corporis essentia, eadem prima utriusque corporis erunt principia, eadem attributa utriusque propria, eadem denuo utriusque species, eadem utraque scientia, Geometria scilicet & Physica, eadem denique omnia, præter singularem materiam, seu varias materiæ portiones, quæ his rationibus subsunt, quæque à nullâ, ut jam diximus, scientiâ considerantur. Magnitudinis autem finitæ, quæ solâ à Geometriâ aut aliquâ scientiâ considerari potest, infinitæ enim aut indefinitæ, qualem finxit Cartesius, nulla omninò esse possunt principia, nulla-que proinde scientia; quæ omnis à principiis ducit initium; magnitudinis, inquam, finitæ seu finitionis

ejus aut terminationis, quæ non aliud est quàm figura, non alia fingi possunt principia, quàm punctum, linea & superficies, quibus initiis aut terminis omnis definitur, circumscribitur, aut continetur magnitudo finita, neque alia ex his principiis existere possunt attributa propria, seu proprietates iis contineri, quàm quæ à Geometriâ considerantur, scilicet æqualitas, inæqualitas, ratio, proportio, &c. nec alias ferè consideravit Cartesius, quàm quæ magnitudinem ejusque divisionem consequuntur, scilicet numerum, figuram, situm; motum enim & quietem, quæ sine controversiâ proprietates sunt Physicæ, seu propria corporis naturalis attributa, non à corpore naturali oriri putat Cartesius, sed à solo Deo, ac proinde secundum Cartesium inter ejus attributa propria recenseri minimè possunt. Attributa enim propria à propriis

luis subjectis existere, & necessario emanare semper docuerunt & crediderunt Philosophi, secus nec necessariam cum eis connexionem habere possent, neque de iis demonstrari.

Quis autem hactenus credidit non alia esse principia corporis naturalis quam punctum, lineam & superficiem, non alia ejus attributa propria quam æqualitatem, rationem & proportionem? hæc quidem corpori naturali conveniunt ratione magnitudinis, quæ est affectio ejus propria, non autem ejus essentia. Non tamen sunt solæ proprietates corporis naturalis, sed imprimis motus & quies, tempus, locus, lux, calor, frigus, humiditas, siccitas, odor, sapor, cæteræque affectiones sensiles, quæ ex corporis naturalis principiis existunt, non autem ex puncto, lineâ & superficie; quarumque non nisi fictitias & phanaticas

rationes assignat Cartesius, ex phantasticis ejus falsisque principiis deductas, nusquam autem veras attingit.

Quid jam de speciebus magnitudinis finitæ dicam, de cono, cubo, pyramide, &c. quæ regularia dicuntur à Geometris corpora, an eadem illa sunt naturalis considerationis corpora, caelestia scilicet & elementaria, sol, cælum, luna, sidera, ignis, aër, aqua, terra, fossilia, lapides, metalla, plantæ, animalia, & eorum genera, species & affectiones? Hæcine omnia geometricis principiis constant & ex iis oriuntur? Hæc satis indicant iis, qui liberi sunt à præjudiciis, ut loqui solent Cartesiani, ne levissimam corporis naturalis notionem habuisse Cartesium, neque Physicæ proinde ullam, quæ totam suam rationem à corpore naturali desumit.

Jam verò attributum corporis naturalis præcipuum non aliud est

quàm mutabile , seu , ut nonnullis placet , minùs tamen rectè , mobile ; quæ malè confunduntur : cùm mutabile latiùs pateat mobili , ut mutatio latiùs patet motu. Multæ enim sunt mutationis species quæ propriè non sunt motus , hæc pro jure suo & sine ullâ ratione , ut solet , Cartesius confudit , nec aliam agnoscit mutationem aut motum , cum suis phanaticis corpusculis , quæ nusquam sunt , quàm motum localem. Motûs autem localis , omnium ferè judicio , falsam notionem habuit , quæ rebus immotis magis quàm motis conveniat. Quidquid id est , cùm motûs falsam notionem habuit , non potuit habere veram mobilis notionem , quæ tota deducitur à motu. Ergo attributi Physici de corpore Physico demonstrandi nullam aut non nisi falsam notionem habere potuit Cartesius ; igitur certum est eum ne levissimam rectam

Physicæ scientiæ notionem habere potuisse. Omnis enim scientia continua quædam est demonstratio, ut mox dicemus, de subiecto certi aliqujus rerum generis à genere quodam primo ejusque principiis ad ultimas ejus species deducta. Igitur si Physica dicenda sit scientia, erit demonstratio, demonstrationis hujus subiectum est omnium judicio corpus naturale, & attributum mutabile seu mobile, aut mutatio seu motus. Medium autem hujus demonstrationis, & omnis veræ demonstrationis est ipsa ratio subiecti, quæ ex ejus principiis existit.

At enim Cartesius nullam habuit corporis naturalis notionem, nullam principiorum ejus, nullam motûs aut mobilis. Ergo nullam omninò Physicæ disciplinæ notionem habuit.

Sed ne quidem unquam scire visus est quid sit scientia universè sumpta, nisi memoriâ, ut pueri; seu

VIII.
Ne quidem
quid
scire sit
noyit.

quid sit demonstratio, quia omnis demonstratio intendit ostendere propositionem necessariam, cujus attributum necessariam habet cum subiecto connexionem, neque alia demonstrari potest; nullum autem attributum proprium habet conjunctionem necessariam, nisi cum proprio subiecto, à quo necessariò emanat, ita ut ratio subiecti & principia ejus percipi minimè possint, quin ex iis statim colligi possit illud attributum quod ab iis necessariò proficiscitur. Ita intelligi minimè potest corpus naturale, ejusque principia materia & forma seu actus & potentia, quin statim intelligatur mutabile, quia nihil aliud est mutabile, quàm illud quod ita est, ut possit aliud, aut aliter esse. At quod constat materiâ & formâ, actu & potentiâ, ita est ut possit aliud esse vel aliter esse. v. c. Lignum quod est actu lignum, & potentiâ ignis ratione

materiae suae, potest aliud esse, & ita mutabile esse, ut aqua quae est actu frigida, ratione potentiae suae potest calefieri & aliter esse. Quod idem dicas de cæteris corporibus naturalibus quae per se & ratione suâ, materiâ constant & formâ, & necessario sunt mutabilia, seu mutabilitas eorum essentiam necessario consequitur, ex eoque existit & emanat.

At enim motus secundum Cartesium, non existit neque emanat à corpore naturali ejusque principiis, sed à solo Deo. Nullum enim principium motûs in rebus agnoscit naturalibus, sed in solo Deo. Ergo motus non habet necessariam connexionem cum corpore naturali, neque de eo demonstrari potest. Unde certum est Cartesium nullam omninò habuisse scientiae universae notionem, neque novisse, quid sciri, seu quid demonstrari possit.

D. Quomodo Cartesius potuit res omnes omniaque naturæ phænomena explicare, si nullam omnino scientiæ Physicæ notionem habuisset?

M. Non res naturales exposuit Cartesius, sed suam fabulam ex phanaticis hypothesebus ortam, iisque reverà impossibilibus, causas naturales nullatenus attigit. Finis nullam haberi voluit in Physicis rationem, causam nullam agnovit secundam efficientem, quæ sit principium motûs, formam penitus ignoravit, nec quid materia naturalium rerum sit omnino novit, in solâ imaginatione totus hæsit, nec in ejus Physicâ est rationi locus, neque umbra rationis universalis ulla in ejus opere Physico comparet.



CAPUT XV.

De Cartesianâ Mundi Fabricâ.

I. *Cartesii Mundi fabrica seu fabula Christiano Philosopho prorsus indigna, Philosopho quidem, quia nulla ex eâ erui potest scientia.* II. *Nulla probabilis opinio.* III. *Durare nequit.* IV. *In continuo non sunt partes ætudi distinctæ.* V. *Indigna Christiano, quia nec Dei sapientiam, nec ejus providentiam indicat & manifestat.*

D. **Q**uid tu de Cartesianâ Mundi fabricâ censes?

M. Censeo eam esse fabulam Philosopho & Christiano prorsus indignam.

D. Quare Philosopho est indigna?

M. Quia ex eâ nulla unquam erui potest scientia, imò ne quidem opinio aliqua probabilis.

D. Quare nulla potest ex eâ erui scientia?

I.
Cartesii
Mundi
fabrica
Philo-
sopho
indigna
quia
nulla ex
eâ erui
potest
scien-
tia.

M. Quia scientia, omnium Philosophorum judicio, est tantum de rebus necessariis, deque iis quæ non possunt aliter & aliter se habere. Sed secundum ipsum Cartesium, & ejus sectatores omnes, aliter oriri, condique potuit Mundus, & reverà ortus est aliter ipso fatente Cartesio, Christianis & Judæis omnibus. Ergo ex his nulla unquam hauriri potest scientia.

D. Fatetur quidem Cartesius, ut hominem decet Christianum, Mundum esse factum, eo modo quo Geneseos primo refertur; Verum ut perfectius cognoscatur, existimat esse procedendum ad ejus ortum, aut expendendum modum, quo posset oriri, aut ex quibus, ut ita dicam seminibus prodire posset, fatetur quidem aliter fieri posse, neque video Cartesianos admodum esse sollicitos de ratione scientiæ, modò probabiliter constet Mundum eo modo

modo quem tradit oriri posse, qui valdè simplex esse videtur & facilis; tria enim tantùm postulat Cartesius, 1^o Ut materia tanta creetur, quanta Mundo condendo sufficit; 2^o Ut ea secetur aut dividatur in partes satis exiguas, easque cubicas, aut quasi cubicas. 3^o Ut hæ partes circà sua centra volvantur & rotentur; cætera sponte suâ nascitura, ex decussis cubicarum partium angulis prodituram materiam subtilem, quæ primum sit ejus elementum, ex quâ stellæ coalescant, cubicas tum partes evasuras in globulos, qui secundum sunt ejus elementum, ex quo cæleste medium constet; ex primi verò elementi partibus sæpè coalescentibus, formari tertium elementum, quod modò crassam, modò striatam vocat materiam. Ex quâ fiant planetæ & cometæ, qui planetæ sunt, quique planetæ veræ sint terræ. Ex iisdem planè principiis

Q

eodem modo motis, ex quibus nostra conflata est terra; & eadem proinde aut similia prorsus effecta producturæ, scilicet meteora, fossilia, lapides, metalla, plantas, animalia quæque perfecta, & ipsos etiam homines, ut multis placet Cartesianis.

M. Saltem fateantur necesse est, ex his nullam erui posse scientiam. Nec miror eos non admodum esse sollicitos de scientiâ, quia reverà nunquam vidit aut intellexit Cartesius quid esset scientia. Igitur certum est, quod multoties diximus, his phanaticis inventis omnem à Scholis nostris Phisicam scientiam ejectam esse, quia res aliter esse potuerunt.

II. Nul- Sed ne quidem opinio probabilis
la pro- ulla ex his erui potest, quia non
babilis modò improbabilia, sed penitus im-
opinio possibilis sunt. 1^o Enim negat D.
quia Thomas, & rectè negat materiam
materia

penitùs informem, quæ nihil aliud ^{creari}
fit quàm materia posse creari. A. I. ^{nequit,}
q. 66. 1. p. in c. Quia reverà ma- ^{nec di-}
teria quâ materia, seu quæ nihil ^{vidi,}
aliud fit quàm materia, est mera ^{nec mo-}
puraque potentia Physica; licet ^{veri.}
enim id quod est materia sit aliquid,
v. c. lignum quod est materia ignis
est aliquid quâ lignum, sed quâ ma-
teria ignis, nihil est nisi potentia
ignis, seu quia potest ignis esse, &
sub hâc ratione, nec essentiam, nec
quantitatem, nec qualitatem habet
ignis, aut alterius cujuscumque rei,
quâ materia præcisè est. Habet ta-
men rationem materiæ respectu
ignis, quia est ignis potentia, ex eo
enim fieri potest ignis, neque ob
aliam rationem est materia, sicut
homo non est homo quia est albus
aut niger, sed quia est animal ra-
tionale, & materia ita sumpta nus-
quam est nisi in solâ mente, quem-
admodum circulus purus & præcisè

sumptus, qui nihil aliud fit quàm circulus, nusquam est nisi in solâ mente. Imò vero secundùm Divum Thomam eodem articulo facilius foret accidens sine subiecto stare, ut reverà fit in Eucharistiæ Mysterio, quia est actus aut forma aliqua, quàm materiam sine formâ, quia materia sine omni formâ & præcisè sumpta, est, ut jam diximus, mera potentia. Et quotquot primam materiam actum aliquem includere putant, ut primi & nostri nunc Philosophi, illi formas omnes ei advenientes accidentales esse putant; nullam formæ substantialis, nullam veræ generationis, nullam rei Physicæ notionem habere possunt, quia prima principia prorsus ignorant.

Notus quidem est error Cartesii satis crassus, & ex summâ mentis humanæ ignorance profectus, quo credidit is res esse, aut saltem esse

posse eo modo quo concipiuntur à mente nostrâ, qui longè gravissimus est, alio enim longè modo res fiunt, alio concipiuntur; fiunt per applicationem formæ ad materiam, fiunt per conjunctionem & compositionem; concipiuntur per abstractionem formæ à materiâ, seu per præcisionem subjecti à formâ, fieri tamen eodem modo res nequeunt, neque forma sine materiâ, neque materia sine formâ, sed simul fiunt, generantur ac creantur. Quæro tandem quid sit illa materia, de quâ tam sæpè tum Cartesius ipse, tum ejus sectatores loquuntur.

D. Est substantia extensa.

M. Superiori capite mox ostendimus eam quam sequuntur substantiæ divisionem, summam sapere Logicæ, Physicæ & Metaphysicæ, corporis naturalis & mentis ignorance, & secundum ipsum Cartesium extenso est accidens cu-

jus immediatum subiectum est corpus, quod proinde debet esse constitutum in esse, ut Schola loquitur, & ratione corporis priusquam ipsi accidat extensio, aut si extensio dicatur differentia corporis, ut nonnunquam asserit Cartesius, in hac re valdè inconstans sibi, materia, quæ substantia dicitur extensa, erit verum corpus, & reverà nonnunquam hæc tria à Cartesio confunduntur, extensio, materia, corpus.

Verùm quo modo primum principium corporis potest esse corpus, nisi sit principium sui-ipsius; prima enim principia corporis, sunt ea quæ neque ex se invicem, neque ex aliis, sed ex quibus omnia sunt corpora; si materia sit corpus, & primum corporis principium, erit sui-ipsius principium. Quod quàm falsum sit, omnes facilè vident; sed reverà neque corporis naturalis neque materiæ, neque primi principii corpo-

ris naturalis notionem ullam habuit
Cartesius.

D. Vellem tamen ut ei suam
concederes materiam, ut videamus
quo modo ex eâ suum conficiat
Mundum?

M. Dividendam eam censeat Car-
tesius in partes exiguas quasi cubi-
cas & æquales, eaque circa centra
sua convolvendas aut rotandas. Hic
rursus impingit in solitum suum er-
rorem Cartesius, abstrahendo à qua-
litatibus & affectionibus hujus suæ
extensæ substantiæ, quæ licet concipi
possit sine suis affectionibus, omnibus
esse tamen nequit sine quibusdam,
erit ergo illa substantia extensa, li-
quida seu fluida, vel solida seu dura,
vel similes habebit affectiones. Si
liquida sit aut fluida, non potest
dividi, ita ut partes divisæ consistent,
suisque terminis sese contineant; li-
quida enim fluidaque corpora facile
quidem dividi possunt, sed statim

divisæ partes coalescunt; ut patet in aquâ & aëre, cæterisque liquoribus.

D. Ante divisionem fingi poterit solida, & per divisionem evadere fluida.

M. Scio quidem id velle Cartesium, qui cæleste medium vult esse fluidum, natum ex divisione materiæ, ut velle videtur. Sed pace dicam ipsius, id contrà omnem experientiam fingi, quâ constat corpus aliquod solidum & durum, solâ divisione nunquam evadere liquidum aut fluidum; quare si nunc fluidum sit cæleste medium, semper tale fuit, & dividi minimè potuit, aut alio modo quàm per solam divisionem, factum est fluidum, quem modum nondum nobis revelavit Cartesius naturæ vates.

Jam verò si solidam eam materiæ molem fingamus, nullique neque inani, neque liquido permixtam, ut fingit Cartesius, quo modo sin-

gulæ partes possunt ita rotari circa centra sua, ubi nullum est spatium vacuum, nullumque medium fluidum, quod cedat; sed omnia æqualiter solida & dura, ita ut unum non facilè concipi possit alteri cedere: hîc hærent somniatores & fabulatores nostri, nec aliter hinc emergere possunt, quàm recurrendo ad divinam omnipotentiam, si quis credat Deum miracula facere velle, ut phanatica Cartesii promoveat inventa, contrà rationem & naturalem ordinem rerum & cursum excogitata.

D. Potest illa materiæ congeries dividi simul & moveri divinâ saltem omnipotentiâ.

M. Potest quidem simul tempore licèt idipsum difficile possit concipi, sed necesse semper est naturæ causæque ordine divisionem præcedere motionem, quia prius esse concipi debent partes, quàm moveri; fiunt

autem ejusmodi partes distinctæ per divisionem, ergo dividi prius debent quàm moveri.

III.
Durare
nequit.

Deinde cùm motus ille fingatur à Cartesio vehementissimus, & soliditas aut durities corporis nihil aliud sit secundùm ipsum, quàm quies partium corporis, necesse prorsus est eo motu partes omnes commoveri, quietem eam tolli, & partes illas undique dissilire, rapidissimo partium omnium in omnes partes motu. Nec facilè capio, quare tum potius decutiantur anguli, quàm latera concutiantur, totaque partium omnium moles in pulverem abeat minutissimum materiamque subtilem, ac tota moles statim in ipso suo ortu stella fiat aut sol, qui universum complectatur & compleat Mundum atque comburat.

Quin etiam idem brevi necessario sequi debet ex ipsâ perpetuâ globorum attritione, qui tandem in

materiam abeant subtilem necesse est; licet enim modum aliquem præscribere videatur Cartesius augmento materiæ subtilis, cum docet ejus partem aliquam in materiam crassam partium implicatione degenerare; ea tamen satis exigua est, nec omninò sufficit, si cum reliquâ materiâ subtili comparetur; quæ continuò semper oritur ex globorum attritione, qui brevi penitus exhauriri & in subtilem materiam resolvi debent, cum nullum præsertim Cartesius invenit modum, quo reparentur, nec reparari posse facilè videantur, unde necesse est totam hanc Cartesii Mundi fabricam brevi dissolvi, & singulis non modò annis, sed mensibus ac diebus sensibilibiter mutari. Licet ejus modi sensibilis rerum mutatio vix unquam compa-
ruerit.

Nec satis intelligo, quare subtilis materia potius ad centrum confluat,

quàm globosa, & quare illa potiùs quàm hæc celerius moveri dicatur, cùm eodem impulsu moveri fingantur fluminis instar, neque credam facilè ex illâ subtili materiâ solem stellasque constare posse quæ tantum lumen effundant.

Mirari satis non potui, quomodo tam paradoxa, tam inconcinna, tam ridicula fabula placere potuit, hominis præsertim qui nullam omninò scientiæ Physicæ, nullam omninò corporis naturalis notionem habuit.

IV. In
conti-
nuo
non sūt
partes
actu di-
stinctæ.

His addo medium cæleste, si fluidum sit, ut esse perhibetur à Cartesio, & nunc vulgò creditur, esse quoque continuum, nec posse ex ejusmodi partibus secretis ac distinctis sive globulis, sive aliis constare, quia fluida non possunt se suis terminis continere, sed in unum statim confluunt, ut patet in duabus grandinibus, quæ ubi calore solvuntur, statim

statim in unum coalescunt continuum, cujus partes nullo modo actu distinguuntur, cum non habeant nec habere possint extrema distincta, quibus contineantur, & à se invicem secernantur & distinguantur.

D. Verum enim-verò omnium judicio partes quæ possunt à se invicem separari distinguuntur; sed partes continui possunt à se invicem separari; ergo distinguuntur.

M. Partes quidem quæ separari possunt à se invicem per veram & propriè dictam separationem, quæ opponitur conjunctioni; eæ distinguuntur non minùs ante quàm post separationem, quia habent extrema distincta; sed partes quæ separantur per divisionem ante divisionem non erant distinctæ, sed unum; quia non habebant extrema distincta; divisio autem tollit unitatem & facit distincta, quæ ante divisionem non erant distincta, separatio supponit distin-

ctas partes in rebus contiguas & conjunctis, divisio autem facit distinctas in continuo partes, quæ ante divisionem non erant actu sed potestate distinctæ. Vix ante decimum-sextum sæculum aut certè rarissimè audita est illa partium actu distinctarum in continuo doctrina, quæ in Hispaniâ primùm exorta est, & à Suaretio inuenta, quæ huic corpusculari Physicæ præbuit originem & indissolubiles parit de infinito lites hodie.

Itaque partes in continuo homogeneo nullo modo distinguuntur nisi potestate tantùm aut designatione, quando notantur, aut quando per varias formas ad varia & diversa destinantur officia. Eadem enim est moles massaque materiæ in rebus omnibus sublunaribus, quæ in varias partes ab artifice Deo dividitur, & per diversas formas ad diversos usus & officia diversa destinatur, quemadmodum est eadem lapè

massa luti in figuli officinâ, quæ se-
catur & dividitur in varias partes
distinctas, & ad varios usus per di-
versas testarum formas destinatur.
Oritur numerica distinctio ex solâ
divisione, generica verò vel speci-
fica ex variis formis propter diver-
sos usus & officia seu functiones di-
stinctas, sive in eâdem, sive in di-
versis rebus.

D. Quare tu dixisti hanc Carte-
sii fabulam esse indignam homine
Christiano?

M. Quia nec divinam manifestat
in rebus condendis sapientiam, ne-
que ejus in iis regendis & guber-
nandis providentiam. Neque om-
ninò valdè dissimilis est Epicuri &
Democriti rerum ortui, atomis tan-
tùm in pulverem commutatis, &
quidquid dicant Cartesiani, non
aliis legibus motus atomi quàm pul-
vis agi aut cieri potuerunt, si Car-
tesio penitus credamus; quia hæc le-

V. In-
digna
Chri-
stiano,
quia
nec sa-
pientiâ
nec Dei
provi-
dentiâ
manife-
stat.

gesa ut regulæ non ex aliquâ providæ mentis dispositione prodierunt, sed ex solâ necessitate & naturâ materiæ quæ in atomis Epicuri & Cartesii pulvere, non naturâ, sed mole tantum & figurâ potuit esse diversa; & sic modò æternam ponamus materiam, quam lubenter velle videretur Cartesius, nisi fides obesset Christiana, cui vix in hâc re placidè cedit Cartesius, qui non magis concipere potuit quomodò ex nihilo prodire potuerit, quàm in nihilum abire Mundus. In nihil enim abire Mundus nequit, quàm relinquat spatium vacuum quod etiam divinitus impossibile esse putavit. Sed nec incipere potuit Mundus aut condi nisi in spatio quodam vacuo quod esse nequit. Quare secundum Cartesium semper fuerit necesse esset, neque enim facilè lubensque credit Cartesius rebus naturalibus nisi quod clarè distinctèque posset concipere, suamque

mentem humanæ rationis quasi metam aut terminum nonnunquam esse voluit, vir rationis exiguæ, sed imaginationis immensæ, quique leviter admodum omnium judicio in Logicis versatus est, & meo judicio ne leviter quidem in Physicâ, cujus nullam omninò notionem habuit, cum ne quidem unquam quid sit corpus naturale vidit.

Credam scilicet ego ex simplici, ut Cartesiani loqui solent, triplicis phanatici pulveris impulsu, phanaticis Cartesii legibus & nutui obtemperanti, prodire & coalescere potuisse, ac tam diu constare Mundum hunc aspectabilem, tam pulchrum, tam constanter in ordine suo perseverantem, tam ornatum, ut *κόσμος*, hoc est ornatus ipse ab hominibus Græcis non indoctis diceretur; qui ejus speciem, formam, nitorem, splendorem minimè potuerunt intueri, quin faterentur esse

aliquod numen præstantissimæ mentis, quo regeretur.

Nec aliunde potentius & efficacius argumentum desumit ipsa Scriptura Sacra, ut omnibus hominibus indicet esse Deum; cum dicit *Invisibilia enim ipsius à creaturâ Mundi per ea quæ facta sunt, intellecta conspiciuntur. Sempiterna quoque virtus ejus & divinitas, ita ut sint inexcusabiles.* Et aliis locis, *Celi enarrant gloriam Dei, & opera ejus annunciat firmamentum. Domine Dominus noster, quàm admirabile est nomen tuum in universâ terrâ! &c. Quoniam videbo celos tuos opera digitorum tuorum, lunam & stellas, quæ tu fundasti.* Et alibi locis benè multis. Credam ego belluas quasque perfectas ipsos homines in quorum corporibus tanta partium internarum & externarum varietas conspicitur, tantis ordine, symmetriâ, proportionem dispositarum ex simplici pul-

veris impulsu existere potuisse, ne quidquam de admirabili animorum naturâ dicam.

Credam in corporibus naturalibus, in plantis, in animalibus nullum inesse principium motûs, nullam vitam, nullum sensum in rebus ipsis, nullas aut vix ullas affectiones inesse sensiles, in igne nullum calorem, frigus nullum in aquâ, has affectiones conceptiones esse mentis non rerum qualitates. Propter hominis Physicæ penitus ignari auctoritatem, non ita insaniam.

Quid quod in rebus naturalibus nullam finis rationem aut considerationem haberi velit, & ita omnem providentiæ contemplationem sustulerit; adeò ut hæc Philosophandi ratio si non latam ad ἀθεϊαν, at certe ad ἀπορροϊαν sternit viam homine Christiano prorsus indignam. Apage phanatica ista inventa ex crassâ ignorantia, socordia & inertia

prorsus enata, quorum jam pudere debet, & aliquando certè pudebit Christianos Philosophos.

C A P U T X V I.

De Cartesianis Motûs regulis.

I. Omnes sunt falsæ. II. Deus nec materiam nec motum in certâ quantitate creavit. III. Corpus naturale non permanet in eo statu in quo primum positum fuit. IV. Corpus non semper rectè movetur. V. Tertia Cartesianæ regula est falsæ.

D. **Q**uid de Cartesianis motûs regulis censes?

I. Omnes sunt falsæ.

M. Censeo eas omnes esse falsas & ex falsis tum corporis naturalis tum motûs notionibus ortas. Neque enim unquam vidit aut novit Cartesius, quid esset corpus naturale, aut quid motus.

D. Ergo non credis Deum ab initio certam materiæ motûsque quan-

ritatem creasse, quæ semper eadem perseveret in totâ mole materiæ, licet eadem minimè perseveret in singulis ejus partibus: sed modò major in unâ parte, & in aliâ parte minor.

M. Nihil tale credo, phanaticum esse puto figmentum, qualia Cartesio sunt familiaria, & ut sine ullâ ratione asseritur, ita sine ullâ negari potest. Addam tamen & fidei & rationi esse contrarium. Fidei quidem quia tale nihil refertur in distinctâ Mundi creatione Geneseos primo, neque in Traditione. Rationi verò quia jam ostendimus materiam illam Cartesii nullâ ratione posse creari, multò minùs motum qui ne momento quidem stare potest aut solet sine movente, non modò primo, sed secundo secundùm naturæ ordinem; quia motus est actus omninò imperfectus, qui non minùs dependet à movente quàm à mo-

II.
Deus
nec ma-
teriam
nec mo-
tum
creavit
omni-
nò mul-
tò mi-
nùs in
certâ
quantità-
tate.

bili; unde definitur actus moventis & mobilis, ab illo continuo fluit, in hoc recipitur, & ubi nullum est movens, nullus est motus.

D. Certè concedes corpus omne in eo statu permanere in quo primum positum est, nisi ab alio status ille mutetur.

M. Falsissimum est istud Cartesii pronunciatum, & ex falsissimâ notionem corporis naturalis ortum, quod Cartesius non tantum re, sed & ratione confudit cum corpore geometricè sumpto; unde nullam nec Physici corporis, neque Physicæ disciplinæ notionem habuit: corpus enim naturale habet in se principium motûs & quietis. Sic videmus plantas exiguas oriri & animalia parva nasci ac paulatim crescere, donec ad debitam suæ speciei perveniant magnitudinem, in eâque perseverare per aliquod tempus, postea verò sensim deficere ac decre-

III.
Corpus
natura-
le non
perma-
net in
eo statu
in quo
primū
positum
est.

scere. Et hoc novimus ab insitis iis principiiis & causis procedere, non autem à solis corporibus externis. Ita videmus animalia modò currere, modò stare nullo prorsùs impellente corpore, modò dormire, modò expergisci, ac se movere ab insitis principiiis, non autem tantùm à corporibus externis. Si verò de corporibus inanimatis agatur, ea solent in locis naturalibus ubi primò formari solent, quiescere, aut eò tendere, si alibi formentur, quia ibi meliùs quàm alibi conservantur ab affinibus sibi corporibus, & temperiei similitudine convenientibus, nisi vi ab iis locis detineantur aut dimoveantur, & ubi primùm vis amota fuit, ad locum suum naturalem redeunt. Sic lapides vi ex terræ centro abstracti, amotâ vi statim decidunt sine ullâ subtili materiâ planè fictitiâ & phanaticâ, quæ nusquam nisi in imaginatione com-

paret. Sic vapor ex ollâ emergens operculo detentus & compressus, eo amoto statim emicat, & sursum fertur in locum sibi naturalem, ubi liberiùs, ut exigit, diffunditur, faciliùs propagatur, ad perfectum quò tendit statum pervenit, ac meliùs & faciliùs conservatur.

D. Existimo te non secundam Cartesii regulam negaturum, quâ docet corpora mota secundum rectam lineam moveri, nisi impedian-
tur, quia ea linea est brevissima.

IV.
Corpo-
ra non
semper
rectâ
moven-
tur.

M. Non est semper vera, quia motus est proprietas & affectio corporis naturalis, qui modò circularis, modò rectus est. Nonnulla enim corpora non minùs desiderant motum circularem, quàm alia rectum; & quoniam circularis est perfectior & naturæ ordine prior, ideò tribuebatur olim cælestibus corporibus; rectus autem elementaribus, nunc autem ubi rerum ordo pervertitur,
&

& nullæ rationis, sed imaginationis ratio habetur, elementaria corpora circumagi creduntur; quidquid id est, siue cælestia siue elementaria circumagantur, motus ille qui tam constanter perseverat, naturalis est, nam si violentus foret, non tam diu durare posset. Igitur motus circularis non minùs naturalis est quàm rectus; & ita non semper vera est Cartesii regula: ne quidquam dicam de animalibus quæ in omnem partem sine ullâ tali regulâ moventur, quæ Cartesius nec animâ, nec sensu prædita esse credidit. Quid prætereà de ventis, de turbinibus & fulminibus, an ea semper rectâ moventur.

D Quid de tertiâ Cartesii regulâ censes?

M. Ea duas complectitur partes, quarum prima est, corpus motum occurrens fortiori, reflectitur unde venit, retento suo motu, & mu-

V. Tertiâ Cartesii regula est falsa.

tatâ ejus determinatione. Cartesii interpretes dicunt eam valere in corporibus quidem elasticis, non autem in duris inflexibilibus, qualia fingit Cartesius. Verùm pace dicam ipsorum, non est idem motus neque specie neque numero; non numero, quia motus fit interruptus & veluti divisus in puncto reflexionis; non specie, quia motus reflexus alios habet terminos à quo & ad quem, à quibus motûs species desumitur, iique termini sibi sunt oppositi.

D. Si non sit idem motus, à quo procedit motus reflexus?

M. Procedit à corpore quod revehit mobile, illudque revehit ut manifestè patet in maris accessu & recessu, si quidem mare seu aqua recedens secum revehit corpus quod avexit, sic fluctus allidens aliquod corpus ad rupem seu scopulum, recedens secum revehit illud corpus; quod idem sine controversiâ præstat

aër; unde graviora corpora non re-
vehit, quia decidunt, nunquam
enim est motus sine movente, &
ultimum corpus movens semper
tangit mobile.

Secunda pars hujus regulæ est
corpus motum debiliori occurrens,
quantum ei motûs communicat,
tantùm de suo deperdit. Non tan-
tùm modò, pace Cartesii, sed lon-
gè plus sui motûs amittit, quàm
communicat; quia impetus deve-
hentis aut proximè moventis cor-
poris frangitur & reflectitur, ac sem-
per minor est, ut quotidianâ con-
stat experienciâ.

Reliquæ verò Cartesii leges ac
regulæ Mathematicis nituntur sup-
positionibus & præcisionibus, eaque
fatente Cartesio desiderant corpora,
qualia nulla sunt in rerum naturâ.

Quamobrem eas Physicâ consi-
deratione minimè dignas esse reor.
Expendant eas qui Cartesii mirari

solent ingenium phanaticis fictionibus fecundum. Ego quod in eo mirarer Physico dignum nihil inveni. Non enim ille Mundum à Deo factum contemplatur, sed imaginarium suum Mundum, qui non aliunde duxit originem, quàm ab ejus cerebro, à quo processit.

CAPUT XVII.

De modo tradendi scientiam.

I. *Quid una scientia sit?* II. *Quod subiectum attributionis Physicæ?* III. *Quæ ejus principia causæque?* IV. *De primario attributo Physicæ.* V. *De secundariis.* VI. *De universâ Mundi compage.* VII. *De simplicibus corporibus.* VIII. *De mixtis.* IX. *De animatis.*

D. **Q**uid primò sciendum?

M. scientiam unam agere tantum de rebus unius generis, quæ ex iisdem primis principiis existunt; ita corpora omnia naturalia

sunt unius generis, quia ex iisdem primis principiis fiunt, materiâ scilicet & formâ, & ita corpus ipsum naturale, primum est genus omnium corporum naturalium, de quo jam sæpius diximus, illudque ab arte factum & corpore geometricè sumpto distinximus, quæ diversa habent principia & affectiones speciesque planè diversas, & proinde corpus naturale primum est Physicæ scientiæ subiectum attributionis.

D. Quid vocas subiectum attributionis?

M. Voco illud de quo aliquod attributum asseritur seu prædicatur, quod Scholæ communiter nunc vocant objectum; sed melius meo iudicio dicitur subiectum attributionis.

II.
Quod
subje-
ctum at-
tribu-
tionis
Physi-
cæ.

D. Quare melius subiectum attributionis quàm objectum?

M. Quia omnis scientia in actu spectata est quædam demonstratio; demonstrationis autem, omnis sco-

pus est aliquod attributum de aliquo subiecto, cum quo necessariam habeat connexionem, demonstrare, per propriam attributi & subiecti notionem, quæ ex propriis subiecti principiis eruitur, in quibus ipsa primi attributi ratio reperitur, ut diximus agendo de demonstratione.

D. Quando sciam proprium aliqujus scientiæ, v. c. Physicæ subiectum?

M. Scies si habeat quatuor conditiones. Prima, si sit præcognitum, & omnibus quodam modo notum, ita ut de illius existentia nemo dubitet. Secunda, ut sit substratum seu subiectum omnibus quæ in illâ scientiâ considerantur, & eorum veluti basis & fundamentum. Tertia, ut sua certa habeat principia, certasque affectiones ex his principiis ortas. Quarta, ut nec latius nec minus latè pateat quàm ipsa scientia, sed ei sit adæquatum, seu cum

eâ reciprocè convertatur. Sic corpus naturale quod est proprium Physicæ attributionis subiectum, omnibus est quodam modo notum; nemo sanæ mentis de ejus existentia dubitat, est subiectum omnium quæ in Physicâ tractantur, sua certa habet principia certasque affectiones, nec latius nec minus latè patet quàm Physica.

D. Quid postmodum faciendum? III.

M. Hujus subiecti investiganda sunt principia prima ex quibus fit & componatur, si compositum sit. Quæ
ejus
princi-
pia &
causæ. Ex iis enim ejus eruitur ratio causæque investigandæ universales, quæ ad totum genus pertinent. Ita materia & forma sunt prima principia corporis naturalis, primæque causæ internæ ex quibus fit: externæ verò causæ primæ sunt efficiens & finalis, quæ sunt unus Deus, à quo omnia sunt corpora, & propter quem sunt; omnia enim pro-

pter semetipsum fecit Deus ; præter quem sunt secundæ & speciales causæ tum efficientes tum finales pro variis corporum speciebus.

IV.
Quod
attribu-
tum pri-
mariū?

D. Quid subiecti attributionis observationem sequitur?

M. Ipsum primarium ejus attributum, quod illud necessario sequitur ex ejus principiis oritur, ac illud per totam scientiam comitatur.

D. Quodnam autem est illud attributum in Physicâ?

M. Est mutabile mutatione Physicâ seu naturali; quæ accidit substantiis seu corporibus naturalibus, secundum substantiam & affectiones suas consideratis, quæque propriè vocantur mutationes sensiles, quales sunt generatio, corruptio, variatio, seu alteratio, accretio, decretio, & latio seu motus localis; nam quæ fiunt secundum mentem & voluntatem mutationes, eæ non

sunt sensiles nec Physicæ considerationis, hujus autem mutationis seu mutationum causæ propriæ diligenter inquirendæ universè, primò in corpore universè spectato, tum verò specialiter in singulis corporum speciebus.

D. Quid post mutationem expendendum?

M. Quæ mutationem omnem sequuntur.

D. Quænam sunt illa?

M. Magnitudo, locus, tempus, continuum, finitum, infinitum, vacuum, & procedendum usque ad primam motûs seu mutationis omnis causam, Deum, ut plena sit perfectaque motûs scientia.

V. Quæ
secun-
daria
attribu-
ta.

D. Quare hæc necessariò sequuntur mutationem?

M. Quia mutationum prima in naturalibus est latio seu motus localis, sine quo nulla est variatio seu alteratio; nihil enim variari potest, nisi movens seu varians accedat ad

id quod variatur, aut vice versâ. Non incalefcit manus, nisi accedat ad ignem aut ignis ad eam, sine præviâ variatione seu alteratione non fit generatio seu corruptio, nec accretio seu decretio. Unde latio est prima mutatio; quod autem loco movetur intelligi nequit sine loco, unde loci consideratio est necessaria; quidquid autem à loco in locum movetur, partim est in termino à quo, partim in termino ad quem, partes proinde habere debet & magnitudinem aliquam, indivisibile enim non potest moveri; non potest enim simul esse in termino à quo & in termino ad quem, sed successivè; hinc temporis consideratio sequitur. Quoniam autem magnitudo, motus & tempus continua sunt, ut hæc plenè perfectèque intelligantur, continui consideratio desideratur, & videndum an partes in eo actu distinguantur, an potestate tantùm, an hæ partes fi-

nitæ sint aut infinitæ ; & ita videntum quid finitum aut infinitum : & quoniam multi vix motum localem fieri posse credunt sine vacuo , videndum an & quid illud sit. Denique motus omnis oritur ab aliquo primo movente , hinc considerandum an sit primum movens & quid sit. Et ita finitur corporis universè sumpti consideratio.

D. Post considerationem generis , quid considerandum subit ?

M. Dividi statim deberet genus in proximas suas species ; sed prius universa Mundi compago generali quodam intuitu considerari non malè solet , ejus origo & duratio investigari & expendi , in quâ omnes omninò Philosophi , Plato , Aristoteles , Anaxagoras , Epicurus , Democritus , & turpiùs cæteris Cartesius erraverunt , quia hæc nullo modo sciri possunt , sed conjiciendo & divinando tantùm leviter concipi,

VI. De
universa
sâ Mundi
compago
page.

nobis verò felicioribus temporibus natis constat, Mundum à Deo ex nihilo creatum esse. Huic revelationi firmiter adhærere debemus, nec vanissimis seduci conjecturis, ex quibus nulla unquam existere potest scientia.

Hinc Mundi author agnoscendus & adorandus est Deus, isque in rebus omnibus, quantum fieri potest, considerandus; eaque philosophandi ratio cæteris præferenda, quæ nos in Dei cognitionem adducit, & ostendit omnia & singula à divinâ quâdam & sapientissimâ mente, prodire, regi ac contineri.

Idem Deus rerum omnium finis est, quia Deus omnia propter se- ipsum fecit; hæc tamen contemplatio neque propiores rerum fines ultimo fini subjectos, neque causas secundas efficientes primæ subordinatas, quæque suam omnem ab eâ derivant vim & efficaciam, aut earum

rum contemplationem amovere debet. Neque enim Philosophus tantum generales, sed speciales & proprias singularum rerum causas investigare debet.

Tum partes Mundi præcipuas Physicus intuebitur, & earum situm seu dispositionem, quod systema dicitur & varium nunc à variis esse perhibetur. Deinde Mundi affectiones, magnitudo, figura, motus &c. & harum affectionum causæ expendendæ.

His præmissis corpus universè dividendum in simplex & mixtum. Simplex prius inspiciendum, illudque in cæleste & elementare distribuendum, prius illud quia simplicius eâdem methodo tractandum, principia prima, materia scilicet & forma, tum causæ externæ efficiens & finis explorandæ, post modum affectiones per suas causas explicandæ sunt, densitas scilicet, raritas, lux, motus, &c.

VII.
De corpore
simplici.

T

His subjici debet elementorum consideratio, principia eorum, causasque, tum internæ, tum externæ exponendæ, tum affectiones & affectionum causæ, numerus, magnitudo, motus, quæ primæ, quæ secundæ qualitates omnium & singulorum, quis situs, quæ symbola, quæ assymbola.

VIII.
De
mixtis.

A simplicibus ad mixta procedendum, quæ ex iis oriuntur & ex iis conflata sunt: hæc in imperfecta & perfecta distribuenda, illa prius consideranda quia simpliciora, ac videndum quæ eorum materia proxima, quæ forma, quæ efficiens causa, quis finis; Quæ affectiones & affectionum causæ, quæ species in terræ visceribus, in imâ, in mediâ, in supremâ aëris regione formantur.

Mixta post-modum suspicienda perfectâ, & simili methodo tractanda, inanimata prius, quia simplicio-

ra; Succis terreis, metalla, lapides
primum communes, tum pretiosi
secundum speciem, horum om-
nium principia, causæ, affectiones
& affectionum causæ similiter expli-
candæ.

Ab his ad animata transeundum,
eorum principia, præsertim anima
diligenter investiganda, quæ diffi-
cilis semper visa est, & videbitur
iis qui imaginationem magis quam
rationem consulere solent.

D. Hic hære paulisper, quid vo-
cas rationem potius quam imagi-
nationem consulere?

I X.
De
anima-
tis.

M. Quia nunc ex quo nova in-
vecta est philosophandi ratio, quæ
tota est imaginaria, vix ullus ratio-
nem consulit, sed solam imagina-
tionem, phanatica corpuscula, pul-
verem Cartesianum ciendo, moven-
do, in quo nullam animæ rationem
inveniunt, nec ullam ex eo unquam
poterunt eruere. Unde nullam in

Tij

plantis aut animalibus agnoscunt, nec agnoscerent in homine fortassè, nisi fides eos doceret aut cohiberet.

D. Quæso quâ tu ratione dignoscas animam?

M. Ratione seu ratiocinando. Ex causis & effectis ejus naturam colligendo, ut jam ostendimus. Neque enim sensus ullus aut imaginatio animam complectetur unquam.

Tum animata in varia genera pro varietate animarum distribuenda, in vegetans, sentiens, & rationale.

Deinde vegetans in sua genera speciesque dividendum. Singulorum principia, partes, causæ, affectiones, & affectionum causæ investigandæ. Idipsum eâdem methodo in sentientibus præstandum, simpliciora semper priùs considerando, donec tandem ad rationale perveniatur omnium animalium perfectissimum, & totius universitatis rerum compendium.

In hujus animalis consideratione diu multumque hærendum ; corporis ejus partes omnes , internas externas mirâ varietate , proportionē , symmetriâ , pulchritudine conspicuas contuendo , authorem ejus Deum admirari decet , sed in animæ præsertim contemplatione , totam mentis contentionem adhibere juvat , quia ea præcipua pars est hominis , quâ propius ad Deum accedimus , in cujus suavissimâ contemplatione præcipua pars humanæ foelicitatis etiam in hac vitâ collocanda est ; quia nihil excellentius , nihil dignius , nihil utilius , nihil jucundius homini potest accidere . Hâc enim cognitione facilius assurgemus ad Deum cognoscendum , plenius in hac vitâ per fidem , & perfectè tandem in alterâ vitâ per speciem videndum ; Quò nos ducat omnipotens & misericors Deus per Jesum Christum Dominum nostrum .

CAPUT XVIII.

I. *Humanitas est anima rationalis tota ex Sacra Scriptura.* II. *Declaratur animam rationalem esse partim materialem, partim immaterialem, ex D. Augustino secundum Sacram Scripturam.* III. *Ex Aristotele anima est essentia corporis naturalis organici, ut aspectus est oculi essentia.* IV. *Aristoteles primus docuit quid sit accuratè scire.* V. *Quid sit accuratè scire.* VI. *Pauci verè Physici.* VII. *Quomodo animæ natura est investiganda.* VIII. *Sola mens, immortalis esse demonstratur in homine, non anima tota.*

I. Hu-
mani-
tas est
anima
ratio-
nalis ex
Sacra
Scrip-
tura.

D. **N**ON plenè satis capio quo-
modo humanitas dici pos-
sit anima rationalis.

M. Humanitas forma dicitur in
Sacris Scripturis, & à Sanctis Pa-
tribus, neque aliud intelligit S. Pau-
lus, S. Augustinus, cæterique Pa-

tres per formam servi , quàm humanitatem , quemadmodum non aliud concipiunt per formam Dei quàm divinitatem ; igitur humanitas verè dici potest forma , & quidem essentialis , quoniam totam hominis dicit essentialiam ; apud autem D. Thomam & alios benè multos eadem prorsus est forma essentialis & substantialis , apud omnes verò non alia est forma substantialis hominis quàm anima rationalis ; & sic omnium iudicio humanitas erit anima rationalis , si rectè sentiant , & rectè intelligant quid dicunt.

D. Sed humanitas est ipsa hominis natura.

M. Natura secundum plerofque Philosophos duplex est , materia scilicet & forma , illa passiva , hæc activa , quia est principium omnium actionum , qualis est certè humanitas , & ita natura dicitur ut forma , & sicut idem est accidens & acciden-

talis forma, ita prorsus idem est essentia, & essentialis forma.

I I.
Anima
ratio-
nalis est
partim
mate-
rialis,
partim
imma-
terialis
ex D.
Aug.

D. Sed omnes fatentur humanitatem esse partim materiale, partim spiritalem, non omnes tamen, imò paucissimi, aut tu ferè solus animam hominis esse putas, partim materiale, partim spiritalem.

M. D. Augustinus non tantum dicit, sed & ex Scripturis Sacris confirmat animam hominis esse partim spiritalem, partim materiale.

D. Id quidem tu sæpiùs dixisti, sed vellem ipsa D. Augustini verba videre seu audire.

M. Ea copiosè satis exscripsi in disputatione de existentia Dei & humanæ mentis immortalitate.

D. Verum nonnulli fortassis legent hanc tuam methodum, qui priorem illam non viderunt disputationem, neque est quod graveris ea hîc recitare, quoniam quidem folles in eadem planè disputatione sæ-

pius & in hac methodo eadem repetere.

M. Soleo quidem ea quæ mihi videntur difficilia & scitu necessaria non rarò repetere, ut auditorum animis fortiùs inhæreant, & plenius intelligantur. Neque recuso hîc retexere verba D. Augustini scitu dignissima, qui cap. 22. lib. 4. de animâ & ejus origine, disputans contra Vincentium Victorem, Donatistam olim & tum Catholicum, *non sicut tu existimas universam, scilicet animam, mentem vocari, quæ constat ex animâ & spiritu, quod ubi legeris nescio, mentem quippe nostram, nisi rationale, intellectuale nostrum dicere non solemus, ac per hoc quod idem ait Apostolus. Renovamini autem spiritu mentis vestræ, quid aliud dicit; nisi renovamini mente vestrâ. Sic enim spiritus mentis, nihil aliud est quàm mens, quomodo corpus carnis nihil aliud esse*

potest quàm caro ; nam & hoc scriptum est in exspoliatione corporis carnis , ubi carnem corpus carnis appellat , & paulò superiùs eodem cap. 22. restat ostendere quem ad modum quamvis & propriè dicatur spiritus , non universa anima , sed aliquid ipsius . sicut Apostolus dicit & integer spiritus vester & anima & corpus ; vel illud multò expressiùs in lib. Job cap. 7. absolvesti animam meam à spiritu meo. Et paulò inferiùs cum enim constet aliquid esse in animà quod propriè spiritus nominetur , quo excepto propriè nominatur & anima ; jam de rebus ipsis nulla est contentio , præsertim quia illud etiam ego dico propriè vocari spiritum , quod & tu dicis , id est quo ratiocinamur & intelligimus quando ita distinctè dicuntur , quemadmodum Apostolus ait , & integer spiritus vester & anima & corpus. Hunc autem spiritum etiam mentem videtur appellare , cum

dicit mente servio legi Dei, carne autem legi peccati. Nam & ipsa sententia est, & caro concupiscit adversum spiritum & spiritus adversum carnem, ut quod ibi dicit mentem, hoc hic intelligatur spiritum dicere.

Et lib. 83. q. q : q; 7. Anima aliquando ita dicitur, ut cum à mente intelligatur, veluti cum dicimus hominem ex animâ & corpore constare aliquando, ita ut exceptâ mente concipiatur, sed cum exceptâ mente dicitur, ex iis operibus intelligitur quæ habemus cum bestiis communia, bestia namque carent ratione, quæ mentis semper est propria.

Sed & cap. 23 lib. 4. de animâ, docet belluas habere quidem animam, non spiritum. Et ego ut possim expeditius probare quæ sentio, te ipsum testem citius & commodius adhibebo. Sic enim spiritum definisti, ut pecora appareant non spiritum, sed animam habere. Et eodem capite

his verbis: Satis indicas quid esse spiritum hominis intelligas; id est rationale nostrum quo sentit & intelligit anima, non sicut sentit corporis sensibus, sed sicut est ille intimus sensus ex quo est appellata sententia. Et ibidem Non habent itaque spiritum pecora, id est intellectum & rationem ac sapientiae sensum, sed animam tantum, nam & de illis dictum est, producant aquae repentia animarum viventium, & producat terra animam viventem. Denique docet D. Augustinus eodem hoc capite, animam universam seu totam, & eam etiam animæ partem quæ à mente distinguitur, nonnunquam spiritum vocari, sed minùs propriè, quo etiam sensu belluarum animæ, ventus & aër, spiritus vocantur in Sacrà Scripturâ, ut ergo noveris planissimè & plenissimè eam quæ anima est more divinorum eloquiorum etiam spiritum dici, appellatur

latur pecoris spiritus, & utique non habent pecora illum spiritum quem tua dilectio discernens ab animâ definivit, &c.

Ex quibus omnibus constat secundum D. Augustinum ipsamque Scripturam Sacram, animam sumi tribus modis, 1°. Pro solâ mente, seu superiore animæ parte. 2°. Et quidem propriè pro inferiore animæ parte, quæ sentientem & vegetantem animæ partes complectitur. 3°. Pro totâ seu universâ animâ ex his partibus constante; sed malunt nostri juvenem illum olim Donatistam qui per animam solam, mentem intellexit, quàm D. Augustinum & Sacram sequi Scripturam. Quid autem universa illa est anima, quàm humanitas seu formale principium omnium operationum hominis. Divus autem Thomas humanitatem, essentiam hominis totam agnoscit, & licet animam humanam cum mente soleat confundere, duas

tamen ejus facultates agnoscit, sensum scilicet & intellectum, illum materiale, hunc immateriale ar. 4. q. 12. p. 1. Facultates autem animæ ab ejus substantiâ à plerisque non distinguuntur, licet aliter sentiat D. Thomas, ergo secundum plerisque anima dici potest, partim materialis, partim immaterialis.

III. Ex
Aristo-
tele
anima
est es-
sentia
corpo-
ris na-
turalis
organi-
ci, ut
aspec-
tus est
oculi
essen-
tia.

D. Vellem de his audire ipsum Aristotelem qui formæ substantialis author & introductor habetur.

M. Iis oppressus est Aristoteles calumniis ita spretus & conculcatus, ut eum vix aliquis audeat laudare, licet ei longè plus Philosophia debeat quàm omnibus antiquis, dicam etiam & recentioribus omnibus. Licet solus inter veteres viderit quid scire sit, neque inter recentiores quisquam vidit, nisi qui id ab eo didicerit: unde cum eo omnis scientiæ ratio & perfectio ex scholis nostris exulat, nec quemquam

facile reperias qui veram scientiæ præsertim physici rationem sit af-
secutus; ego tamen sæpius miratus
sum, quomodo D. Augustinus qui
suam animæ notionem totam ex
Sacris Scripturis hausit, perfectissi-
mè cum Aristotele consenserit.

Itaque Aristoteles refutatis vete-
rum de animâ opinionibus 1. libro
de animâ. Cap. 1. lib 2. revocatâ
animâ ad genus substantiæ seu ουσίας,
hanc tribus modis dici statuit, de
materiâ ut subiecto ex quo res fit;
de formâ ut de essentiâ, ac de to-
to, ut de re per se subsistente, osten-
soque quòd anima non sit materia,
nec totum, concludit eam esse essen-
tiam rei, his verbis. *Universaliter*
igitur dictum est quid sit anima; est
enim essentia, quæ in ratione confi-
stit, hæc verò est quidditas corporis
eiusmodi, id est naturalis & organi-
ci, ut legentibus idem caput con-
stabit. Quod illustrat exemplo ocu-

Καθό-
λα μὲν
εἴρηται
τί ἐστὶν
ἡ ψυχὴ,
οὐσία
γὰρ ἡ
κατὰ
τὸν λό-
γον, τὸ το
δε τὸ τι

ἡ ἐν αὐ-
τῷ τοῦ
δὲ σώ-
ματι.

li. Nam, inquit, si oculus esset ani-
mal, utique aspectus esset ejus anima:
hic enim est essentia oculi, quæ in ratio-
ne consistit, oculus verò est materia as-
pectus: quo deficiente non est oculus nisi
homonymus, quemadmodum lapi-
deus & pictus. Ex quibus satis constat
Aristotelem nihil aliud per animam
intelligere quàm essentiam rei & qui-
dem totam. Quid autem est tota
hominis essentia nisi humanitas?

D. Sed omnes volunt materiam
non minùs ad essentiam rei natura-
lis quàm formam pertinere.

M. Materia, ut jam diximus, ad
substantiam rei pertinet, non au-
tem ad essentiam. Ostendimus au-
tem essentiam rei naturalis propriè
loquendo non esse substantiam seu
rem per se subsistentem, ut essentias
separatas, Deum scilicet & Angelos;
sed præter essentiam res naturalis
desiderat subiectum aliquod seu ali-
quam materiæ portionem, quæ prio-

rem essentiam exuendo hanc induat,
& unà cum eâ rem naturalem con-
stituat, ut lignum exuendo essen-
tiam ligni induit essentiam ignis,
ut fiat ignis. Hæc quisquis ignorat,
nullam unquam rei naturalis scien-
tiam assequetur.

D. Ignorant tamen ferè omnes
nec facile patiuntur unum Aristo-
telem scientiæ authorem & inven-
torem haberi.

IV. Ari-
stoteles
primus
docuit
quid sit
accura-
tè scire.

M. Dicant illi nobis quis Aristo-
tele prior docuit quid sit accuratè
scire. Vellem tu nobis diceres quid
sciri possit, & ita fortassis intelliges
vix ullum scire, quid sit scire.

D. Ego verò existimo veritatem
omnem sciri posse.

M. Graviter erras, veritates
enim supernaturales, ut Deum esse
trinum, Verbum esse incarnatum,
sciri non possunt, sed fide credi de-
bent, eaque propter revelationem
à Deo factam, & ab Ecclesiâ pro-
positam.

D. Intellego tantum veritates naturales.

M. Et adhuc falleris, non enim omnis veritas naturalis sciri potest, sed ea tantum quæ est necessaria; de solis enim agit necessariis scientia. Sed ne quidem omnis veritas naturalis & necessaria propriè & accuratè loquendo sciri potest.

V.

Quid
accura-
tè sciri
potest.

D. Quid ergo sciri potest?

M. Id quod potest demonstrari, quoniam scientia in habitu spectata dicitur habitus demonstrativus, & in actu considerata est demonstratio.

D. Quid ergo potest demonstrari?

M. Propositio necessaria cujus attributum sit proprietas, non autem essentia subiecti. Et quidem ut accurata perfectaque fiat demonstratio de quâ diximus, debet illud attributum de primo suo subiecto demonstrari, & ad illud revocari.

D. Quare non potest essentia de suo subiecto demonstrari?

M. Quia immediatè ei convenit, & immediatam cum eo constituit propositionem quæ demonstrari minimè potest. Omnis enim demonstratio fit per aliquod medium inter attributum & subiectum; v. c. homo immediatè & per se est animal rationale, nec ullum medium aut ulla ratio est, cur sit animal rationale, hoc enim est ipsa hominis ratio.

D. Quare accidentia communia non possunt demonstrari de subiectis? Quare v. c. non potest demonstrari quòd homo sit albus, sicut demonstratur quòd sit capax virtutis?

M. Quia capacitas virtutis necessariam habet cum homine connexionem, & ab ejus essentiâ procedit, ut ostendimus. Albedo verò non convenit necessariò homini, nec ab ejus essentiâ procedit, sed à certâ materiæ portione, quæ simul cum humanitate constituit hominem, &

humanitas in aliâ portione materiæ potest esse cum nigredine conjuncta. Quemadmodum circulus in auro est fulvus, in argento albus, nec fulvedo nec albedo demonstrari possunt de circulo.

D. Non videtur par ratio, quia materia pertinet ad constitutionem hominis, imò ad ejus essentiam, ut multis placet; at verò nec aurum nec argentum pertinet ad constitutionem circuli aut ejus essentiam.

M. Materia quidem communis & secundum speciem spectata pertinet ad essentiam hominis, v. c. carnes & ossa, sed hæc aut illa materiæ pars, hæc aut illæ carnes, hæc aut illa ossa non pertinent ad essentiam hominis, quia continuo ac singulis planè diebus mutantur abeunte unâ materiæ parte, & aliâ succedente. Sic aquæ secundum speciem spectatæ pertinent ad essentiam fluminis, hæc aut illa

aqua non pertinent. Humanitas tamen una numero perseverat totâ vitâ, ut flumen unum numero, licet continuò aquæ mutantur. Et certè si materiæ illa portio pertineret ad essentiam hominis, accidentia, quæ eam consequuntur, necessariò homini convenirent, ac de eo possent demonstrari, quod nemo sciens quid sit demonstratio, dixerit.

Igitur ea materiæ portio pertinet quidem ad substantiam hominis, non verò ad ejus essentiam. Aliud autem in rebus naturalibus aut Physicis est essentia, & aliud substantia, ut suo loco diximus, & ex D. Thom. patet q. 3. a. 3. prim. part. in cor.

D. Video valdè paucos rerum naturalium veram ullam habere rationem, quoniam earum principia prima penitus ignorant, materiam & formam, quoniam hæc a quo jure ad rei essentiam pertinere credunt, nec ullum novi qui sciat quid sit anima.

VI.
Pauci
verè
Philosophi.

M. Id minimè mirum videri debet, quoniam Galenus ipse vir certè magnus nunquam novit quid sit anima, imò temerarium esse putat eum, qui id scire velit.

D. Quà ergo ratione demonstrant immortalitatem animæ rationalis, si nesciant quid sit?

M. Pauci sciunt quid sit ipsa demonstratio. Certè Gassendus vir non ignoti nominis eam nunquam novit, cum eam impossibilem esse putavit; multò minùs Cartesius qui sua sophismata tanquam certissimas demonstrationes proposuit, quibus nullas meliores excogitari posse putavit. Multò minùs animæ naturam perspexerunt, sed nec modum quo ea possit investigari, cognoverunt.

D. Quomodo ergo Cartesius dicere potuit eâ nihil sibi notius esse, cum eam definivit substantiam cogitantem?

M. Malè planè definivit & quid

cogitatio esset penitus ignoravit : cum omnes voluntatis , intellectus , imaginationis & sensuum operationes , cogitationes esse statuit. Unde sentiens omnis substantia est cogitans, & ita belluæ omnes sunt substantiæ cogitantes, cum sine ullâ controversiâ sint sentientes. Ut omnes ferè nunc agnoscunt, etiam Cartesii sectatores , & agnoscent omnes qui majorem suis sensibus fidem adhibebunt, quàm phanaticis Cartesii definitionibus , quæ summam & crassam sapiunt ignorantiam. Sed de his alio loco disputavimus & ostendimus plenissimè ac planissimè, ut cum D. Augustino loquar, omnis definiendi, dividendi ac demonstrandi artis ignarum fuisse Cartesium, eum nullam corporis naturalis, nullam animæ, nullam sensus, nullam intellectus, nullam scientiæ notionem habuisse.

D. Multis nimis offensus videris

VII.
Quo-
modo
animæ
natura
est in-
vesti-
ganda.

Cartesio , sed ad propositam quæ-
sitionem redi , & ostende quâ
ratione animæ natura possit investi-
gari , & ejus immortalitas perfectè
demonstrari.

M. Ego cum Cartesii personâ
nullum omninò bellum gero , sed
cum ejus erroribus quos ferre mi-
nimè possum. Jam dixi quâ ratio-
ne animæ natura sit investiganda ,
& ejus immortalitas demonstranda.

D. Fecisti quidem , sed leviùs
quàm rei gravitas postulat , quæ
non satis inculcari potest , quoniam
omnibus est ferè penitùs ignota ,
neque satis repeti potest res tanti
momenti.

M. Animæ naturæ ratio & reli-
quarum omnium rerum naturalium
ex causis & effectis seu operationibus
ejus , non autem ut sit ex levibus
conjecturis & cæcis imaginationibus
investiganda est. Omnes enim ani-
mam substantiam quandam esse
volunt

volunt, & idolum sibi quoddam fingunt, ac solam imaginationem sequuntur, neque eam superare valent, præsertim ii qui Mathematicis figuris sunt assueti.

Igitur anima per se non fit, sed fit homo, cujus essentia & forma est anima. Hominis autem causa prima seu author est Deus intelligens & sapiens; omnis autem intelligens & sapiens artifex aut author alicujus operis, primum sui operis finem seu functionem, aut primariam operationem intuetur, cui cæteræ subordinantur, ex quâ totius operis ideam, rationem, formam & essentiam colligit; quæ ea complectatur omnia, quæ ad hanc primariam operationem necessaria sunt.

Jam-verò primaria princepsque hominis operatio à quâ suam differentiam & speciem sumit, est universalis de rebus omnibus sensibili-

bus ratiocinatio, earumque causis & effectis. Hæc autem operatio prævias omnium sensuum operationes desiderat, ex quibus suas haurire possit ideas, seu species, ita ut si unus defecerit sensus, ejus objecti nullam habere possit ideam: ita cæci nati nullam habere possunt lucis aut coloris ideam; sensus autem omnes sunt vires organicæ & materiales, quarum organa nutrirī debent.

Unde sensus nequeunt esse sine vi vegetativâ, quæ perfecta esse nequit sine vi auctrice, ut ad debitam speciei suæ perveniat magnitudinem, ut facilè & expeditè suas functiones obire possit; & ubi ad statum perfectum pervenerit, sibi similes generare, ut speciem suam conservare possit. Hinc necesse prorsus est animam rationalem esse sentientem & vegetantem, ac partim materiale, & partim spiritalem,

quia universalis ratio operatio est planè pura & spiritalis, sentientis autem & vegetativæ partis operationes omnes, quæ pars propriè secundùm D. Augustinum & sacram Scripturam dicitur anima; tota materialis est, ad ea pertinens opera, ut loquitur idem S. Doctor, quæ homini & belluæ sunt communia, quæ proinde veram habent animam. Ex hæc animæ pars neque mortalis, neque immortalis dici potest, quoniam non per se vivit, quia nullas habet operationes sibi proprias, sed omnes corpori communes; mortale autem & immortale propria sunt solum per se viventium attributa.

Belluæ quidem & plantæ per se vivunt seu habent operationes vitales sibi proprias, sentire, nutrirî, crescere, quarum nulla solis plantarum aut belluarum animabus convenit, unde nec per se vivunt; sed ipsæ plantæ & belluæ; mortales qui-

dem sunt, quia in iis est subiectum commune vitæ & morti, corpus scilicet corruptibile, quod dum integrum est ac perfectum vivit, neque quidquam est anima earum, quàm hæc perfectio prima quæ ἐντελέχεια, ab Aristotele dicitur, id est perfecta rei habitudo, quam male Cicero perennem definit motum, cum vocis origo sit τέλος, id est finis, unde ἐντέλης, finitus perfectus, & hinc ἐντελέχεια ab ἐντέλης & ἔχω, habeo; ubi verò deficit hæc integritas ad vitæ operationes necessaria, moritur planta, moritur belua; & etiam homo propter eandem rationem, quia corpus ejus est subiectum commune vitæ & morti.

Quare quisquis has omnes animæ partes sub animæ nomine & ratione complectitur, ut reverà ea continentur, is nunquam animæ immortalitatem demonstrabit, & quid demonstratio sit penitus ignorat.

De solâ ergo superiori animæ VIII.
parte quæ mens propriè vocatur, Sola
esse potest quæstio, ut jam diximus, mens
quæque sola, sed malè & minùs immor-
propriè vocatur anima, communi- talis ef-
ter in Scholis & ab omnibus Chri- se de-
stianis, ut invaluit usus. mon-
stratur.

Hæc igitur pars animæ est sub-
stantia, ut ostendimus, & quidem
propriè dicta, quia potest per se
subsistere, & vivens est, quia habet
operationes sibi proprias intelligere
& velle; ac immortalis est, quia
nullum includit subiectum commu-
ne vitæ & morti, cùm sit substan-
tia omninò pura, quæ habet ope-
rationem puram, cuius obiectum est
omninò purum, seu forma sine om-
ni subiecto concepta, circulus v. c.
purus qui nihil aliud sit quàm cir-
culus, ut jam non semel diximus.

D. Mihi non displicet sæpiùs au-
dire, si tibi non displiceat sæpiùs
dicere, sed vellem nunc demonstra-

tionem in formâ institueres.

M. Fortassis aliis displicebit toties repetita.

D. Non credo. Age modò.

M. Primum immortalitatis subiectum est mens universè sumpta; nihil enim aliud significat immortale quàm vivens, non potens mori; omnis autem mens universè sumpta est vivens non potens mori, & omne vivens non potens mori est mens.

D. Quomodo id efficis?

M. Mens est vivens quia vitales habet in se operationes, intelligere scilicet & velle: non potest mori, quia nullum includit subiectum; mors enim nihil aliud est quàm privatio vitæ, in subiecto apto, ubi autem nullum est subiectum, nulla esse potest privatio, mentis autem omnis ratio est essentia pura sine ullo subiecto, ut sæpè diximus, & quidem vivens. Igitur

Omnis substantia pura nullum in-

cludens subjectum, vivens & non potens mori est immortalis. Omnis mens est substantia pura nullum includens subjectum; vivens est & non potens mori, ut ostensum est. Igitur mens omnis est immortalis.

In homine porrò est sine ullâ controversiâ mens, cum in eo sint ejus operationes, intelligere scilicet & velle; & hæc est præcipua pars tum hominis ipsius, tum animæ ejus, non tamen universa anima, ut cum D. Augustino loquamur, quoniam est proprium & immediatum principium præcipuæ ejus operationis, scilicet rationis aut ratiocinationis universalis, propter quam cæteræ desiderantur, & ad quam per se ordinantur, & per quam ipse homo ad Deum cognoscendum institutus est. Cui honor & gloria, per Jesum Christum Dominum nostrum.

F I N I S.

A P P R O B A T I O.

PRO Excellentissimi Domini D. Galiarum
Cancellarii jussu, opus, quod inscribi-
tur, *Vera sciendi Methodus*, quâ potui at-
tentione, perlegi. Quos Philosophicos Thra-
sones Author, olim celeberrimus Philosophiæ
Professor, doctissimè juxta atque acutissimè ador-
sus est, eisdem Academiæ Parisiensis Rector
amplissimus non parùm exterruit: nunc verò
Philosophorum Navarricorum Archididascalus
vigilantissimus, Regiamque pro meritis con-
secutus Cathedram, ac Sancti Thomæ instar,
Aristotelis vindex, illæ sâ Catholicâ fide Theo-
sophiâque Morali, pio ardentique zelo ex-
pugnare conatur. Faxit Deus Opt. Max. ut il-
lius expensis argumentis, sapiant ad sobrieta-
tem, qui, occupatione pessimâ, (Hagiographo-
rum verbis utor) hætenus evanuerunt in cogita-
tionibus suis. Datum Lutetiæ Parisiorum, d'e
decimâ-quintâ Julii, Virginiei Partûs anno mil-
lesimo septingentesimo decimo sexto.

Rom 12.
Eccl: 1.
Rom. 1.

BRIANDUS MARION, Doctor
Theologus Parisiensis, è Regiâ Societate, &
Emeritus in Regiâ Navarrâ Sacræ Theole-
giæ Professor Regius.

PRIVILEGE DU ROY.

LOUIS par la grace de Dieu Roy de France & de Navarre, à nos amez & feaux Conseillers, les gens tenans nos Cours de Parlement, Maistres des Requestes ordinaires de nostre Hostel, Grand Conseil, Prevost de Paris, Baillifs, Senechaux, leurs Lieutenans Civils & autres nos Justiciers qu'il appartiendra, SALUT. Nostre bien amé le sieur Michel Morus, Ancien Recteur de l'Université de Paris, Principal des Artiens ou Philosophes de Navarre, & nostre Professeur de Physique en nostre College, Nous ayant fait remontrer qu'il souhaiteroit faire imprimer un Ouvrage qui a pour titre *Vera sciendi Methodus* qu'il desireroit donner au Public, s'il Nous plaisoit luy accorder nos Lettres de Privilege pour la Ville de Paris seulement, Nous avons permis & permettons par ces Presentes audit Sieur Morus de faire imprimer ledit Ouvrage en tels forme, marge, caractere, en un ou plusieurs Volumes, conjointement ou separément, & autant de fois que bon

luy semblera ; & de le faire vendre & debiter par tout nostre Royaume pendant le temps de six années consecutives , à compter du jour de la datte desdites *Presentes*. Faisons défenses à toutes sortes de personnes de quelque qualité & condition qu'elles soient , d'en introduire d'impression étrangere dans aucun lieu de nostre obéissance ; & à tous Libraires- Imprimeurs & autres dans ladite Ville de Paris seulement , d'imprimer ou faire imprimer ledit Ouvrage en tout ny en partie , & d'y en faire venir , vendre & debiter d'autre impression que de celle qui aura esté faite pour ledit Sieur Exposant , sous peine de confiscation des Exemplaires contrefaits , de mille livres d'amende contre chacun des Contrevenans , dont un tiers à Nous , un tiers à l'Hostel-Dieu de Paris , l'autre tiers audit sieur Exposant , & de tous dépens , dommages & interests , à la charge que ces *Presentes* seront enregistrées tout au long sur le Registre de la Communauté des Imprimeurs & Libraires de Paris , & ce dans trois mois de la datte d'icelles , que l'impression dudit Ouvrage sera faite dans nostre Royaume & non ailleurs , en

bon papier & en beaux caracteres , conformément au Reglement de la Librairie , & qu'avant que de l'exposer en vente , il en sera mis deux Exemplaires dans nostre Bibliothèque publique , un dans celle de nostre Chasteau du Louvre , & un dans celle de nostre tres-cher & feal Chevalier Chancelier de France le Sieur Voysin, Commandeur de nos Ordres , le tout à peine de nullité des Presentes , du contenu desquelles vous mandons & enjoignons de faire jouir ledit Sieur Exposant ou ses ayans cause pleinement & paisiblement , sans souffrir qu'il leur soit fait aucun trouble ou empeschement. Voulons que la Copie desdites Presentes qui sera imprimée au commencement ou à la fin dudit Ouvrage , soit tenuë pour dûëment signifiée , & qu'aux Copies collationnées par l'un de nos amez & feaux Conseillers & Secretaires , foy soit ajoutée comme à l'Original. Commandons au premier nostre Huissier ou Sergent de faire pour l'exécution d'icelles tous actes requis & necessaires sans demander autre permission , nonobstant Clameur de Haro , Chartre Normande & Lettres à ce con-

traies, CAR tel est nostre plaisir. DON-
NE' à Paris le vingt-huitième jour du mois
de Juillet l'an de grace mil sept cent seize,
& de nostre Regne le premier. Par le Roy
en son Conseil. Signé, FOUQUET.

Il est ordonné par Edit du Roy du mois
d'Aoust 1686 & Arrests de son Conseil, que
les Livres dont l'impression se permet par
chacun des Privileges de Sa Majesté, ne
pourront estre vendus que par un Libraire
ou Imprimeur.

Registré sur le Registre N° 4. de la
Communauté des Libraires & Imprimeurs
de Paris, pag. 58 N° 71, conformément
au Reglement, & notamment à l'Arrest
du Conseil du 13 Aoust 1703. A Paris
le 2 Octobre 1716

Signé, DELAULNE, Syndic.







Morus, Michael

Vera sciendi methodus

Lutetia 1716

Ph.sp. 588

urn:nbn:de:bvb:12-bsb10043983-5